


欽定唐書

卷二百八之二百十五

土岐文庫  
文庫17  
W202  
29

廿九





文庫 17  
W202  
29

010185193794

昭和二年二月一日  
土佐吉原氏  
寄

唐書卷二百八

宋 端 明 殿 學 士 宋 祁 撰

列傳第一百三十三

宦者下

李輔國本名靜忠以鬪奴為閹廡小兒貌倜儻略通書計事高力士年四十餘使主廡中簿最王鉞為使以典禾豆能檢櫛耗欺馬以故肥薦之皇太子得侍東宮陳玄禮等誅楊國忠輔國豫謀又勸太子分中軍趨朔方收河隴兵圖興復太子至靈武愈親近勸遂即位係天下心擢家令判元帥府行軍司馬肅宗稍稍任以肱臂事更名護國又改今名凡四方章奏軍符禁寶一委之輔國能隨事齷齪謹密取人主親信而內深賊未敢肆不曠章時時為浮屠詭行人以為柔良不忌也帝還京師拜殿中監閑廡五坊宮苑營田裁接總監使兼隴右羣牧京畿鑄錢長春宮等使少府殿中二監封成國公實封戶五百宰相羣臣欲不時見天子皆因輔國以請乃得可常止銀臺門決事置察事廳兒數十人吏雖有秋毫過無不得得輒推訊州縣獄訟三司制劾有所捕逮流降皆私判臆處因稱制敕然未始聞上也詔書下輔國署己乃施行羣臣無敢議出則介士三百人為衛貴幸至不敢斥官呼五郎李揆當國以子姓事之號五父帝為

乾隆四年校刊 唐書卷二百八列傳





娶元擢女爲妻擢以故爲梁州長史弟兄皆位臺省李峴輔政叩頭言且亂國於是詔敕不繇中書出者峴必審覆輔國不悅時太上皇居興慶宮帝自復道來起居太上皇亦間至大明宮或相逢道中帝命陳玄禮高力士王承恩魏悅玉真公主常在太上皇左右黎國弟子日奏聲伎爲娛樂輔國素微賤雖暴貴力士等猶不爲禮怨之欲立奇功自固初太上皇每置酒長慶樓南俯大道因裴回觀覽或父老過之皆拜舞乃去上元中劍南奏事吏過樓下因上謁太上皇賜之酒詔公主及如仙媛主之又召郭英乂王銑等飲資子頗厚輔國因妄言於帝曰太上皇居近市交通外人玄禮力士等將不利陛下六軍功臣反側不自安願徙太上皇入禁中帝不寤先時興慶宮有馬三百輔國矯詔取之裁留十馬太上皇謂力士曰吾兒用輔國謀不得終孝矣會帝屬疾輔國卽詐言皇帝請太上皇按行宮中至睿武門射生官五百遮道太上皇驚幾墜馬問何爲者輔國以甲騎數十馳奏曰陛下以興慶宮湫陋奉迎乘輿還宮中力士厲聲曰五十年太平天子輔國欲何事叱使下馬輔國失轡罵力士曰翁不解事斬一從者力士呼曰太上皇問將士各好在否將士納刀呼萬歲皆再拜力士復曰輔國可御太上皇馬輔國鞭而走與力士對執轡還西內居甘露殿侍衛才數十皆庭老太上皇執力士手曰微將軍朕且爲兵死鬼左右皆流涕又曰興慶吾王地數以讓皇帝帝不受今之徙自吾志也俄而流承恩播州魏悅濠州如仙媛歸州公主居玉

真觀更料後宮聲樂百餘更侍太上皇備灑掃詔萬安咸宜二公主視服膳自是太上皇怏怏不豫至棄天下輔國以功遷兵部尚書南省視事使武士戎裝夾道陳跳丸舞劍百騎前驅御府設食太常備樂宰相羣臣畢會旣得志乃厭然驕歛求宰相帝重違曰卿勳力何任不可但羣望未一如何輔國遂諷宰相裴冕使聯表薦己帝密遣蕭華使喻止冕張皇后數疾其顯帝寢疾太子監國后召太子將誅輔國及程元振太子不從更召越王兗王圖之元振告輔國卽伏兵凌霄門迎太子伺變是夜捕二王及中人朱輝光馬英俊等囚之而殺后他殿代宗立輔國等以定策功愈跋扈至謂帝曰大家第坐宮中外事聽老奴處決帝矍然欲剪除而憚其握兵因尊爲尚父事無大小率關白羣臣出入皆先詣輔國輔國頗自安又册進司空兼中書令實封戶八百未幾以左武衛大將軍彭體盈代爲閑廐羣牧苑內營田五坊等使以右武衛大將軍藥子昂代判元帥行軍司馬賜輔國大第於外中外聞其失勢舉相賀輔國始惘然憂不知所出表乞解官有詔進封博陵郡王仍爲司空尚父許朝朔望輔國欲入中書作謝表門者不內曰尚父罷宰相不可入輔國氣塞久乃曰老奴死罪事郎君不了請地下事先帝矣帝優辭諭遣有韓穎劉烜善步星乾元中待詔翰林穎位司天監烜起居舍人與輔國暱甚輔國領中書穎進秘書監烜中書舍人裴冕引爲山陵使判官輔國罷俱流嶺南賜死自輔國徙太上皇天下疾之帝在東宮積不平旣嗣位不



欲顯戮遺俠者夜刺殺之年五十九抵其首潤中殊右臂告秦陵然猶祕其事刻木代首以葬贈太傅諡曰醜後梓州刺史杜濟以武人爲牙門將自言刺輔國者

王守澄者史亡所來元和中監徐州軍召還方憲宗喜方士說詔天下求其人宰相皇甫鎛左金吾將軍李道古等白見楊仁晝浮屠大通仁晝更姓名曰柳泌大通自言壽百五十歲有不死藥並待詔翰林號人田元佐言有秘方能化瓦礫爲黃金詔除號令與董景珍李元戡皆介泌大通薦于天子天子惑其說泌以金石進帝餌之躁甚數暴怒志責左右踵得罪禁中累息帝自是不豫十五年罷元會羣臣危恐會義成劉悟來朝賜對麟德殿悟出曰上體平矣內外乃安是夜守澄與內常侍陳弘志弒帝於中和殿緣所餌以暴崩告天下乃與梁守謙韋元素等定冊立穆宗俄知樞密事文宗嗣位守澄有助進拜驃騎大將軍帝疾元和逆罪久不討故以宋申錫爲宰相謀因事除之不克更因其黨鄭注李訓乘其罅於是流楊承和於驪州韋元素象州遣中人劉忠諒追殺元素于武昌承和次公安賜死訓乃脅守澄以軍容使就第使內養齋醮賜死事祕時無知者贈揚州大都督其弟守涓自徐州監軍召還死於中牟劉克明亦亡所來得幸敬宗敬宗善擊毬於是陶元皓靳遂良趙士則李公定石定寬以毬工得見便殿內籍宣徽院或教坊然皆出神策隸卒或里閭惡少年帝與狎息殿中爲戲樂四方聞之爭以趨勇進于帝嘗聞

角觥三殿有碎首斷臂流血廷中帝歡甚厚賜之夜分罷所親近既皆凶不逞又小過必責辱自是怨望帝夜艾自捕狐狸爲樂謂之打夜狐中人許遂振李少端魚志弘侍從不及皆削秩帝獵夜還與克明田務澄許文端石定寬蘇佐明王嘉憲閻惟直等二十有八人羣飲既酣帝更衣燭忽滅克明與佐明定寬弒帝更衣室矯詔召翰林學士路隋作詔書命絳王領軍國事明日下遺詔絳王卽位克明等恃力將易置左右自引支黨顯兵柄于時樞密使王守澄楊承和中尉梁守謙魏從簡與宰相裴度共迎江王發左右神策及六軍飛龍兵討之克明投井死出其尸戮之務澄等皆斬首以徇籍入家貲又殺其黨數十人始克明謀逆母禁不許文宗立嘉母忠賜錢千緡絹五百匹給婢二人

田令孜字仲則蜀人也本陳氏咸通時厯小馬坊使僖宗卽位擢令孜左神策軍中尉是時西門匡範位右中尉世號東軍西軍帝冲駿喜鬪鵝走馬數幸六王宅興慶池與諸王鬪鵝一鵝至五十萬錢與內園小兒尤昵狎倚寵暴橫始帝爲王時與令孜同臥起至是以其知書能處事又帝資狂昏故政事一委之呼爲父而荒酣無檢發左藏齊天諸庫金幣賜伎子歌兒者日鉅萬國用耗盡令孜語內園小兒尹希復王士成等勸帝籍京師兩市蕃旅華商寶貨舉送內庫使者監闕櫃坊茶閣有來訴者皆杖死京兆府令孜知帝不足憚則販鬻官爵除拜不待旨假賜緋紫不以聞百度崩弛內外垢玩既所在盜起上下相掩



匿帝不及知是時賢人無在者惟<sub>心</sub>節<sub>心</sub>貪相與備員偷安噤默而已左拾遺侯昌蒙不勝憤指言豎尹用權亂天下疏入賜死內侍省宰相盧攜素事令孜每建白必阿昌倡和初黃巢求廣州願罷兵攜欲寵高駢使有功不聽賊因又易置關東諸節度賊乘之陷東都令孜急歸罪攜奉帝西幸步出金光門至咸陽沙野軍十餘騎呼曰巢爲陛下除姦臣乘輿今西秦中父老何望願還宮令孜叱之以羽林騎馳斬卽以羽林白馬載帝晝夜馳舍略谷時陳敬瑄方節度西川令孜兄也故請帝幸蜀有詔以令孜爲十軍十二衛觀軍容制置左右神策護駕使至成都進左金吾衛上將軍兼判四衛事封晉國公帝見蜀陜陋稍鬱鬱日與嬪侍博飲時攘袂北望惘然流涕令孜伺間呼萬歲帝爲怡悅因盛稱鄭畋王鐸程宗楚李鋌敬瑄方并力賊不足虞帝曰善初成都募陳許兵三千服黃帽名黃頭軍以捍蠻帝至大勞將士扈從者已賜而不及黃頭軍皆竊怨令孜令孜置酒會諸將以黃金樽行酒卽賜之黃頭將郭琪不肯飲曰軍容能易偏惠均衆士誠大願也令孜目曰君有功邪答曰戰鬪項薄契丹數十戰此琪之功令孜囁怒曰知之密以醖注酒中琪飲已馳歸殺一婢吮血得解因夜燒營剽城邑敬瑄討敗之奔廣都遂走高駢所帝聞變與令孜保東城自守羣臣不得見左拾遺孟昭圖請對不召因上疏極諫君與臣一體相成安則同寧危則共難昔日西幸不告南司故宰相御史中丞京兆尹悉碎于賊唯兩軍中尉以扈乘輿得

全今百官之在者率冒重險出百死者也昨昔黃頭亂火照前殿陛下唯與令孜閉城自守不召宰相不謀羣臣欲入不得求對不許且天下者高祖太宗之天下非北司之天下陛下固九州天子非北司之天子北司豈悉忠於南司廷臣豈無用於敕使文宗時宮中災左右巡使不到皆被顯責安有天子播越而宰相無所豫羣司百官棄若路人已事誠不足諫而來者冀可追也疏入令孜匿不奏矯詔貶昭圖嘉州司戶叅軍使人沈于墓頤津初昭圖知正言必見害謂家隸曰大盜未殄宜暨離間君臣吾以諫爲官不可坐觀覆亡疏入必死而能收吾骸乎隸許諾卒葬其尸朝廷痛之賊平令孜以王鐸爲儒臣且無功而首謀召沙陀者楊復光也欲歸重北司故罷鐸都統以復光功第一又忌復光且逼己故薄其賞自謂帷幄決勝擊王室輕重出入倨甚會復光死大喜卽罷復光樞密使中人曹知愨者富家子頗沈鷲賊在長安知愨以清濁二谷之人倚山爲屯不屈賊陰教士卒變衣服言語與賊類者夜入長安攻賊營賊大懼帝聞賜金紫擢內常侍聞帝將還因大言我且擁衆大散關下閣羣臣可歸者納之令孜謂然密令王行瑜以邠州兵度嶮山襲殺其衆由是益自肆禁制天子不得有所主斷帝以其專語左右輒流涕復光部將鹿晏弘王建等以八都衆二萬取金洋等州進攻興元節度使牛勣奔龍州晏弘自爲留後以建及張造韓建等爲部刺史帝還懼見討引兵走許州王建率義勇四軍迎帝西縣復以建及韓建等主之號



隨駕五都令孜以復光故縱授諸衛將軍皆養爲子別募神策新軍以千人爲都凡五十四都分左右爲十軍統之又遣親信覘諸鎮不附己者以罪除徙養子匡祐宣慰河中王重榮厚爲禮匡祐赦甚舉軍怒重榮因數令孜罪責其無禮監軍和解乃去匡祐還訴令孜且勸圖之令孜白以兩鹽池歸鹽鐵使卽自兼兩池權鹽使重榮不奉詔表暴令孜十罪令孜自將討重榮率邠靈朱玫鳳翔李昌符合鄜延靈夏等兵凡三萬壁沙苑重榮說太原李克用連和克用上書請誅令孜攻帝和之不從大戰沙苑王師敗攻走還邠州與昌符皆恥爲令孜用還與重榮合神策兵潰還略所過皆盡克用逼京師令孜計窮乃焚坊市劫帝夜啟開遠門出奔自賊破長安火宮室會廬十七後京兆王徽葺復粗完至是令孜唱曰王重榮反命火宮城唯昭陽蓬萊二宮僅存王建以義勇四軍扈帝夜亂牢水遂次陳倉克用還河中攻長克用且偪與重榮連章請誅令孜而駐鳳翔令孜請帝幸興元帝不從令孜以兵入寢殿逼帝夜出羣臣無知者宰相蕭遘等皆不及從孜勸興元節度使石君涉焚閣道絕帝西意遘惡令孜劫質天子生方鎮之難使孜進迎乘輿孜引兵追行在敗興鳳楊晟軍帝次梁洋稍引而南孜兵及中營左右被剽戮者不勝計令孜懼人圖己蒙面以行使王建長劍五百清道囊傳國璽授之次大散關道險澀帝危及難數矣分軍守靈壁允追兵攻長驅躡帝帝以閣道毀走他道困甚枕王建膝且寐覺而飯僅能至興元孜重榮表誅令

孜安慰羣臣詔以令孜爲劍南監軍使留不去重榮請幸河中令孜沮而止宰相遘率羣臣在鳳翔者表令孜瀕國煽禍惑小人計交亂羣帥請誅之帝不及省且詔重榮餉糧十五萬斛給行在重榮以令孜在不奉命孜乃奉嗣襄王熈卽僞位孜敗帝乃得還京師始帝入蜀諸王徒步以從壽王至斜谷不能進令孜驅使前王謝足且拘得馬可濟令孜怒挾王熈之行王恥之及帝病中外屬壽王令孜入候帝曰陛下記臣否帝直視不能語令孜自署劍南監軍使閔拱宸奉變軍自衛晝夜馳入成都表解官求醫藥詔可俄削官爵長流儋州然猶依敬瑄不行王卽位是爲昭宗楊復恭代爲觀軍容使出王建爲壁州刺史建取利州自署防禦使因略定閬中蜀黎雅等州詔卽置永平軍拜建節度使令孜謀與建連衡亢朝廷且曰吾子也書召之建喜將至復卻之建怒進圍成都令孜登城謝建曰老夫久相厚何見困答曰父子恩何敢忘顧父自絕朝廷苟改圖則父子如初令孜曰吾欲面計事建然許令孜夜負印節授建明日入成都囚令孜碧雞坊始右神策統軍宋文通爲諸軍所疾令孜因事召見欲殺之既見乃欣然更養爲子名彥賓卽李茂貞也故獨上書雪其罪詔爲湖南監軍凡二歲與敬瑄同日死臨刑裂帛爲縵授行刑者曰吾嘗位十軍容殺我庸有禮因教縊人法既死而色不變乾寧中詔復官爵

楊復恭字子恪本林氏子楊復光從兄也宦父玄翼咸通中領樞密世爲權家復恭略涉學術監諸鎮兵



應勳亂戰有功自河陽監軍入拜宣徽使擢樞密使黃巢盜京師令孜顯威福斷喪天下中外莫敢亢惟復恭屢與爭得失令孜怒下遷飛龍使復恭乃臥疾藍田僖宗出居興元復爲樞密使制置經略多更其手車駕還遂代令孜爲左神策中尉六軍十二衛觀軍容使封魏國公實戶八百賜號忠貞啟聖定國功臣帝崩定策立昭宗賜鐵券加金吾上將軍稍攘取朝政帝嘗曰朕不德爾援立我矣當減省侈長示天下我見故事尚衣上御服日一襲太常新曲日一解今可禁止復恭頓首稱善帝遂問游幸費對曰聞懿宗以來每行幸無慮用錢十萬金帛五車十部樂工五百犢車紅網畫香車百乘諸衛士三千凡曲江溫湯若畋獵曰大行從宮中苑中曰小行從帝乃詔類減半於是宰相韋昭度張濬杜讓能等爲帝言大中故事抑宦官不假借帝亦稍厭復恭橫恣王瓌者惠安太后弟求節度使帝問復恭對曰產祿傾漢三思危唐后族不可封拜陛下誠愛瓌任以它職可也不宜假節外落恐負勢顯地不可制帝乃止瓌聞怒甚至禁中見復恭詬辱之遂居中任事復恭不欲分己權白爲黔南節度使道興元而兄子守亮方領節度陰勒利州刺史覆瓿舟于江宗屬賓客皆死以舟自敗聞帝知復恭謀繇是深銜之復恭以諸子爲州刺史號外宅郎君又養子六百人監諸道軍天下威勢舉歸其門守立爲天威軍使本胡弘立也勇武冠軍人畏之帝欲斥復恭懼爲亂乃好謂曰卿家胡子安在吾欲令衛殿內復恭以守立見帝賜姓李名

順節使掌六軍管鑰光寵甚既勢鈞遂與復恭爭恨相中傷暴發其私復恭常肩輿抵太極殿宰相對延英論叛臣事孔緯曰陛下左右有將反者帝矍然緯指復恭復恭曰臣豈負陛下者緯曰復恭陛下家奴而肩輿至前殿廣樹不逞皆姓楊非反邪復恭曰欲收士心輔天子帝曰誠欲收士心胡不假李姓乎復恭無以對會緯出守江陵乃使人劫之長樂坡斬其旌節貲貯皆盡緯僅免復恭子守貞爲龍劍節度使守忠洋州節度使皆自擅貢賦上書誚薄朝政大順二年罷復恭兵出爲鳳翔監軍不肯因行丐致仕詔可遷上將軍賜几杖使者遺遺腹心殺使者於道遁居商山俄入居昭化坊第近玉山營而子守信爲軍使數省候出入或告父子且謀亂時順節遙領鎮海軍節度使同中書門下平章事詔與神策軍使李守節率衛兵攻復恭治殺使者罪帝御延喜樓須之家人拒戰守信亦率兵至昌化里陣以待會日入復恭與守信舉族出奔遂走興元順節已斥復恭則橫暴出入以兵從兩軍中尉劉景宣西門重遂察其意非常以狀聞有詔召順節輒以甲士三百人入至銀臺門何止之景宣引順節坐殿廊部將嗣光審出斬之從者大譟出延喜門剽承靈里盡夕止賈德晟與順節皆爲天威軍使順節誅頗嗟憤重遂亦奏誅之於是鳳翔李茂貞邠州王行瑜華州韓建同州王行約秦州李茂莊同劾守亮納叛臣請出兵討罪軍鎮不仰度支茂貞請假山南招討使宦尹愔類執不可帝亦謂茂貞得山南必難制詔兩解之茂貞劾復恭



自謂隋諸孫以恭帝禪唐故名復恭逆狀明白且請削守亮官爵遂擅與行瑜出討自號興元節度使詔宰相書慢悖不臣帝爲下詔令茂貞行瑜討之景福元年破其城復恭守亮守信奔閩州茂貞以子繼密守興元詔吏部尚書徐彥若爲鳳翔節度使而以茂貞帥興元不拜請繼密爲留後帝不得已授以節度使自是茂貞始疆大復恭與守亮等自閩州將北奔太原趨商山至乾元爲韓建邏士所禽卽斬復恭守信檻車送守亮京師梟首長安市茂貞上復恭與守亮書曰承天門者隋家舊業也兒但積粟訓兵何進奉爲吾披荆榛立天子既得位乃廢定策國老奈負心門生何門生謂天子也其不臣類此假子彥博奔太原收葬其尸李克用爲申雪詔復官爵

劉季述者本微單稍顯於僖昭間擢累樞密使楊復恭之斥帝以西門重遂爲右神策軍中尉觀軍容使時李茂貞得興元愈跋扈不軌宰相杜讓能與內樞密使李周謹及重遂謀誅之乃興師以嗣覃王戒丕爲京西招討使神策大將軍李鐸副之茂貞引兵迎壁蓋屋薄興平王師潰遂逼臨臯以陣暴言讓能等罪京師震恐帝坐安福門斬重遂周謹以謝茂貞更以駱全瓘劉景宣代爲兩中尉乾寧二年茂貞與王行瑜韓建以兵入朝李克用率師討茂貞次渭北同州節度使王行實奔京師謂景宣等曰沙陀十萬至矣請奉天子出幸避其鋒景宣方與茂貞睦故全瓘與鳳翔衛將閻圭共脅帝狩岐王行實及景宣子繼

晟縱火剽東市帝登承天門矢著樓閣帝懼暮出莎城士民從者數十萬至谷口人鬪死十三夜爲盜掠哭聲殷山徙駐石門茂貞恐乃殺全瓘景宣及圭自解天子還京師以景務脩宋道弼代之俄專國宰相崔胤惡之徐彥若王搏懼禍不解稍抑胤以和北軍胤怒劾搏黨官豎不忠罷去俄賜死流道弼驩州務脩愛州並死瀾橋逐彥若于南海乃以季述王仲先爲左右中尉疾胤尤甚時帝嗜酒怒責左右不常季述等愈自危先是王子病季述引內醫工車讓謝筠久不出季述等共白帝宮中不可妄處人帝不納詔著籍不禁由是疑帝與有謀乃外約未全忠爲兄弟遣從子希正與汴邸官程巖謀廢帝會全忠遣天平節度副使李振上計京師巖因曰主上嚴急內外惴恐左軍中尉欲廢昏立明若何振曰百歲奴事三歲郎主常也亂國不義廢君不祥非吾敢聞希正大沮帝夜獵苑中醉殺侍女三人明日午漏上門不啟季述見胤曰宮中殆不測與仲先率王彥範薛齊偓李師虔徐彥回總衛士千人毀關入謀所立未決是夜宮監竊取太子以入季述等因矯皇后令曰車讓謝筠勸上殺人釀塞災咎皆大不道兩軍軍容知之今立皇太子以主社稷黎明陳兵廷中謂宰相曰上所爲如此非社稷主今當以太子見羣臣卽召百官誓奏胤不得對季述衛皇太子至紫廷院左右軍及十道邸官僉潭程巖等詣思立門請對士皆呼萬歲入思政殿遇者輒殺帝方坐乞巧樓見兵入驚墮於牀將走季述仲先持帝坐以所持劔杖畫地責帝曰某



日某事爾不從我罪一也至數十未止皇后出徧拜曰護大家勿使怖若有罪唯軍容議季述出百官奏曰陛下耆倦于勤願奉太子監國陛下自頤東宮帝曰昨與而等飲甚樂何至是后曰陛下如軍容語宮監掖帝出思政殿后倡言曰軍容一心輔持請上養疾帝亦曰朕久疾令太子監國巖等皆呼萬歲后以傳國寶授季述就帝輦左右十餘人入囚少陽院季述液金以完鑄師虔以兵守太子卽位於武德殿帝號太上皇皇后爲太上皇后大赦天下東宮官屬三品賜爵一級四品以下一階天下爲父後者爵一級羣臣加爵秩厚賜欲媚附上下改東宮爲問安宮季述等皆先誅戮以立威夜鞭笞畫出尸十輩凡有寵于帝悉榜殺之殺帝弟睦王師虔尤苛察左右出入搜索天子動靜輒白季述帝衣書服夜浣食自寶進下至筆紙銅鐵疑作詔書兵器皆不與方寒公主嬪御無裘纈哀聞外廷盾告難於朱全忠使以兵除君側全忠封盾書與季述曰彼翻覆宜圖之季述以責盾盾曰姦人僞書從古有之必以爲罪請誅不及族季述易之乃與盟盾謝全忠曰左軍與盾盟不相害然僕歸心於公并送二侍兒全忠得書恚曰季述使我爲兩面人自是始離季述子希度至汴言廢立本計又遣李奉本齎示太上皇詰全忠狐疑不決李振入見曰豎刁伊戾之亂以資霸者今閹奴幽劫天子公不討無以令諸侯乃囚希度奉本遣振至京師與盾謀是時季述欲盡誅百官乃弑帝挾天子令天下都將孫德昭董從實盜沒錢五千緡仲先衆辱之督

其償株連甚衆盾問其不逞曰能殺兩中尉迎太上皇而立大功何小罪足羞又遣客密告德昭帶內蜜丸適意德昭邀別將周承誨期十二月晦伏士安福門待旦仲先乘肩輿造朝德昭等劫之斬東宮門外叩少陽院呼曰逆賊斬矣帝疑未信皇后曰可獻賊首德昭擲仲先頭以進宮人毀扉出御長樂門羣臣稱賀承誨馳入左軍執季述彥範至樓前盾先戒京兆尹鄭元規集萬人持大梃帝詰季述未已萬梃皆進二人同死梃下遂尸之兩軍支黨死者數十人中官奉太子遁入左軍收傳國璽齊偃死井中出其尸斬之全忠檻送巖京師斬于市季述等夷三族以德昭檢校太保靜海軍節度使從實檢校司徒容管節度使並同中書門下平章事賜氏李曰繼昭曰彥弼承誨亦檢校司徒豈管節度使視宰相秩皆號扶傾濟難忠烈功臣圖形凌煙閣留宿衛凡十日乃休竭內庫珍寶賜之當時號三使相人臣無比初延英宰相奏事帝平可否樞密使立侍得與聞及出或矯上旨謂未然數改易榜檄至是詔如大中故事對延英兩中尉先降樞密使候旨殿西宰相奏事已畢案前受事師虔請於屏風後錄宰相所奏帝以侵官不許下詔與徐彥回同誅

韓全誨張彥弘者皆不知所來並監鳳翔軍全誨入爲內樞密使劉季述之誅崔盾陸晟見武德殿右廡盾曰自中人典兵王室愈亂臣請主神策左軍以晟主右則四方藩臣不敢謀昭宗意不決李茂貞語人



曰崔盾奪軍權未及手志滅藩鎮矣帝問召李繼昭等問以盾所請奈何對曰臣世世在軍不聞書生立  
衛兵且罪人已得持軍還北司便帝謂盾曰議者不同勿庸主軍乃以全誨爲左神策中尉彥弘爲右皆  
拜驃騎大將軍袁易簡周敬容爲樞密使盾怒約京兆鄭元規遣人狙殺之不克全誨等知盾必除己乃  
已因諷茂貞留選士四千宿衛以李繼筠繼微總之盾亦諷朱全忠內兵三千居南司以婁敬恩領之韓  
偓聞岐汴交戍數諫止盾盾曰兵不肯去耳偓曰初何爲召邪盾不對議者知京師不復安矣全誨彥弘  
及彥弼合勢恣暴中官倚以自驕帝不平有斥逐者皆不肯行盾固請盡誅之全誨彥弘見帝祈哀帝知  
左右漏言始詔囊封奏事官人更求麗姝知書者數十人侍帝爲內訶由是盾計多露始張濬判度支楊  
復恭以軍貲乏奏假鹽麩一歲入以濟用度遂不復還至盾乃白度支財盡無以粟百官請如舊制全誨  
繼李繼筠訴軍中匱甚請割三司隸神策帝不能卻詔罷盾領鹽鐵盾銜之全誨等懼帝誅己與繼誨彥  
弼繼筠交通謀亂帝問令狐渙渙請召盾及全誨等宴內殿和解之韓偓謂不如顯斥一二柄臣許餘人  
自新妄謀必息不然皆自疑禍且速雖和解之凶燄益肆帝乃止是時全忠并河中盾爲急詔令入朝又  
詔書曰上反正公之力而鳳翔入朝引功自歸今若後至必先見討全忠得詔還汴悉師討全誨帝以爲  
忠又欲其與茂貞同功卽詔并力令盾諭二鎮書示帝意全忠取同州汴兵凡七萬威震關中全誨等泣

奏曰全忠且至欲脅陛下幸關東將謀傳禪臣不忍見高祖天下移它姓願至鳳翔合義兵討元惡帝未  
許方在乞巧樓全誨急卽火其下帝降樓乃決西幸彥弼等以帝未卽駕愈諄宮中禁索苛亟帝與后相  
視泣宮人私逃出都民崩沸或奔開化坊依盾第自固閉無留家鳳翔軍與左神策兵陣大衛長樂門外  
若丘墟然於是日南至百官不朝帝坐思政殿時彥弼先入鳳翔全誨逼帝出惟皇后諸王數百騎爲衛  
帝繡袍塗金帽以右神策軍從實天復元年十一月壬子全誨等遂火宮城繼誨彥弼欲劫百官從天子  
李德昭等按兵衛之乃得免茂貞以帝居盤屋全忠取華州下令自釋曰吾被詔及得宰相書令入朝既  
至皆僞也逆臣全誨震驚天子脅乘輿出遷暴露草奔吾當入對言狀時公卿皆在長安數日不聞朝廷  
敕畫盾使王溥見全忠曰上猶在盤屋公宜亟進羣臣慮知猷等奏記全忠請西迎天子誓曰進則似脅  
君退則負國然敢不勉盾率百官迎全忠滿橋入舍長安一昔而西茂貞聞全忠至以帝入鳳翔從臣繼  
三四人全忠遣楊達裴鑄入鳳翔奉表天子汴部將康懷英襲破李繼昭于武功禽馘六千級全誨懼請  
救於李克用克用遣全忠勸執崔盾洗海內謗全忠不答進屯鳳翔東偏茂貞登城諭語曰天子厭災  
于此讒人誤公來公當入覲全忠曰宦官脅乘輿與吾以兵問罪迎上東還王非同謀者尙何所冒明日  
圖鳳翔茂貞不出帝遣中人詔全忠班師不奉詔使者再往全忠聽命引兵攻邠州李繼微嬰城三日乃



降質其妻復使繼徽守回壁三原盾與鄧元規至三原邀說全忠全忠亦自聞茂貞將戰從營渭北據高原戰不勝全忠夜入盤屋拔藍田復屯三原時李克用攻慈隰救鳳翔全忠還河中克用部將李嗣昭戰數不利全忠取晉汾二州嗣昭遁還河東全忠曰此茂貞所倚今敗矣何能久乎盾復說全忠曰宦豎謀擁帝入蜀且泣全忠執其手乃定計迎天子會朱友靈敗岐兵于莫父居人皆入保全忠以精甲五萬與茂貞決戰岐兵敗仆尸萬餘茂貞帳下八百人就縛乃嬰城自夏訖冬兵連不能解勝敗略相償援軍十餘壁數為全忠擾襲不得進城中日困全忠由是取鳳鄜坊成隴等州間劫鈔以佐軍餉故能不乏茂貞疑帝與全忠有密約增甲士守宮殿初帝至鳳翔有鴉數萬棲殿樹謂之神鴉俄而鴉不來人以爲恐全誨等小人既勢窘更相怨疾不復遠慮時財用窳短帝輟所御膳賜全誨等三讓帝曰難得時欲同味耳茂貞食鮓美帝曰此後池魚茂貞曰臣養魚以候天子聞者皆駭於是全忠軍攻東城焚橋驪戰部將李繼寵出降茂貞懼密圖誅中官以紓難先遺書曰禍亂之生全誨首之變興倉卒故迎天子至此且公未至懼它盜馮陵公既志輔社稷請奉乘輿還宮僕願以敝賦從全忠然許然軍稍薄城大譁者三岐軍皆投璽無關意帝召茂貞全誨彥弼及宰相蘇檢李繼岌繼忠議和已決中官復沮罷它日帝召茂貞等曰十六宅諸王日奏餒死者十三王公主夫人皆間日食今又將竭奈何皆不敢對有衛士十餘人叩左銀

臺門遮全誨罵曰破一州餓死者十萬徒以軍容數人耳全誨詣茂貞叩頭訴茂貞謝曰士伍亦何知復斷于帝帝不許李繼昭見全誨曰昔楊軍容破楊守亮一族今驃騎復破吾族乎罵之乃出降官數傳援軍至皆相賀百姓笑曰給我乎是時全忠合四鎮兵十餘萬營壘相屬晝夜攻外兵詭守者曰劫天子賊守者亦詭外兵曰奪天子賊諸鎮見崔盾檄皆狐疑不出師唯壽州節度使王師範取亳州襲華州李克用攻晉州以爲援全忠懼益急全誨等素譎險常爲全忠盾所憚乃請先殺之以迎天子帝既惡宦人召遷而茂貞又其黨全忠雖外示順終悖逆皆不可倚欲狩襄漢依趙匡凝然不得去乃定計歸全忠以紓近禍三年正月茂貞請遣使諭全忠軍詔崔構挾中人郭遵誨往既行又命宮人寵顏馳見全忠諭密旨乃以蔣玄暉入衛二日茂貞獨見至日盱全誨彥弼恨甚逮食不能捉匕自見勢去計無所用垂頭喪氣帝召韓偓見東橫門執手涕泗帝曰今先去四大惡餘以次誅矣於是內養八輩候廷中授命每二輩以衛士十人取一首俄而全誨彥弼易簡敬容皆死即詔第五可範爲左軍都尉王知古楊虔朗爲樞密使知古領上院虔朗領下院繼筠繼誨彥弼皆伏誅茂貞取其輜重是夜誅內諸司使韋處廷等二十二人悉以首內布囊詔蔣玄暉學士薛貽矩送全忠曰是皆不肯使乘輿東者既斬之矣全忠大喜徧告軍中以姚洎爲岐汴通和使全忠詒茂貞書曰宦者乘輿言不已曰粟王旨是乎茂貞懼復誅小使李繼



彘等十人於是開壘門全忠猶攻北壘帝遣寵顏賜御巾箱寶器使罷兵又捕殺中官七十人全忠亦使京兆誅黨與百餘人天子入全忠軍全忠泥首素服待罪客省傳呼徹三仗有詔釋全忠罪使朝服見全忠伏地泣曰老臣位將相勤王無狀使陛下及此臣之罪也帝亦嗚咽命韓偓起之解玉帶以賜召之食帝顧衛兵或有憤發者因履係解目全忠爲吾繫之全忠跪結履汗浹于背而左右莫敢動是夜帝三召皆辭朱友倫以兵衛帝李克用引軍去帝還京師全忠議盡誅第五可範等八百餘人於內侍省哀號之聲聞于路留單弱數十人備宮中灑掃屑以鎮人性謹厚卽詔王鎔擇五十人爲勅使內諸司宦官主領者皆罷於是追諸道監軍所在賜死其財產籍入之詔以中官脅遷狀及全忠迎乘輿本末告方鎮罷監軍院咸視國初故事以三十人爲員衣黃衣不得養子內諸司皆歸省若寺兩軍內外八鎮兵悉屬六軍全忠還汴州帝以第五可範等無辜頗悼之爲文以祭自是宣傳詔命皆以宮人始劉季述專廢立中人皆與聞帝反正誅季述及薛齊偓數族而已餘貸不問又悔之後稍稍誅夷羣宦浸不安時帝懲幽辱能勵心庶政數召見羣臣問治道有志中興而全誨爭權外召強臣劫本朝以相吞齧卒用關東軍窮討暴誅君側雖清而全忠勢遂張帝卒弒死唐室以亡其禍本於全誨彘弘云

贊曰袁紹誅常侍以逞而曹操移漢崔丞相血軍容甘心焉而朱溫篡唐大抵假戚柄于外以內嬖恣人

則大臣專王室卑矣漢唐相去五百歲產亂取亡猶蹈一轍非天所廢而人謀洄刺乃然邪



唐書卷二百八

唐書卷二百八考證

田令孜傳陳敬瑄方節度西川令孜兄也○舊書作令孜弟

唐書卷二百八考證



唐書卷二百八考證

唐書卷二百九

宋 端 明 殿 學 士 宋 祁 撰

列傳第一百三十四

酷吏

太宗定天下留心聽斷著令州縣論死三覆奏京師五覆奏獄已決尚芋然為徹膳止樂至晚節天下刑  
 幾措是時州縣有良吏無酷吏武后乘高中懦庸盜壤天權畏下異已欲脅制羣臣櫛剪宗支故縱使上  
 飛變構大獄時四方上變事者皆給公乘所在護送至京師稟於客館高者蒙封爵下者被賚賜以勸天  
 下於是索元禮來俊臣之徒揣后密旨紛紛並興澤吻磨牙噬紳纒若狗豚然至叛背臭達道路冤血流  
 離刀鋸忠鯁貴彊之臣朝不保昏而后因以自肆不出幃闥而天命已遷猶慮臣下弗懲而大道使始出  
 矣至載初右臺御史周矩諫后曰凶人告訐遂以為常推劾之吏以儉責痛詆為功鑿空投隙相矜以殘  
 泥耳籠首枷楔兼暴拉脇籤爪縣髮熏目號曰獄持晝禁食夜禁寐敲撲撼搖使不得瞑號曰宿囚人苟  
 賒死何求不得陛下不諒試取告牒判無驗者使推其情有司必上下其手希合盛旨今舉朝稽息謂陛  
 下朝與為密夕與為讐一罹攝逮便與妻子決且周用仁昌秦用刑亡惟陛下察之后寤獄乃稍息而酷



吏獲寢以罪去天寶後至肅代間政類事叢姦臣作威渠儉宿狡頗用慘刻奮然不得如武后時敢搏擊殺戮矣嗚呼非吏敢酷時誘之為酷觀俊臣輩恤利放命內懷滔天又張湯鄧都之士豈云

索元禮胡人也天性殘忍初徐敬業兵興武后患之見大臣常切齒欲囚大獄去異己者元禮揣旨即上書言急變召對擢游擊將軍為推使即洛州牧院為制獄作鐵籠繫囚首加以楔至腦裂死又橫木關手足縛之號曬翅或紡囚梁上繩石於頭訊一囚窮根柢相牽聯至數百未能訖衣冠氣襪后數引見賞賜以張其威故論殺最多是時來俊臣周興踵而奮天下謂之來索薛懷義始貴而元禮養為假子故為后所信後以苛猛復受賊后厭眾望收下吏不服吏曰取公鐵籠來元禮服罪死獄中

來俊臣京兆萬年人父操博徒也與里人蔡本善本負博數十萬不能償操因納其妻先已娠而生俊臣冒其姓天資殘忍喜反覆不事產客和州為姦盜捕送獄獄中上變刺史東平王續按訊無狀杖之百天授中續以罪誅俊臣上書得召見自陳前上琅邪王沖反狀為續所抑武后以為諛擢索侍御史按詔獄數稱旨后陰縱其慘脅制羣臣前後夷千餘族生平有讎介皆入于死拜左臺御史中丞中外衆息至以目語俊臣乃引侯思止王弘義郭弘霸李仁敬康障衛遂忠等陰嘯不逞百輩使飛語誣讒公卿上急變每隨一事千里同時輒發契驗不差時號為羅織樣左署曰請付來俊臣或侯思止推具必得后信之詔

於麗景門別置獄敕俊臣等羅按事百不一貸弘義戲謂麗景門為例竟謂入者例皆盡也俊臣與其屬朱南山萬國俊作羅織經一篇具為支脉綱由咸有首末按以從事俊臣鞫囚不問輕重皆注醢于鼻掘地為牢或寢以匭溺或絕其糧囚至醫衣絮以食大抵非死終不得出每赦令下必先殺重囚乃宣詔又作大枷各為號一定百脉二喘不得三突地吼四著即承五失魂膽六實同反七反是實八死猪愁九求即死十求破家後以鐵為冒頭被枷者宛轉地上少選而絕凡囚至先布械于前示囚莫不震懼皆自誣服如意初誣告大臣狄仁傑任令暉李游道袁智宏崔神基盧獻等下獄俊臣願以夷誅大臣為功乃奏囚降制一問而服者同首法得減死仁傑等已論死待日而決稍挺之仁傑乃遣子持帛書稱枉后見愕然責謂俊臣對曰是囚不襯巾服何肯服罪后遣通事舍人周繼往視遠假仁傑襪帶立西廂繼懼俊臣東視唯唯去莫敢聞先是宰相樂思晦為俊臣夷其家有子九歲隸司農上變得召見言俊臣凶慘罔上不道若陛下假條反狀付之無大小皆如詔臣父死族夷不求生但惜陛下法為俊臣所弄耳后意解由是仁傑六族皆免又按大將軍張虔勗內侍范雲仙虔勗不堪枉訟於大理徐有功俊臣使衛士亂斫之雲仙自陳事先帝命截其舌皆即死人人脅息久之俊臣納賈人金為御史紀履忠所劾下獄當死后忠其上變得不誅免為民長壽中遷授殿中丞坐贓貶同州參軍事暴縱自如奪同僚妻又辱其母俄召為



合宮尉擢洛陽令進司僕少卿賜司農奴婢十人以官戶無面首聞吐蕃酋阿史那斛瑟羅有婢善歌舞令其黨告以謀反而求其婢諸蕃長數十人割耳擄面訟寃僅得解其連耀等有異謀吉頊以白俊臣殺數十族既欲擅發姦功卽中頊以法頊大懼求見后自直乃免俊臣誣司刑史樊噶以謀反誅其子訴闕下有司無敢治因自刎腹秋官侍郎劉如璿爲流涕俊臣奏與同惡如璿自訴年老而涕吏論以絞后爲宥死流漢州萬歲通天中上已與其黨集龍門題楮紳名於石抵而仆者先告抵李昭德不能中或以告昭德昭德謀繩其惡未發衛遂忠雖無行頗有辭辯素與俊臣善始王慶詵女適段簡而美俊臣矯詔強娶之它日會妻族酒酣遂忠詣之闕者不肯通遂忠直入媢罵俊臣恥妻見辱已命歐而縛于庭既乃釋之自此有隙妻亦慙自殺簡有妾美俊臣遣人示風旨簡懼以妾歸之俊臣知羣臣不敢斥已乃有異圖常自比石勒欲告皇嗣及廬陵王與南北衙謀反因得驍志遂忠發其謀初俊臣屢持摠諸武太平公主張昌宗等過咎后不發至是諸武怨共證其罪有詔斬於西市年四十七人皆相慶曰今得背著牀眠矣爭抉目臆肝醢其肉須臾盡以馬踐其骨無子餘家屬籍沒方俊臣用事託天官得選者二百餘員及敗有司自首后責之對曰臣亂陛下法身受戮忤俊臣覆臣家后赦其罪時有來子珣周興者皆萬年人承昌初子珣上書擢左臺監察御史無學術語言拙惡后倚以按獄多徇后旨故賜姓武字家臣既誣羅州

刺史劉行實弟兄謀反已誅掘夷先墓得遷游擊將軍常衣錦半臂自異俄流死愛州興少習法律自尙書史積遷秋官侍郎屢決制獄文深峭妄殺數千人武后奪政拜尙書左丞上疏請去唐宗正屬籍是時左史江融有美名興指融與徐敬業同謀斬于市臨刑請得召見興不許融叱曰吾死無狀不赦汝遂斬之尸奮而行刑者蹴之三仆三作天授中人告子珣與巨神勸謀反詔來俊臣鞠狀初興未知被告方對俊臣食俊臣曰囚多不服奈何興曰易耳內之大瓊熾炭周之何事不承俊臣曰善命取瓊且熾火徐謂興曰有詔按君請嘗之興駭汗叩頭服罪詔誅神勸而有興嶺表在道爲蠻人所殺神勸者行恭子爲左金吾衛將軍高宗崩后使害章懷太子於巴州歸罪神勸下遷疊州刺史俄復故官佐俊臣等爲慘獄遂見倚愛博州刺史琅邪王冲起兵拜神勸清平道大總管討之州人殺王素服出迎神勸盡殺之凡千餘族卽拜大將軍

侯思止雍州醴泉人貧爨不治業爲渤海高元禮奴詭狠無良恆州刺史裴貞管吏積怨教思止告舒王元名與貞謀反付周興鞠訊皆夷宗拜思止游擊將軍元禮懼引與同坐密教曰上不次用人如問君不識字宜對獬豸不學而能觸邪陛下用人安事識字無何后果問思止以對后大悅天授中遷左臺侍御史元禮又教上以君無宅必賜所沒逆人第宜辭曰臣疾逆臣不願居其地既而果假之以其教對后



益喜恩賞良渥思止本人奴言語俚下嘗按魏元忠讓曰亟承白司馬不爾受孟青洛陽有白司馬坂將軍有孟青棒即殺瑒邪王冲者元忠不承思止曳之元忠徐起曰我如乘驢而墜足絰鐙爲所曳者思止怒復曳之曰拒制使邪欲抵殊死元忠罵曰侯思止欲得我頭當鋸截之無抑我承反汝位御史當聽禮義而曰白司馬孟青是何物語非我孰教爾邪思止驚汗起謝曰幸蒙公教乃引登牀元忠徐就坐色不變獄稍擬思止音吐鄙而訛人效以爲笑侍御史霍獻可數嘲靳之思止怒以聞后責獻可我已用之何所謂獻可具奏鄙語后亦大笑來俊臣棄故妻逼娶太原王慶詵女思止亦請娶趙郡李自拙女事下宰相李昭德執不可曰俊臣往劫慶詵女已辱國此奴復爾邪榜殺之

王弘義冀州衡水人以飛變擢游擊將軍再遷左臺侍御史與來俊臣競慘刻暑月繫囚別爲狹室積糞施麩屑其上俄而死已自誣乃舍宅獄每移檄州縣所至震懼弘義輒詭曰我文檄如狼毒野葛矣始賤時求傍舍瓜不與乃騰文言圖有白兔縣爲集衆捕逐哇酥無遺內史李昭德曰昔聞蒼鷹獄吏今見白兔御史延載初俊臣貶弘義亦流瓊州自矯詔追還事覺侍御史胡元禮使嶺南次襄州按之弘義歸窮曰與公氣類持我何益元禮怒曰吾尉洛陽而子御史我今御史子乃囚何氣類爲杖殺之

郭弘霸舒州南安人仕爲監陵丞天授中由革命舉得召見自陳往討徐敬業臣誓抽其筋食其肉飲其

血絕其髓武后大悅授左臺監察御史時號四其御史再遷右臺侍御史大夫魏元忠病僚屬省候弘霸獨後入憂見顏問請視便液卽染指嘗驗疾輕重賀曰甘者病不瘳今味苦當愈喜甚元忠惡其媚暴語于朝嘗按芳州刺史李思微不勝楚毒死後屢見思微爲厲命家人禳解俄見思微從數十騎至曰汝枉陷我今取汝弘霸懼援刀自刎腹死頃而蛆腐是時大旱弘霸死而雨又洛陽橋久壞至是成都人喜后問羣臣外有佳事邪司勳郎中張元一曰比有三慶旱而雨洛陽橋成弘霸死

姚紹之湖州武康人初以鸞臺典儀奏遷監察御史中宗時武三思烝僭不軌王同皎張仲之祖延慶等謀殺之事覺捕送新開獄詔紹之與左臺大夫李承嘉按治欲初原盡其情會赦宰相李嶠等同訊執政畏禍蠲滅無所問囚呼曰宰相有附三思者嶠等數附承嘉耳咕喘紹之翻然不復顧卽引力士十餘曳囚至築其口反接送獄中謂仲之曰事不諧矣仲之因言三思反狀紹之怒擊折其臂囚呼夫曰吾雖死當訴爾於天因裂衫束之卒誣以謀反皆論族囚等已誅紹之意岸軒傲朝野注目擢左臺侍御史奉使江左過汴州廷辱錄事參軍魏傳弓久之傳弓爲監察御史而紹之坐贓詔傳弓卽按紹之謂揚州長史盧萬石曰我頃辱傳弓今來按我死矣獄具得贓五百萬法當死章后女弟救請故減死貶瓊山尉俄逃還京萬年尉捕擊折其足更授南陵令員外置開元中爲括州長史同正不得與州事死



周利貞者亡其系武后時調錢塘尉時禁捕魚州刺史飯蔬利貞忽饋佳魚刺史不受利貞曰此闕魚公何疑問其故答曰適見漁者禽不獲而有魚焉闕得之刺史大笑神龍初擢累侍御史諧附權彊五王等疾之出爲嘉州司馬武三思亂禁中五王謀誅之私語崔湜湜反以其計告三思五王貶湜勸速殺之以絕人望問誰可使以利貞對利貞湜內兄也表攝右臺侍御史馳嶺外矯殺敬暉桓彥範袁恕己還拜左臺御史中丞數爲仇人狙報幾不免先天初爲廣州都督湜陷劉幽求謫嶺表諷利貞殺之賴桂州都督王峻護而免利貞頗事剝削夷獠苦其殘虐皆起爲寇詔監察御史李全交按問得賊狀貶涪州刺史開元初詔利貞及滑州刺史裴談饒州刺史裴栖貞大理評事張思敬王承本華原令康暉侍御史封詢行判官張勝之劉暉楊允衛遂忠公孫琰廉州司馬鍾思廉皆酷吏宜終身勿齒尋復授珍州司馬明年授夷州刺史黃門侍郎張廷珪執奏曰陛下英斷聖明四海心服所謂英斷殄凶逆正朝廷是也所謂聖明辨忠邪信賞罰是也利貞宗武舊黨鉅僇敬自陛下登宸極布新政奪其班級遷之遐荒以允天下之望義士猶以罰輕爲望今錫以朱紱委以藩維是絀姦不必行也疏入遂寢未幾復授黔州都督加朝散大夫廷珪又表還制書曰利貞險薄小人附會三思傾危朝廷殺害功臣人神憤惋痛毒至今東都搜掩其家得金銀錦繡冒違制令當加重貶且久據朝廷捷給便佞見忠於君者猶仇讐然使之入朝則亂國

撫俗則傷人今擢典要藩繇六品遷三品何往日罰之而今日賞之玄宗乃止會廷珪罷起爲辰州長史朝集京師與魏州長史敬讓皆奏事讓暉之子也以父冤越次而奏曰周利貞希姦臣意枉殺先臣暉惟陛下正罰以謝天下左臺侍御史翟璋劾讓不待監引請行法玄宗曰訴父之枉不可不矜也朝廷之儀不可不肅也奪讓俸三月復貶利貞邕州長史未幾賜死梧州開元中又有洛陽尉王鈞河南丞嚴安之擢人畏不死視腫潰復笞之至血流乃喜

王旭者貞觀時侍中珪孫也神龍初爲兗州兵曹參軍時張易之誅而兄昌儀先貶乾封尉旭輒斬其首送東都遷并州錄事參軍長史周仁軌者皇后黨也玄宗平內難有詔誅之旭不待覆斬首齎還京師遷累左臺侍御史崔湜敗其婦翁盧崇道自嶺外逃歸東都爲嘗家上變詔旭訊覆旭廣捕親黨窮極慘楚當以重辟崇道及三子皆死門生故人並海內名士皆絀染流徙天下咨其冤旭與大夫李傑不平更相讐讐傑坐斥衢州刺史故旭益橫殘毒以逞官數遷常兼御史其爲人苛急少縱貸人莫敢與忤每治獄囚皆逆服製獄械率有名曰驢駒拔擻犢子縣等以怖下又縋髮以石脅承之時監察御史李嵩李全交皆嚴酷取名與旭埒京師號三豹嵩爲赤全交爲白旭爲黑里閩至相詛曰若違教值三豹宋王憲官屬紀希虬兄爲劍南令坐贓旭奉使臨訊見其妻美逼亂之因殺其夫而納贓數百萬希虬使奴爲臺備事



旭旭不知頗愛任之奴盡疏旭請求積數千以示希虬希虬泣訴于王王爲上聞詔劾治姦賊不賞貶龍州尉憲而死

吉溫故宰相頊從子也性陰詭果于事諂附貴官若子姓奉父兄天寶初爲新豐丞時太子文學薛巖得幸引溫入見玄宗目之曰是丞不長我不用罷之蕭冕爲河南尹御史遣溫到府有所訊詰乃并治冕不爲末撥右相李林甫善冕故得免冕入守京兆尹而溫方調萬年尉不辭人爲寒恐於是高力士間出就第冕多私謁溫乃先往與力士語執手歡甚將出冕通謁溫陽惶恐趨避力士止之語冕曰吾故人也冕揖乃去它日到冕府辭曰國家法不敢曠今而後洗心事云何冕待盡歡林甫與李適之張垆有隙適之領兵部而垆兄均爲侍郎林甫密遣吏適其銓史僞選六十餘人帝命京兆與御史雜治業日情不得冕使溫住訊溫分囚廷左右中取二重囚訊後舍楚械掠掠皆呻呼不勝曰公幸留死請如牒乃挺出諸史迎懼其酷及引前不訊皆服日中獄具林甫以爲能溫嘗曰若遇知己南山白額虎不足縛林甫久當國權震天下陰構大獄除不附己者先引溫居門下與錢塘羅希爽爲奔走椎鍛詔獄希爽文深虐其舅鴻臚少卿張博濟林甫壻也以姻家故自御史臺主簿再遷殿中侍御史初溫因中官納其出武敬一女爲盛王妃擢京兆士曹參軍林甫欲搖東宮左驍衛參軍柳勣影會發杜良娣家陰事溫按狀勣以誣誅

因引勣所善王曾王脩己盧靈徐徵悉逮捕論死尸積大理垣下家屬離竄初中書舍人梁涉道遇溫低帽障面溫怒乃諷勣引涉及嗣號王巨皆斥逐林甫惡楊慎矜王鉷飛書言圖讖事委溫以獄初慎矜客史敬忠與溫友善見溫襁褓時溫馳至東都逮捕楊氏親屬賓客取敬忠於汝州鐵鑊頸布蒙面未嘗正視陰遣吏脅曰慎矜獄具須君一辨君卽服罪可貸卽不服死不赦敬忠自索筆自款溫陽不見再三請乃與之對如溫所敕溫謝曰大人毋懼乃下拜慎矜以左證具欲自誣而讖不得御史盧鉉索其家挾讖以入於是慎矜兄弟皆賜死株連數十族是時溫與希爽相勗以虐號羅鉗吉網公卿見者莫敢耦語溫推事未窮而先計賊成奏乃引囚問震以烈威隨問輒承無敢遲鞭楚未收于壁而獄具矣林甫才其爲擢戶部郎中兼侍御史楊國忠安祿山方尊寵高力士居中用事溫皆媚附之兄事祿山嘗密論曰李右相雖厚待公然不肯引共政我見遇久亦不顯以官公若薦我爲宰相我處公要任則右相可擠矣祿山大悅亟稱溫才天子亦忘前語於是祿山領河東節度表溫自副并知節度營田管內採訪總留事拜鴈門太守知安邊鑄錢事以母喪解祿山表爲魏郡太守楊國忠當國引拜御史中丞兼京畿關內採訪處置使祿山敕吏設白紬帳于傳以候命慶緒親御而餞之溫銜其德故朝廷動靜輒報不淹宿而知天寶十三年祿山入朝領閑廐使薦溫武部侍郎以爲副國忠與祿山爭寵而溫昵祿山甚國忠不善也會河



東太守韋陟怨失職因溫以交祿山徧饋權近國忠遣人發其狀斥溫豐陽長史其屬員錫及陟皆坐貶明年溫仍坐受賕奪民馬貶端溪尉始林甫死希夷出爲始安太守張博濟韋陟韋誠奢李從一員錫皆還適始安溫既謫又依希夷以居國忠奏遣蔣沈臨按希夷擅稽罪人貶海康員外尉俄遣使者殺溫等五人溫之斥帝在華清宮詔從臣曰溫本酷吏子朕過用之故屢構大獄專威福今既斥公屬安矣溫死五月而祿山反即僞位求溫子方七歲授河南參軍以報之

崔器深州安平人曾祖恭禮尙館陶公主爲駙馬都尉貌豐偉飲酒至斗不亂器有吏幹然性陰刻樂禍天寶中舉明經爲萬年尉踰月擢監察御史中丞宋渾爲東畿採訪使引爲判官渾坐贓敗器亦廢後爲奉先令安祿山陷京師器受賊署守奉先頃之同羅背賊賊將安守忠張通儒亡去渭上義兵且數萬器大懼悉毀賊所署符敕募衆以應之渭上軍敗遂走靈武素善呂諲得爲御史中丞戶部侍郎肅宗至鳳翔兼禮儀使二京平爲三司使器草定儀典令王官陷賊者悉入含元廷中露首跣足撫膺頓首請罪令刀仗環之以示扈從羣臣器既殘忍希帝旨欲深文繩下乃建議陳希烈達奚珣等數百人皆抵死李峴執奏乃以大等定罪多所原貸後蕭華自賊中來因言王官重爲安慶緒驅脅至相州聞廣平王宣詔釋希烈等皆相顧愧悔及聞崔器議刑衆心復搖帝曰朕幾爲器所誤後爲吏部侍郎御史大夫上元元年

病垂叩頭若謝學狀家人問之曰達奚尹訴於我三日卒

毛若虛絳州太平人眉長覆目性殘鷲天寶末爲武功丞年六十餘肅宗還京師擢監察御史以國用大竭數請措天下財巧傳於法日月有獻漸見識用大抵覆囚先收家貲以定贓有不滿意攤索保伍姻近人懼其威無敢不如約乾元中鳳翔七坊士數剽州縣間殺人尉謝夷甫不勝怒榜殺之士妻訴李輔國輔國請御史孫鑿窮治獄久不具詔中丞崔伯陽與三司參訊未決乃使若虛按之卽歸罪夷甫伯陽爭甚力若虛慢拒伯陽怒若虛卽馳入白于帝詔姑出若虛泥訴曰臣出卽死因蔽若虛殿中而召伯陽伯陽至具劾若虛罔上帝主先語叱伯陽出并官屬悉貶嶺外李峴頗左右鑿等罷宰相於是若虛權焰震朝廷羣臣不舒息尋擢御史中丞上元元年以罪貶賓化尉死

敬羽河中寶鼎人貌寢甚性便辟善候人意補匡城尉朔方安思順表爲節度府屬肅宗初擢監察御史以言利幸京師平任遇寢顯凶態不能忍乃作巨枷號勳尾榆囚人多死又仆囚于地以門牡輾腹掘地實棘席蒙上瀕坎鞠囚不服則擠之坎人多濫死遷參御史中丞宗正卿鄭國公李遵坐賄下詔獄羽參按遵肥而羽瘠則引遵危坐小牀瘠且仆遵欲伸足羽曰公乃囚我延公坐何可慢遵仆三四徐受所言得贓至數百萬嗣岐王珍謀反詔羽窮劾乃悉召支黨環以榜具囚惶怖一昔獄成珍賜死左衛將軍賈



如玢等九人皆斬太子洗馬趙非熊等六七人斃杖下聞者毛豎先是胡人康謙以賈富楊國忠輔政納其金授安南都護領山南東路驛事吏疾之誣其通史朝義羽鞠之謙須長三尺明日脫盡膝腓皆碎人視之以爲鬼乃殺之羽與毛若虛裴昇畢曜同時爲御史皆暴忍時稱毛敬裴畢未幾昇曜流黔中寶應初羽斥道州刺史詔殺之羽聞使者至縵服而逃吏械之臨死袖中出牒數番乃吏相告訐咤曰不及推死矣治州者無宜寢

唐書卷二百九

唐書卷二百九考證

王旭傳貞觀時侍中珪孫也○舊書作曾祖珪



唐書卷一百九考證

Blank columns for the '考證' (Examination/Proof) section of the text.

唐書卷一百十

宋 端 明 殿 學 士 宋 祁 撰

列傳第一百三十五

藩鎮魏博

安史亂天下至肅宗大難略平君臣皆幸安故瓜分河北地付授叛將護養孽萌以成禍根亂人乘之遂擅署吏以賦稅自私不朝獻于廷效戰國肱臑相依以土地傳子孫脅百姓加錮其頸利怵逆汗遂使其人自視由羌狄然一寇死一賊生訖唐亡百餘年卒不為王土當其盛時蔡附齊連內裂河南地為合從以抗天子杜牧至以山東王不得不王霸不得不霸賊得之故天下不安又曰厥今天下何如哉干戈朽鉄鉞鈍含忍混貸照育逆孽殆為故常而執事大人曾不厯算周思以為宿謀方且鬼岸抑揚自以為廣大繁昌莫己若也嗚呼其不知乎其俟蹇頓顛傾而後為之支計乎且天下幾里列郡幾所自河以北蟠城數百角奔為寇伺吾人顛額天時不利則將與其朋伍駭亂吾民於掌股之上今者及吾之壯不圖擒取乃偷處恬逸以為後世子孫背脅疽根此復何也議者曰佩彊之徒吾以良將勁兵為衝策高位美爵充飽其腸安而不撓外而不拘猶豢虎狼而不拂其心則忿氣不萌此大厯貞元所以守邦也何必疾戰



焚煎吾民然後爲快也愚曰大厯貞元之間有城數十千百卒夫則朝廷貸以法故於是闕視大言自樹一家破制削法角爲尊奢天子不問有司不呵王侯通爵越祿受之覲聘不來几杖扶之逆息虜虜皇子嬪之地益廣兵益彊僭擬益甚侈心益昌土田名器分割大盡而賊夫貪心未及畔岸淫名越號走兵四略以飽其志趙魏燕齊同日而起梁蔡吳蜀躡而和之其餘混瀕軒轅欲相效者往往而是運遭孝武前莫後傑夕思朝議故能大者誅鉏小者惠來大抵生人油然多欲欲而不得則怒怒則爭亂隨之是以教管於家刑罰於國征伐於天下裁其欲而塞其爭也大厯貞元之間反此提區區之有而塞無涯之爭是以首尾指支幾不能相運掉也凡今者不知非此而反用以爲經將見爲盜者非止於河北而已嗚呼大厯貞元守邦之術永戒之哉魏博傳五世至田弘正入朝十年復亂更四姓傳十世有州七成德更二姓傳五世至王承元入朝明年王庭湊反傳六世有州四盧龍更三姓傳五世至劉總入朝六月朱克融反傳十二世有州九淄青傳五世而滅有州十二滄景傳三世至程權入朝十六年而李全略有之至其子同捷而滅有州四宣武傳四世而滅有州四彰義傳三世而滅有州三澤潞傳三世而滅有州五雖然迹其由來事有因藉地之輕重視人謀臧否歟今取擅興若世嗣者爲藩鎮傳若田弘正張孝忠等暴忠納誠以屏王室自如別傳云

田承嗣字承嗣平州盧龍人世事盧龍軍以豪俠聞隸安祿山麾下破奚契丹累功至武衛將軍祿山反與張忠志爲賊前驅陷河洛嵩大靈祿山按行諸屯至其營若無人已而擐甲列卒閱所籍不缺一人祿山異其能使守潁川郭子儀平東都承嗣以郡降俄而復叛安慶緒奔鄴承嗣自潁川來與蔡希德武令珣合兵六萬慶緒復振抗王師歲餘史思明亂承嗣又爲賊導及朝義敗與共保莫州僕固瑒追北承嗣急乃詐朝義使自求救幽州承嗣守莫因執賊妻息降于瑒厚以金帛反問瑒將士瑒慮下生變卽約降承嗣詐疾不出瑒欲馳入取之承嗣列千刀爲備瑒不得志承嗣重賂之以免乃與張忠志李懷仙薛嵩皆詣僕固懷恩謝願備行間朝廷以二賊繼亂州縣殘析數大赦凡爲賊誣誤一切不問當是時懷恩功高亦恐賊平則任不重因建白承嗣等分師河北賜鐵券誓不死拜承嗣莫州刺史三遷至貝博滄瀛等州節度使檢校太尉承嗣沈猜陰賊不習禮義既得志卽計戶口重賦斂厲兵繕甲使老弱耕壯者在軍不數年有衆十萬又擇趨秀彊力者萬人號牙兵自署置官吏國版稅入皆私有之又求兼宰相代宗以寇亂甫平多所含有因就加同中書門下平章事封鴈門郡王寵其軍曰天雄以魏州爲大都督府卽授長史詔子華尙承樂公主冀結其心而性著凶詭愈不遜大厯八年相衛薛嵩死弟華求假節牙將裴志清逐華等以衆歸承嗣而帝自用李承昭爲相州刺史未至承嗣使人誅吏士反陽言救實襲取之帝遣



使者論罷兵承嗣不奉詔遣將盧子期取洛州楊光朝取衛州齊刺史薛雄亂不從屠其家悉四州兵財以歸擅置守宰遣使者行磁相遺劉渾從之陰使從子悅諷諸將詣使者務面請承嗣爲帥使人不敢詰於是厚賞請己者帝乃下詔貶承嗣永州刺史許一子從悅及諸子皆逐惡地詔河東節度使薛兼訓成德李寶臣幽州朱滔昭義李承昭淄青李正己淮西李忠臣永平李勉汴宋田神玉等兵六萬犄角進若承嗣不承命聽在所討執以軍法從事其下霍榮國以磁降李正己攻拔德州李忠臣攻衛築偃月壘河上承嗣列將往往攜阻殺數十人乃定帝又遣御史大夫李涵督諸節度并力承嗣遣裴志清等攻冀州志清以兵附成德承嗣悉衆圍之爲寶臣所逐火輜重歸于貝計益窮不知所出遣其下郝光朝奉表請委身北闕下又使悅與盧子期將萬人攻磁州屯東山宣慰使韓朝彩等固守兼訓以萬騎屯西山成德幽州各遣兵救磁時承昭以神策射生繼進入河東壘諸軍進討數有功頗顧賞天子使中人多出御服良馬黃金萬計勞資使人供帳高會諸軍少懈而正己寶臣二軍會聚盟更相見會正己軍輒引去忠臣乃棄月壘濟河屯陽武承昭使成德幽州兵循東山襲子期軍自閉壁以驕賊子期分步騎萬人環承昭壁以兵四千乘高望磨而進河東將劉文英辛忠臣等決戰而成德幽州兵繞出子期後於是圍解更陣高原諸將與承昭夾攻大戰臨水賊敗屍旁午數里斬九千級馬千匹執子期及將士二千三百旗纛

器甲鼓角二十萬諸軍乘勝進距磁十里暮而會承昭舉燧朝彩出銳兵鼓譟薄魏營斬首五百悅驚率餘兵夜走盡棄旗幕鎧仗五千乘成德將王武俊以子期歸寶臣寶臣方攻洛州因以示城下降之復徇瀛州瀛州亦降得兵萬人粟二十萬石獻子期京師斬之天子遣中人勞寶臣不爲禮寶臣乃貳反攻朱滔與承嗣和承嗣與之滄州正己又請天子許承嗣入朝十一年帝遣諫議大夫杜亞持節至魏受其降許闕門還京師赦魏博所管與更始承嗣還邈不至其秋復略滑州敗李勉兵會李靈耀以汴州叛詔忠臣勉河陽馬燧合討靈耀求救於魏承嗣使悅將兵三萬赴之敗勉將杜如江正己將尹伯良死者殆半乘勝屯汴北郭與靈耀合燧忠臣逆擊破之悅脫身遁斬獲數萬靈耀東走欲歸承嗣爲如江所禽并魏將常準獻京師明年承嗣上書請罪有詔復官爵子弟皆仍故官復賜鐵券承嗣盜有貝博魏衛相磁洛七州而未嘗北面天子凡再興師會國威中奪窮而復縱故承嗣得肆姦無怖忌十四年死年七十五贈太保

悅蚤孤母更嫁平盧戍卒悅隨母轉側淄青聞承嗣得魏訪獲之年十三拜伏有禮承嗣異之委以號令裁處皆與承嗣意合及長剽悍善鬪冠軍中賊忍狙詐外飭行義輕財重施以鉤美譽人皆附之承嗣愛其才將死顧諸子弱乃命悅知節度事令諸子佐之帝因詔悅自中軍兵馬使府左司馬擢留後俄檢校



工部尚書爲節度使悅始招致賢才開館宇禮天下士外示恭順陰濟其姦帝晚年尤寬弛悅所奏請無不從德宗立不假借方鎮諸將稍惕息會黜陟使洪經綸至河北聞悅養士七萬輒下符罷其四萬歸田畝悅卽奉命因大集將士以好言激之曰而等籍軍中久仰繡纛養父母妻子今罷去何恃而生衆大哭悅乃悉出家貲給之各令還部自此魏人德悅及劉晏死藩帥益懼又傳言帝且東封泰山李勉遂城汴州而李正己懼率兵萬人屯曹州乃遣人說悅同叛悅因與梁崇義等阻兵連和以王侑扈許士則爲腹心邢曹俊孟希祐李長春符璘康愔爲爪牙建中二年鎮州李惟岳淄青李納求襲節度不許悅爲請不答遂合謀同叛會于邵令狐暉等表泚浮圖悅乃詐其軍曰有詔閩軍之老疾疲弱者繇是舉軍咨怨悅與納會濮陽納分兵佐悅會幽州朱滔等奉詔討惟岳悅乃遣孟希祐以兵五千助惟岳別遣康愔以兵八千攻邢州楊朝光以兵五千壁盧曠絕昭義餉道悅自將兵數萬繼進又使朝光攻臨洛將張任任固守食且盡賞賜不足乃帥愛女示衆曰庫廩竭矣願以此女代賞士感泣請死戰大破悅軍有詔河東馬燧河陽李元與昭義軍救任三節度次狗明二山間未進任急以紙爲風鷹高百餘丈過悅營上悅使善射者射之不能及燧營譟迎之得書言三日不解臨洛士且爲悅食燧乃自壺關鼓而東破盧曠戰雙岡禽賊大將盧子昌而殺朝光悅遁保洹水於是曹俊爲貝州刺史乃承嗣時舊將果而謀悅未得志召

問計安出對曰兵法十則攻今公以逆于順勢不敵也宜留兵萬人屯嚙口以遏西師則舉河北二十四州惟公所命今攻臨洛糧竭卒老不見其可悅所昵扈嘯孟希祐等皆豎短之故悅不聽其言燧等距悅軍三十里築壘相望悅與納合兵三萬陣洹水燧引神策將李晟夾攻悅大敗死傷二萬計引壯騎數十夜奔魏其將李長春拒關不內以須官軍而三帥頓不進明日悅得入殺長春持佩刀立軍門流涕曰悅藉伯父餘業與君等同休戚今敗亡及此不敢圖全然悅久稽天誅者特以淄青恆冀子弟不得承襲既弗能報乃至用兵使士民塗炭悅正緣母老不能自到願公等斬悅首以取富貴無庸俱死乃自投于地衆憐皆抱持之曰今士馬之衆尙可一戰事脫不濟死生以之悅收淚曰諸公不以悅喪敗誓同存亡縱身先地下敢忘厚意乎乃斷髮爲誓將士亦斷髮約爲兄弟乃率富民大家財及府庫所有大行賜與而李再春及其子瑤以博州降悅從兄昂以洛州降燧等受之悅皆族昂等家悅自視兵械乏衆軍耗懼不知所出復召曹俊與之謀曹俊爲整軍完壘以振士氣羣心復堅後十餘日燧等始進薄城下未幾王武俊殺惟岳而深州降朱滔滔分兵守之天子授武俊恆州刺史以康日知爲深趙二州觀察使武俊恨賞薄滔怨不得深州悅知二將可間乃僂路使王侑許士則說滔曰司徒奉詔討賊不十日拔東鹿下深州惟岳勢感故王大夫能得逆首聞出幽州日有詔破惟岳得其地卽隸麾下今乃以深州與康日知是



朝廷不信於公也且上英武獨斷有秦皇漢武風將誅豪桀掃除河朔不使父子相襲又功臣劉晏等皆旋踵破滅殺梁崇義誅其口三百餘血丹漢江今日破魏則取燕趙如牽轅下馬耳夫魏博全則燕趙安鄴州尙書必以死報德且合從連衡救災卹患不朽之業也尙書願上貝州以廣湯沐使侑等奉簿最孔目司徒朝至魏則夕入貝惟孰計之滔心素欲得貝卽大喜使侑先還告師期先是詔武俊出恆冀粟三十萬賜滔使還幽州以突騎五百助燧軍武俊懼悅破將起師北伐不肯歸粟馬滔因使王郢說武俊曰天子以君善戰天下無前故分散粟馬以弱君軍今若舉魏博則王師北向漳滏勢危誠能連營南旃解田悅於倒縣大夫之利也豈特粟不出害馬不離廐又有排危之義聲滿天下大夫親斷逆首血纈衣袖日知不出趙城何功於國而坐兼二州河北士以不得深州爲大夫恥武俊旣得深亦喜卽日使使報滔於是滔率兵二萬屯靈晉武俊以兵萬五千會之悅恃救至使康愔督兵與王師戰御河上大敗棄甲走城悅怒閉門不<sub>二</sub>踏籍死塹中者甚衆其夏滔武俊軍至悅具牛酒迎犒燧等營魏河西武俊滔悅壁河東起樓櫓營中兩軍相持自秋迄冬燧遣晟以兵三千自邢趙與張孝忠合攻涿莫二州以絕幽薊路悅重德滔欲推爲盟主而臣之滔不敢當乃吏議如七國故事悅國號魏僭稱魏王以府爲大名府署子爲府留後以扈嶠爲留守許士則爲司武曾穆司文裴抗司禮封演司刑並爲侍郎劉士素爲內史舍人張

瑜孫光佐爲給事中邢曹俊孟希祐爲左右僕射田晁高緬爲征西節度使蔡濟薛有倫爲虎牙將軍高崇節知軍前兵馬夏侯頴爲兵馬使晁以兵數千助李納守鄆明年夏滔屯河間留大將馬寔以兵萬人戍魏會朱泚亂帝出奉天燧還太原武俊等皆罷悅餞之厚遺武俊寔官屬皆有贈興元元年滔自將兵欲南度河助泚使王郢見悅計事曰頃大王在重圍孤與趙刻日赴王難以全魏貝今秦帝已據關中孤以步騎十萬與回紇趨東都相應接王能從孤濟河合勢以取大梁孤得西收鞏陝與秦兵會天下可定也則王與趙王永無南慮爲唇齒之國幸速計之是時悅聞天子已赦罪復官爵心不欲行重違絕滔陽遣薛有倫報滔如約滔大喜復使舍人李瑄申固所言悅猶豫許士則諫曰冀王勇決權略一世之雄也殺懷仙屠希彩誅兒使如京師而奪之權有恩者誅同謀者覆彼心腹渠可量哉今大王之親不加泚勇不加懷仙希彩也而念恩不已拘擥匹夫義出且見禽彼得魏博北聯幽薊南入梁鄭而與泚合其理然也大王不如僞許出迎遣州縣具牛酒至則以事自解不可顧恩取禍也悅然之先是武俊陰約悅背滔使相望及聞滔要悅西使田秀馳說悅曰聞大王欲從滔度河爲泚犄角非也方泚未盜京師時滔爲列國且自高如得東都與泚連禍兵多勢張返制于豎子乎今日天子復官赦罪乃王臣豈捨天子而北面滔泚耶願大王閉壘不出武俊須昭義軍出爲王討之悅因秀還具道其謀而遣曾穆報滔滔喜自河間



悉師而南踰貝州次清河使人報悅悅不至進屯永濟使王郅等督之曰王約出館陶與大王會乃濟河  
悅良久曰始約從王今舉軍持悅曰魏比因侵掠供饑屈竭以悅日拊循猶恐人且攜間一日去城邑朝  
出夕變且何歸不然悅不敢背約今遣孟希祐悉兵五千助王因使其屬裴抗盧南史報命滔怒罵曰逆  
虜前日求救許我貝州我不取辱我為天子我與同為王教我遠來而不出是賊不擊尙何誅乃囚抗等  
使馬寔取數縣已而釋抗還之悅兵不敢出遂圍貝州滔取武城通德棣供軍饋盡囚諸縣官吏唯清陽  
不下滔圍之寔拔清平殺五百人俘男女貲財去於是李抱真武俊約出兵救魏會有詔拜悅檢校尙書  
右僕射封濟陽郡王而給事中孔巢父持節宣勞始悅阻兵凡四年狂悻少謀亟戰數北死者什八士苦  
之且厭兵既巢父至莫不欣然悅與巢父張飲門階皆徹衛至夜分從弟緒與族人私語曰僕射妄起兵  
幾赤吾族以金帛厚天下而不至兄弟或諫止之緒怒殺諫者乃與左右踰垣入悅方醉寢酣緒挺刃升  
堂二弟諫止緒斬之因手刺悅并殺其母妻悅死年三十四比明以悅命召許士則蔡濟計事至則殺之  
劉忠信者悅常使防督緒直寢門緒呼曰忠信刺僕射與扈謁反衆執之語曰無之支已殊絕  
緒字緒承嗣第六子悅待諸弟無所間使緒主牙軍而凶險多過常管最之悅於飲食衣服儉嗇有節緒  
常苦不足頗怨望故作難悅既死懼衆不附以其徒數百將出奔邢曹俊率衆追還緒乃下令軍中曰我

先王子能立我者賞衆乃共推緒爲留後歸罪扈謁斬其首以徇復殺悅親信薛有倫等數十人因巢父  
遣使者聽命天子滔聞悅死以兵五千合寔軍進攻魏州寔瀕王莽河壁南距河東抵博州殺略甚衆使  
人入魏招緒降緒新寡而寔圍且急乃遣使以好言見滔滔許與盟曾穆勸緒絕滔而緒部分亦定乃乘  
城戰武俊抱真各修好如悅時詔卽拜緒節度使寔圍魏凡三月滔敗走貞元元年以嘉誠公主降緒拜  
駙馬都尉李希烈平以功賜一子八品官緒猜忌殺兄弟姊妹凡數人兄朝仕李納爲齊州刺史或言納  
將入之魏以代緒緒厚賂納且召朝朝以死請不行乃送之京師過滑緒將篡取之賈耽以兵援接乃免  
累遷檢校尙書左僕射常山郡王又徙王鴈門實封五百戶加同中書門下平章事暴疾死年三十三贈  
司空少子季安嗣

季安字夔母微賤公主命爲己子寵冠諸兄數歲爲左衛曹參軍節度副使緒死時年十五置喪觀變  
軍中推爲留後因授節度使除喪加檢校尙書右僕射進位檢校司空俄同中書門下平章事季安畏主  
之嚴頗循禮法及主薨始自恣擊鞠從禽酣嗜欲軍中事率意輕重官屬進諫皆不納會詔中尉吐突承  
瓚以神策兵討王承宗季安謀曰王師不跨河二十五年今越魏伐趙趙誠虜魏亦虜矣奈何或請以五  
千騎決除君憂季安曰善沮軍者斬時幽州劉濟將譚忠適使魏聞之入見季安曰往年王師取蜀取吳



算不失一是宰相謀也今伐趙不使者臣宿將而付中臣不起天下甲而出秦甲君知誰爲之謀此上自爲謀以奪服臣下若師未叩趙而先碎於魏是上之謀不及下且能不恥既恥且怒必任智盡仗猛將再舉涉河鑿前之敗必不越魏誅趙校罪輕重必先趙後魏是上不上下不下當魏而來也季安曰計安出忠曰王師入魏君厚犒之悉甲伐趙而陰遣趙書曰魏若伐趙爲賣友魏若與趙爲反君賣友反君魏不忍受執事能弛陣鄣遣一城魏得持之獻捷天子以爲符此使魏北得以奉趙西得以爲臣不世之利也趙不拒君則魏安矣季安然之遣大將率兵會王師伐承宗糧餉自辦取堂陽以報加太子太保有臣絳者父時賓佐與同府侯臧爭權季安怒斥爲下縣尉俄召還先坎道左既至生瘞之忍酷無忌憚大抵如此死年三十二贈太尉妻元誼女召諸將立其子懷諫最幼不能事政決於私奴蔣士則數易置諸將軍中怒取田興爲留後所謂田弘正者以懷諫第殺士則等十餘人季安既葬送懷諫京師授右監門衛將軍寵錫蕃渥緒弟縉華顯于朝縉字雲長貞元十年入朝授左驍衛將軍封扶風郡公元和中拜夏綬銀節度使始開元時置宥州扼寇路久而廢縉復城之王師伐蔡縉上蒙它牛馬助軍吐蕃寇豐州縉設伏邀其歸俘斬過當入爲左衛大將軍李聽代之聽劾縉盜沒軍糧四萬斛驅取羌人羊馬故吐蕃得乘隙貶衡王傅俄而吐蕃又攻鹽州貶房州司馬長慶初終左領軍衛將軍華太常少卿尙承樂新都二

公主田氏自承嗣至懷諫四世凡四十九年

史憲誠其先奚也內徙靈武爲建康人三世署魏博將祖及父爵皆爲王憲誠始以趨敢從父軍田弘正討李師道將先鋒兵四千濟河拔城柵師踵進乘勝逐北傳鄆堞師道傳首以功兼御史中丞長慶二年田布之自殺也軍亂且囂時憲誠爲中軍兵馬使頗言河朔舊事以搖其衆衆乃逼還府擅總軍務穆宗以朱克融王廷湊方盜幽鎮未有以制卽以節度使授之憲誠外詭王命而陰結幽鎮依以自固時李宥方亂私與交通數助請旄節城馬頭具舟黎陽示將濟師者會天子遣司門郎中韋文恪宣慰憲誠見使者禮倨言辭悖慢俄聞斬宥更恭謹謂文恪曰我本奚如狗也唯知識主雖日加箠不忍離其譎猶類此進檢校司空與李全略爲婚家太和中其子同捷反潛以糧餉資之文宗申約使者相望因進同中書門下平章事憲誠使大將至京師偵事作謾言自大宰相韋處厚折其詐遣去憲誠懼出兵從王師討之復遣大將丁志沼率師二萬攻德州時王廷湊援同捷陰誘志沼以利志沼反屯永濟兵銳甚諸鎮共禦之憲誠告急天子詔義武李聽進討於是志沼與廷湊合兵劫貝州爲聽所敗奔廷湊滄景平憲誠不自安請納地進檢校司徒兼侍中徙河中封千乘郡公以李聽代初憲誠將以族行懼魏軍之留問策於弟憲忠憲忠教分相衛請置帥因以弱魏復請詔聽引軍聲圖志沼而假道清河帝從之憲誠因欲倚聽公去



魏及聽次清河魏人驚憲忠曰彼假道取賊吾軍無負朝廷何懼爲乃稍安然魏素聚兵清河聽至悉出其甲將入魏魏軍聞之懼明日盡甲而出聽按軍館陶不進衆謂憲誠實己曰給我以沽恩耶夜攻殺之并監軍史良佐推何進滔爲帥以請詔贈憲誠太尉實太和三年憲誠起凡七年死

何進滔靈武人世爲本軍校少客魏委質軍中事田弘正弘正攻王承宗夜以兵壓鎮州承宗使健將以鐵冒面引精騎千餘馳魏壁進滔率猛士逐之幾獲鎮人大懼從討李師道以功兼侍御史憲誠死軍中傳諱曰得何公事之軍安矣進滔下令曰公等既迫我當聽吾令衆唯唯孰殺前使及監軍者疏出之凡斬九十餘人釋脅從者素服臨哭將吏皆入弔詔拜留後俄進授節度使居魏十餘年民安之進累檢校司徒同中書門下平章事開成五年死贈太傅諡曰定子重順襲武宗詔河陽李執方滄州劉約諭朝京師或割地自效不聽命時帝新卽位重起兵乃授福王綰節度大使以重順自副賜名弘敬帝討劉稹加東面招討使弘敬倚稹相脅齒無深入意詔因稱其事母孝在軍久宜亟戰弘敬亦自如及王宰踰乾河攻澤州天子慮稹起山東兵命弘敬掎角塞其道不奉詔王元逵克邢州攻上黨弘敬不得已乃出師未幾宰統陳許兵假道收磁州弘敬懼乃進戰拔平恩詔檢校尚書左僕射澤潞平加同中書門下平章事懿宗初兼中書令封楚國公咸通七年死贈太師子全暉襲明年拜節度使平龐勛以功遷檢校司空

中書門下平章事母喪納所賜節願行喪詔不許全暉年少好殺戮下有小罪鮮縱貫人人危懼後軍中相傳腹減糧帛衆遂叛全暉單騎遁衆推韓君雄以總軍事而殺全暉實咸通十一年詔贈太保自進滔至全暉凡三世四十二年懿宗更以普王爲大使擢君雄留後君雄魏州人不五月進副大使三遷檢校司空僖宗卽位進同中書門下平章事賜名允中死年六十一贈太尉子簡襲留後俄授節度使進累檢校太尉同中書門下平章事封魏郡王帝在蜀天下亂簡恃彊完欲拓地覬望非常時諸葛爽爲黃巢守河陽簡攻之爽走卽戍以兵北略邢洛而歸東攻鄆鄆將曹存實出戰敗死其將朱宣率衆以守久不下爽乘其隙復取河陽簡還攻之爽迎擊新鄉簡大敗樂彥禎以一軍先還簡奔歸直發背死彥禎代之再世凡十二年

彥禎者亦魏人簡時歷博州刺史下河陽有功遷澶州魏人立之詔檢校工部尚書留後進節度使累加檢校尚書左僕射同中書門下平章事彥禎喜儒術引公乘億李山甫皆在幕府嗣襄王熿之亂彥禎使山甫往見鎮州王鎔欲合幽邢滄諸鎮同盟拒賊鎔厚謝卒不克彥禎見王室微頗驕滿不軌大興其衆城魏周八十里一月畢人怨其殘子從訓資凶悖劫王鐸取其家魏人不直又聚亡命五百人號子將出入臥內軍中藉藉惡之從訓懼易服奔近縣彥禎卽以爲六州指揮使相州刺史鞏兵械泉布跡接於



道軍中益貳彥禎常夢解佩帶履而行既寤曰此神告我下將有背乎已而軍亂果囚彥禎迫爲桑門尋殺之推大將趙文珣總留後從訓求救於朱全忠全忠爲起師次內黃從訓自相州以軍三萬傅城文珣不敢出衆懼殺之更推羅弘信帥軍弘信出戰從訓敗哀餘衆壁洹水弘信遣將程公佐擊斬之梟首軍門實文德元年彥禎起凡七年

羅弘信字德孚魏州貴鄉人善騎射狀貌雄偉爲裨將主馬牧魏有巫告弘信曰白頭老人使謝君君當有是地弘信曰神欲危我耶文珣死衆曰孰願主吾軍者弘信輒曰神命我矣衆環視以爲宜遂立之詔擢知留後再遷節度使加檢校司空中書門下平章事豫章郡公朱全忠討黃巢餉粟三萬斛馬二百匹秦宗權亂復詔弘信以粟二萬斛助軍未輸檢校工部尙書雷鄴來責粟弘信素脅于牙軍擅殺鄴全忠以檄譙讓弘信不敢報大順初全忠討太原李克用遣將趙昌嗣見弘信假糧馬又議屯邢洛假道相衛弘信不納全忠使丁會庸師古葛從周霍存等引萬騎度河弘信壁內黃凡五戰皆敗禽大將馬武等乃厚幣求和方全忠圖河北欲結納弘信乃還兵全忠攻兗鄆朱宣求援於克用遣李存信率兵救之請道屯莘其下侵魏芻牧弘信不平克用欲合鎮定兵營河曲搃魏滑路弘信馳告全忠請禁游舸絕往來久之魏人不至全忠疑其給自將至滑州弘信來告曰魏人未動者正欲緩圖之全忠遂屯曹太原將李

瑋救宣復壁莘弘信厭其暴而瑋溝壘自固全忠遣使謂曰晉人志并河朔師還爲公憂之弘信乃攻瑋告全忠師期全忠將趨滑爲援次封丘而弘信已破瑋克用怒以兵掠魏博全忠將侯言屯洹水克用兵數求戰言不敢出全忠以葛從周代將從周爲閻寶每克用兵至輒出精卒薄戰必捷克用輸洹西北挑戰從周大破之禽其子落落乃引去然侵魏不已大戰白龍潭弘信敗克用追薄魏門而還弘信乃乞師全忠全忠遣將壁洹水救魏克用游兵剽相魏民死十九弘信不堪其偏光化元年如全忠告亟全忠復遣葛從周將兵追躡拔洛州執其刺史邢行恭復攻邢馬師素自拔走遂圍磁州袁奉韜自殺不五日取三州斬首二萬級禽其將百餘人自是克用兵不出始全忠亟討兗鄆懼弘信貳故歲時賂遺厚弘信每有饋答全忠引其使北面拜受兄事之弘信以爲厚已故推心焉進累檢校太師守侍中徙臨清郡王光化元年死年六十三贈太師追封北平王諡曰莊肅子紹威襲

紹威字端己少有英氣性精悍吏事明辨既留後昭宗卽詔嗣父節度加累檢校太尉號忠勤宣力致聖功臣幽州劉仁恭引兵攻鎮冀遂掠魏紹威告急於全忠全忠自將與仁恭戰內黃日中大破之斬首三萬級葛從周方守邢亦敗其衆於魏縣仁恭以衆十萬陷貝州全忠使李思安屯內黃從周悉軍入魏仁恭攻魏從周以五百騎出關謂門者曰前有疆敵不可易命閻扉士死戰執仁恭將二人仁恭使別將



攻內黃爲思安所敗從周乘勝破八壁追北至臨清仁恭乃還滄州與李克用圖魏紹威與全忠連兵伐滄州從周攻拔德州進薄浮陽仁恭以兵至監軍蔣玄暉請須其入壁食盡可取從周曰兵在機機在上將豈監軍所知逆戰老鷓堤破之斬百五萬獲其將百餘人又戰唐昌范橋六遇輒勝仁恭約和乃還紹威德全忠故奉事愈固全忠遷帝洛陽命諸鎮治宮闕而紹威營太廟加侍中封鄴王魏牙軍起田承嗣募軍中子弟爲之父子世襲姻黨盤牙悍驕不顧法令憲誠等皆所立有不懼輒害之無噍類厚給廩姑息不能制時語曰長安天子魏府牙軍謂其勢彊也紹威懲曩禍雖外示優假而內不堪俄而小校李公佺作亂不克奔滄州紹威乃決策屠翦遣楊利言與全忠謀全忠乃遣符道昭將兵合魏軍二萬攻滄州求公佺又遣李忠安助戰魏軍不之疑紹威子全忠婿也會女卒使馬嗣勳來助葬選長直千人納盟器實甲以入全忠自滑濟河聲言督滄景行營紹威欲出迎假銳兵以入軍中勸毋出而止紹威遣人潛入庫斷絃解甲注夜將奴客數百與嗣勳攻之軍趨庫得兵不可戰因夷滅凡八千族闕市爲空平明全忠亦至聞事定馳入軍魏兵在行者聞變於是史仁遇保高唐李重霸屯宗縣分據貝澶衛等六州仁遇自稱魏博留後全忠解滄州兵以攻高唐仁遇引衆走爲游騎所獲支解之進拔博澶二州李重霸走俄斬其首相衛皆降紹威雖除其偏然勢弱爲全忠牽制比州刺史矣內悒悒悔恨全忠兵在滄州紹威主饋

輓自鄴至長蘆五百里不絕于道全忠還紹威建元帥行府極土木壯麗全忠大悅紹威問說曰邠岐太原皆狂謫以復唐室爲言王宜自取神器專天下之望全忠歸乃受禪紹威多聚書至萬卷江東羅隱工爲詩紹威厚幣結之通譜系昭穆因目己所爲詩爲偷江東集云  
贊曰田承嗣幾禽矣李寶臣怒承情而釋魏建中之際三將軍持銳躡血功無成者四叛連勢兵結難作天子不能守宗廟傳及弘正去汙入朝數年復亂唐終不得魏與夫豎刁亂齊孰爲輕重



唐書卷二百十

唐書卷二百十考證

田承嗣傳將兵三萬赴之○舊書作五千沈炳震本作六萬

何進滔傳封魏郡王○舊書作昌黎郡王

羅弘信傳子紹威襲○舊書作威蓋石晉諱紹字也



唐書卷二百十考證

唐書卷二百十一

宋 端 明 殿 學 士 宋 祁 撰

列傳第一百三十六

藩鎮鎮冀

李寶臣字為輔本范陽內屬奚也善騎射范陽將張鎮高裔為假子故冒其姓名忠志為盧龍府果毅常  
 胡虜陰山追騎及射六人盡殪乃還為安祿山射生從入朝留為射生子弟出入禁中祿山反遁歸更為  
 祿山假子使將驍騎十八人劫太原尹楊光翹挾以出追兵萬餘不敢逼又督精甲軍士門以扼井陘事  
 安慶緒為恆州刺史九節度師圍相州也忠志懼歸命于朝肅宗即授故官封密雲郡公史思明度河忠  
 志復叛勒兵三萬固守賊將辛萬寶屯恆州相犄角思明死忠志不肯事朝義使裨將王武俊殺萬寶挈  
 恆趙深定易五州以獻雍王東討開土門納王師助攻莫州朝義平擢禮部尚書封趙國公名其軍曰成  
 德即拜節度使賜鐵券許不死它賚與不貲賜姓及名於是遂有恆定易趙深冀六州地馬五千步卒五  
 萬財用豐衍益招來亡命雄冠山東與薛嵩田承嗣李正己梁崇義相姻嫁急熱為表裏先是天寶中玄  
 宗治金自為象州率置祠更賊亂悉毀以為賞而恆獨存故見寵異加賜寶封始寶臣與正己素為承嗣



所易其弟寶正承嗣婿也往依魏與承嗣子維擊毬馬駭觸維死承嗣怒囚之以告寶臣寶臣謝教不謹進杖欲使示責而承嗣遂鞭殺之由是交惡乃與正己共劾承嗣可討狀代宗欲其自相圖則勢難易制卽詔寶臣與朱滔及太原兵攻其北正己與滑毫河陽江淮兵攻其南師會棗壘椎牛饗軍寶臣厚賜士而正己頗殺軍怨望正己懼有變卽引去惟滔寶臣攻滄州歷年未下擊宗城殘之斬二千級承嗣弟廷琳方守貝州遣高嵩巖將兵三千戍宗城寶臣使張孝忠攻破之斬嵩巖逸所執將四十餘人會王武俊執賊大將盧子期遂降洛瀛當是時河南諸將敗田悅於陳留正己取德州欲頗窮討承嗣懼乃甘言給正己正己止屯諸軍亦莫敢進於是天子遣中人馬希倩勞寶臣寶臣歸使者百繅使者悉抵諸道寶臣顧左右愧甚諸將已休獨武俊佩刀立庑下語之故武俊計曰趙兵有功尙爾使賊平天子幅紙召置京師一匹夫耳曰奈何對曰養魏以爲資上策也寶臣曰趙魏有釁何從而可對曰勢同患均轉寇讎爲父子歘唾問耳朱滔屯滄州請禽送魏可以取信寶臣然之先是承嗣知寶臣少長范陽心常欲得之乃勒石若讖者瘞之境教望氣者云有玉氣寶臣掘得之文曰二帝同功勢萬全將田作伴入幽燕帝謂寶臣與正己爲二而陰使客說曰公與滔共攻滄州卽有功利歸天子公于何賴誠能赦承嗣罪請奉滄州入諸趙願取范陽以報公以騎前驅承嗣以步卒從此萬全勢也寶臣喜得滄州又見語與讖會遂陰交承

嗣而圖幽州承嗣陳兵出次以自驗寶臣謬謂滔使曰吾聞朱公貌若神願繪而觀可乎滔卽圖以示之寶臣置圖射堂大會諸將熟視曰信神人也密選精卒二千夜馳三百里欲劫滔戒曰取彼貌如射堂者時二軍不相虞忽聞變滔大駭戰瓦橋敗衣佗服得脫禽類滔者以歸承嗣承嗣知釁成遣軍入堡使人謝寶臣曰河內方有警未暇從公石讖吾戲爲耳寶臣慙而還俄進封隴西郡王又拜同中書門下平章事德宗立拜司空寶臣晚節尤猜忌自顧子惟岳且暗弱恐下不服卽殺骨骸將辛忠義盧倬許崇俊張南容張彭老等二十餘人籍入其貲衆其攜貳寶臣既貯異志引妖人作讖兆爲丹書靈芝朱草齋別室築壇置銀盤金匱玉犛猥曰內產甘露神酒刻玉印告其下曰天瑞自至衆莫敢辨者妖人復言當有五印自天下海內不戰而定寶臣大悅厚資金帛旣而畏事露且誅詐曰公飲甘露液可與天神接密寶董于液寶臣已飲卽瘖三日死年六十四惟岳悉誅殺妖人時建中二年也遺表請以惟岳領軍詔書執政諉家事歸節於朝詔贈太傅

惟岳少爲行軍司馬恆州刺史寶臣死軍中推爲留後求襲父位帝不許趣護喪還京師以張孝忠代之田悅爲請不聽遂與悅李正己謀拒命府小史胡震私人王他奴等專畫反討府屬邵真泣曰先公位將相恩甚厚而大夫違命縲絏中愚固或爲魏近且與國不可遽絕絕之速禍請厚禮遣其使徐更圖之齊



遣而交疏不如械使者送京師且請致討上嘉大夫忠所請宜許惟岳寤使真作奏震與將吏議不可惟岳又從之其舅谷從政豪俊士也切諫不納於是張孝忠以易州歸天子天子詔朱滔與孝忠合兵討惟岳盡赦吏士購惟岳首有賞惟岳與滔戰東鹿大奔遂圍深州明年正月率兵萬餘使王武俊爭東鹿田悅亦遣孟祐來助武俊以精兵先陷陣師卻滔纒帛為狻猊使壯士百人蒙以譟趨惟岳軍馬駭軍亂因大敗火其營去於是深州日急悅亦嬰城矣惟岳懼召真議遣使詣河東馬燧令其弟惟簡見帝斬大將謝舉以兵屬鄆誅身朝京師孟祐知其謀走告悅悅使扈來讓曰敝邑暴兵本為君索命節豈為叛逆耶雖見破於馬燧而感激士大夫乘城拒守以為後圖今君信邵真譏間欲歸悅之罪以自滿蕩何負而然不則遣祐還軍無遺王師禽若能誅真以徇請事公如初惟岳懦不能決畢華見曰大夫與魏盟未久魏雖被圍彼多積蓄未可下齊兵勁地廣裾帶山河所謂東秦險固之國與相持維足以抗天下夫背義不祥輕慮生禍且孟祐驍將王武俊善戰前日逐滔滔僅免今合兩將破滔必矣惟審圖之惟岳見深圖未解畏祐還乃斬真以謝悅明日復戰又大敗而康日知舉趙州聽命惟岳益困乃付牙將衛常靈兵五千而俾王武俊騎八百攻日知武俊才雄素為惟岳忌及師行謂常靈曰大夫信譏吾朝不圖晏是行勝與否吾不復入恆矣將以身託定州張公安能持頸就刀乎常靈與副李獻誠曰君不聞詔書乎斬大夫

首以其官界之觀大夫勢終為滔滅若倒戈還府事實易圖有不如捷張公可歸也武俊然之惟岳使要藉官謝避至武俊壁議事武俊與謀使內應至期啟城門武俊入殺人廷中無亢者乃傳令曰大夫叛命今且取之敢拒者族士不敢動武俊使裨校任越率惟岳出給之戟門下并殺鄆誅他奴等數十人使子士真傳首京師帝盡赦其府將士給部中租役三年真始事實臣掌文記武俊表其忠贈戶部尚書其息呂擢冀州長史常靈在武俊時用事為內史監其後謀亂誅惟岳異母兄惟誠尚儒術謙裕寶臣愛之使決事以惟岳正嫡固讓不肯當其妹妻李納故寶臣請惟誠復故姓而仕諸鄆為納營田副使四為州刺史初惟岳友弟惟簡以家僮票士百餘奉母鄭奔京師帝拘于客省及出奉天惟簡將赴難謀於鄭鄭曰爾父立功河朔位尊相身未嘗至京師兄死於人手爾入朝未識天子不能效忠吾不子汝矣督其行曰而能死王事吾不朽矣乃斬周出道更七戰得及行在帝見厚撫之拜太子諭德討賊有功帝徙山南惟簡以三十騎從夜失道馳至盤屋西中人語問天子所在密語曰上在此帝見之流涕執其手曰爾有母乃能從朕耶對曰臣誓以死比明北方有塵帝憂惟簡登高曰渾瑊以騎來瑊至遂決趨興元惟簡前導及帝還封武安郡王號元從功臣圖形凌煙閣賜鐵券憲宗時為左金吾衛大將軍長史萬國俊奪興平民田吏畏不敢治至是訴於惟簡即日廢國俊以地與民出為節節度使市耕牛佃具給農歲



增銀數十萬畝卒年五十五贈尚書右僕射子元本輕薄無行長慶末與薛暉私侍襄陽公主事公主幽禁中元本以功臣子貸死流嶺南弟銖好學多識有儒者風

王武俊字元英本出契丹怒皆部父路俱開元中與饒樂府都督李詩等五千帳求襲冠帶入居瀋武俊甫十五善騎射與張孝忠齊名隸李寶臣帳下爲裨將寶應初王師入井陘武俊謂寶臣曰以寡敵衆曲遇直戰則離守則潰銳師遠鬪庸可禦乎寶臣遂以恆定等五州自歸共平餘賊武俊謀也奏兼御史中丞封維川郡王其子士真亦沈悍有斷寶臣倚愛出入帳中以女妻之寶臣以疑殺許崇俊等士真密結左右故武俊免於難惟岳拒命或言武俊有他志武俊知之出入導從纒一二未嘗接賓客惟岳雖內疑然見其屈損又惜善鬪未忍殺康日知以趙州降惟岳謀伐之皆曰武俊故心膂先君命之使佐大夫而士真又大夫女弟婿今事急宜去猜嫌以任之不然尙誰使乃遣與衛常寧將兵往因謀執惟岳而日知亦遣人邀說以禍福武俊乃還兵使人謂惟岳曰大夫與齊魏同惡今魏兵已敗齊爲趙州所限幽州兵近在定三軍且救死聞有詔召大夫宜亟歸惟岳惶遽出遂縊卽遣其屬孟華奏天子華辯對稱旨德宗擢爲兵部郎中授武俊檢校祕書監兼御史大夫恒冀觀察使是時惟岳將楊政義以定降楊榮國以深降朱滔受而處之帝以定賜張孝忠而日知爲深趙觀察使武俊怨不得節度而失趙定滔亦怨失深州

二人相結武俊卽縛使者送滔與之叛帝聞詔華諭解不聽時馬燧李抱真李芘李晟討田悅悅方困武俊滔救之屯連陔山帝詔李懷光督神策兵助討賊軍就舍氣銳甚謂燧曰奉詔毋養寇及壁壘未成擊之可滅也乃縱兵入滔壁殺千餘人悅軍旣屢北不能陣懷光緩轡觀之武俊乘其怠使趙萬敵等以二千騎橫突而滔軍踵馳王師亂相蹈藉死尸梗河爲不流懷光還走壁武俊夜決河注王莽渠斷燧餉路燧計窮而與滔素媾家乃遣使謝滔曰老夫不自量與諸君遇王大夫善戰天下無前吾固宜敗幸公圖之使老夫得還河東諸將亦罷兵吾爲言天子以河北地付公滔亦陰忌武俊勝且不制卽謂武俊曰王師旣敗馬公卑約如此不宜迫人以險答曰燧等皆國名臣連兵十萬一戰而北貽羞國家不知何面目見天子耶彼行不五十里必反拒我滔固許之燧至魏縣堅壁自固師復振滔慙謝嫌隙始構矣武俊使張鍾葵攻趙州日知斬其首以聞於是武俊與田悅等擅相王武俊國號趙以恆爲真定府命士真留守兼元帥以畢華鄭儒爲左右內史王士良司刑王佑司文士清司武並爲尙書士則司文侍郎宋端給事中王洽內史舍人張士清執憲大夫衛常寧內史監皇甫祝尙書右僕射餘以次封拜建中四年抱真使客賈林詐降武俊旣見曰吾來傳詔非降也武俊色動林曰天子知大夫登壇建國撫膺顧左右曰我本忠義天子不省故至是今諸軍數表大夫至誠上見表動色曰朕前誤無及矣朋友失意尙可謝朕四



海主毫芒過失返不得自新耶今大夫親斷逆首而宰相闇於事宜國家與大夫烏有細故哉朱滔以利相勳公何取焉誠能與昭義同心曠然改圖上不失君臣之義下以爲子孫計武俊曰僕虜人也尙知撫百姓天子固不務殺人以安天下今山東連兵比戰骨盡暴野雖勝尙誰與居今不憚歸國業與諸軍盟虜性樸彊不欲曲在我天子若能以恩盪刷之我首倡歸命有不從者奉辭伐之河北不五十日可定會帝出奉天抱真將還澤潞悅說武俊滔踵襲之林曰夫退軍前輜重後銳師人心固壹不可圖也使戰勝得地利歸於魏不幸喪師趙受其災今滄趙乃故地胡不取之武俊遂引而北林復激之曰公異邦豪英不應謀中夏燕魏幽險彼王室疆則須公之援削則已欲并吞且河北惟有趙魏燕耳滔乃稱冀心圖公冀州矣使滔能制山東大夫當臣事之否則見攻能臣滔乎武俊投袂曰二百年天子猶不能事安能臣豎子耶乃定計通好抱真而約馬燧盟興元元年赦天下武俊大集其軍黜僞號詔國子祭酒董晉與中人宣慰拜檢校工部尙書恆冀深趙節度使又加檢校司空同中書門下平章事兼幽州盧龍節度使琅邪郡王是時滔悉幽薊兵與回紇圍貝州將絕白馬津南趨洛李懷光據河中李希烈陷汴南略江淮李納方叛唯李晟軍渭上羽書調發天下十之三人心惴恐及田緒殺悅林復說武俊曰滔素欲得魏博會悅死魏人氣殲公不救魏且下滔益甲數萬張孝忠將北面事滔三道連衡濟以回紇長驅而南昭義軍

必保山西則河朔舉入滔矣今魏尙完孝忠未附公與昭義合兵破之義振關中京邑可坐復天子反正不朽之業誰與公參武俊大喜與抱真相聞自將屯南宮抱真屯經城兩軍相距十里而舍武俊潛會抱真于軍陳說恍惚抱真亦傾意結納約爲兄弟遂俱東壁貝州距城三十里止滔欲迎戰武俊戒士飽食曰軍未合毋妄動遣趙琳趙萬敵兵五百蔽林以待滔使票將馬寶盧南史陣而西李少成引回紇翼之日中兵接武俊與子士清引精騎望少成軍抱真次之滔馳騎二百出武陵東南乘高鼓譟武俊使步兵決戰而自以騎當回紇勒兵避其銳回紇馬怒突而過未及返武俊急擊琳等兵亦出回紇驚中斷遂先奔初滔兵感武俊軍不能傷回紇既却即欲引還因囂不能止軍大奔滔走還壁武俊中流矢謂抱真曰士少衰盍以騎濟師巢穴可覆也抱真使來希皓率勁騎薄滔營盧玄真乘其後滔懼引衆去希皓追之武俊邀于隘滔大敗免者八千人會夜各按屯武俊營滔東北抱真營西北俊知不支夜半焚車糧遁歸幽州火如晝師大譟其聲殷地抱真以山東蝗食少歸于潞武俊亦還會有詔復滔官爵武俊上還幽州盧龍節度又詔以恆州爲大都督府即授武俊長史賜德棣二州以士眞爲觀察使清河郡王天子至自梁遇武俊益厚子弟雖襁褓悉官之俄進檢校太尉兼中書令得建廟京師有司供擬武俊善射嘗與賓客獵一日射雉兔九十五觀者駭伏貞元十七年死年六十七羣臣奉慰天子如渾瑊故事贈太師有司



諡威烈帝更爲忠烈士真襲位

士真其長子也少佐父立功更患難既得節度息兵善守雖擅置吏私賦入而歲貢數十萬緡比燕魏爲恭元和初卽拜同中書門下平章事四年死贈司徒諡曰景襄軍中推其子承宗爲留後始河北三鎮自置副大使常處嫡長故承宗以御史大夫爲之及總留事憲宗久不報伺其變承宗數上疏自言帝聞劉濟田季安俱大病議更建節度翰林學士李絳曰鎮州世相繼人所狃習惟拒命則討之且諸道之賞饋百萬士又燕魏淄青勢同必合方江淮水潦財力困宜卽詔承宗嗣領季安等雖病徐圖所宜定四方有天時不可速也帝然之欲析鎮分建節度使承宗歲輸賦如李師道絳曰假令承宗奉詔諸道以割地同怨是官爵虛出而無當也不如令使者諭之無出上意帝乃詔京兆尹裴武慰撫承宗奉詔恭甚請上德棣二州遂以檢校工部尙書嗣領節度而以德州刺史薛昌朝爲保信軍節度使統德棣昌朝嵩子也與承宗故姻家帝因欲離其親將故命之詔未至承宗馳騎劫而歸囚之詔更用棣州刺史田渙爲二州團練守捉使遣中人傳詔令歸昌朝承宗拒命帝怒詔削官爵遣中人吐突承瓘將左右神策率河中河陽浙西宣歙兵討之趙萬敵者故武俊將以健鬪聞士真時入朝上言討之必捷令與承瓘偕有詔武俊忠節茂著其以實封賜子士則毋毀墳墓承瓘至軍無威略師不振神策大將酈定進號驍將以禽劉闢

功王陽山郡至是戰北馳而饋趙人曰酈王也害之師氣益折及吳少誠死李絳奏蔡無四鄰援攻討勢易不如赦承宗專事淮西帝不聽昭義節度使盧從史恃承宗外自固內實與之太常卿權德輿諫曰神策兵市井屠販不更戰陣恐因勞憊遠潰爲盜賊恆冀騎壯兵多攻之必引時月西戎乘閒則禁衛不可頓虛山東疥癬也京師心腹也不可不深念且師出半年費緡錢五百萬方夏盛暑水潦疾疫且降誠慮有潰橋之變又冒山東諸侯皆以息自副人心不遠誰肯爲陛下盡力者又盧從史倚寇爲援詠承瓘邀寵利宜召行營將令倍驛馳度至半道授以澤潞而徙從史它鎮破其姦圖然後赦承宗衆情必服帝未許五年河東軍拔其一屯張茂昭破之木刀溝帝患從史詐卒以計縛送京師劉濟又拔安平承宗懼遣其屬崔遂上書謝罪且言往年納地迫三軍不得專而爲盧從史賣以求利願請吏入賦得自新是時宿師久無功餉不屬帝憂之而淄青盧龍數表請赦乃詔浣雪盡以故地畀之罷諸道兵昌朝歸京師授右武衛將軍承宗見兵薄境已而罷歸罪從史得不詰自謂計得警然無顧憚七年軍庫火器鎧殆盡殺守吏百餘人不自安及吳元濟反承宗與李師道上書請宥教其將尹少卿爲蔡遊說見宰相語不遜武元衡怒叱遣之承宗怨甚與師道謀遣惡少年數十曹伏河陰乘昏射吏吏奔潰因火漕院人趣火所闕死者十餘輩縣大發民捕盜亡去不獲凡敗錢三十萬緡粟數萬斛未幾張晏等賊宰相元衡京師大索



天子爲旰食承宗嘗疏元衡過咎留中至是帝出表示羣臣大議咸請懲其罪伐之詔乃絕承宗朝貢竄其弟承系承迪承榮於遠方以博野樂壽故范陽地命歸劉總而所遣盜處處竊發斷建陵門戟燔獻陵寢宮伏甲欲反洛陽不克承宗數出兵掠鄰鄙田弘正上言承宗宜誅帝使率師壓境承宗揣詔有兵不即進即肆剽滄景易定間人苦之十一年詔削爵以實封賜士平使奉武俊後令河東義武盧龍橫海魏博昭義六節度兵進討大抵數十萬環地數千里以分其勢然營屯離置主約不得一故士觀望獨昭義郡士美薄賊境賊不敢犯始承宗不能叶諸父皆奔京師士則爲神策大將軍聞其叛請占數京兆裴度請用爲邢州刺史使隸昭義以傾趙人有王怡者武俊從子爲承宗守南宮士則招之約歸命謀泄遇害子元伯奔還擢監察御史詔贈怡尙書左僕射明年元濟平承宗大恐使牙將石汎奉二子至魏博因田弘正求入侍且請歸德棣二州入租賦待天子署吏弘正遣知感知信詣闕下請命前此帝使尙書右丞崔從賜詔書許自新承宗素服待罪及是乃詔復官爵以華州刺史鄭權爲橫海節度使統德棣滄景等州復承宗實封戶三百以所部飢賜帛萬匹李師道平奉法益謹表所領州錄事參軍判司縣主簿令皆丐王官十五年死贈侍中軍中推其弟承元爲留後承元不敢世于鎮詔用爲義成軍節度使事見本傳王廷湊本回紇阿布思之族隸安東都護府曾祖五哥之爲李寶臣帳下驍果善鬪王武俊養爲子故冒

姓王世爲裨將廷湊生駢脅沈鷲少言喜讀鬼谷兵家諸書王承宗時爲兵馬使田弘正至鎮州詔以度支贍錢百萬勞軍不時致廷湊暴其積以觀衆心衆果怨由是害弘正自稱留後脅監軍表請節又取冀州殺刺史王進岌穆宗怒以弘正子布爲魏博節度使率軍進討仍敕橫海昭義河東義武軍并力於是大將王位等謀執廷湊不克死者三千餘人會朱克融囚張弘靖以幽州亂乃合從拒王師有詔議攻討先後劍南東川節度使王涯以爲范陽亂非宿謀可先事鎮州又有魏博之怨濟以晉陽滄德犄角而進夫用兵若鬪然先扼喉領今瀛莫易定實賊咽喉宜屯重兵俾死生不得相聞間諜不入此萬勝之策帝乃詔曩武節度使陳楚閉境督諸軍三道攻而滄德烏重胤最宿將當一面裴度以河東節度使兼幽鎮招撫使屯承天軍重胤知時不可案兵未肯前帝浮於聽受銳克伐更以深冀行營節度使杜叔良代之叔良素結中人入見帝大言曰賊不足破會度逐廷湊兵於會星又入元氏焚壁二十二叔良率諸道兵救深州戰博野大奔失所持節以身免貶歸州刺史

叔良者將家子本以附會至靈武節度使坐不職罷復階貴近師滄景廷湊知其怯故先犯之師由是敗當是時帝賜賚無藝府帑空既集諸道兵調發火馳民不堪其勞仰度支者大抵兵十五萬有司懼不給置南北供軍院旣薄賊鄙饑道梗棘樵蘇不繼兵番休取芻蕘廷湊乘間奪轉運車六百乘食愈困至所



須衣帛未半道諸軍強取之有司弗能制其縣師深入者不得衣食又監軍官人悉取精粟士自隨疲瘠者備行陣輒潰二賊眾不過萬餘王師統制不一訖無功宰相不知兵爲異議搖撼裁報乖戾深州圍益急明年魏牙將史憲誠叛田布眾潰于南宮帝不得已乃赦廷湊檢校右散騎常侍成德軍節度使會牛元翼出奔廷湊遂取深州詔兵部侍郎韓愈慰其軍廷湊既原則稍挺與克融憲誠深相結爲輔車援滄州李全略死子同捷求襲文宗不許更授兗海節度使同捷逆命乃以珍幣子女厚結廷湊帝虞其變故授檢校司徒及幽魏徐兗兵討同捷廷湊撓魏北鄙以牽制之而饋滄景饘糧囚鄰道使者不遣帝怒詔絕其輸貢於是易定柳公濟戰新樂斬首三千級詔義劉從諫戰臨城敗之引漳注深冀有詔同捷亂廷湊同惡宜削官爵諸道以兵進討有能斬廷湊者賜錢二萬緡優畀之官以州鎮降者等差爲比公濟再戰行唐皆克焚柵十五廷湊射蠟書求救於幽州行營李載義獲之又納魏叛將丁志沼會同捷平廷湊稍畏表上景州而弓高樂陵長河三縣固守復上書謝帝方厭兵赦之悉復官爵還所上州久之進兼太子太傅太原郡公鎮冀自惟岳以來拒天子命然重鄰好畏法稍屈則祈自新至廷湊資凶悖肆毒甘亂不臣不仁雖夷狄不若也太和八年死贈太尉軍中以元逵請命帝聽襲節度

元逵其次子也識禮法歲時貢獻如職帝悅詔尚絳王悟女壽安公主元逵遣人納聘闕下進干盤食賈馬主糝濁奩具奴婢議者嘉其恭其後劉稹叛武宗詔元逵爲北面招討使詔下卽日師引道拔宣務壁破援軍堯山攻邢州降之累遷檢校司徒同中書門下平章事稹平加兼太子太師封太原郡公食實封戶二百進至兼太傅大中八年死年四十三贈太師諡曰忠子紹鼎襲字嗣先累擢檢校尚書左僕射其爲人淫灑自放性暴厚哀斂升樓彈射路人以爲樂眾忿其虐欲逐之會病死贈司空子幼未能事宜宗以元逵次子紹懿爲留後以嗣俄爲節度使累封太原縣伯加檢校司空政簡易咸通七年死贈司空以紹鼎子景崇嗣初紹懿病篤召景崇曰先君以政屬我須爾長將授之今疾甚爾雖少勉總軍務禮藩鄰奉朝廷則家業不墜矣監軍上狀懿宗悅擢景崇爲留後尋進節度使景崇字孟安以公主嫡孫尤被寵寵勛反景崇遣兵會王師平賊進檢校尚書右僕射主薨諡曰章惠景崇居喪如禮母張卒號慕羸懷當時稱之以政委賓佐檢戒親屬不得與嘗欲引母昆弟爲牙將其佐張位曰軍中用人有勞有能若私其人厚畀田宅祿食可也何必以官景崇謝進同中書門下平章事檢校太尉兼中書令封趙國公乾符五年進王常山黃巢反帝西狩僞使齎詔至景崇斬以徇因發兵馳檄諸道合定州王處存連師西入關閩行在貢輸相踵每語及宗廟園陵輒流涕蔚州刺史蘇祐爲沙陀所攻乞師於幽州屯美女谷兵不利祐將出奔會詔徙濮州刺史擁兵之官道于鎮景崇館于靈壽肆其下剽奪景崇殺之嗣節度凡十四年十



三遷至檢校太傅中和三年死年三十七贈太傅諡曰忠穆子鎔

鎔年十歲軍中推爲留後授檢校工部尙書李克用楊復光攻黃巢鎔凡再饋粟以濟師僖宗還自蜀獻馬牛戎械萬計於是克用方擊孟方立於邢州鎔歸芻糧邢州平克用遂謀山東屯常山西引輕騎涉漳沁謀軍會大澗平地水出鎔兵奄至克用匿林中以免是時幽州李匡威亦謀取易定分其地王處存方厚事克用克用寵將李存孝已拔邢則略鎔南鄙別將李存信等出井陘會之鎔使堯山存孝擊敗之遂至深趙鎔求救於匡威存孝方攻臨城等數縣聞匡威屯鄙引師去存信素忌存孝妄曰無擊賊意克用信之存孝飛狐人所謂安敬思者善騎射攻葛從周敗張溶韓建數有奇功至是懼讒挈邢州歸朱全忠并結鎔爲助天子詔出鎮幽魏兵援之景福元年克用假道于鎔以討存孝鎔不答乃與處存連兵侵鎔拔堅固鎮攻新市鎔禽克用將薛萬金匡威以兵三萬救鎔克用自攻常山度滹沱河鎔引騎十萬夜濟礮水襲敗之斬二萬級奪鎧器三百乘克用退壁樂城天子有詔和解三鎮克用還然未得志故復伐鎔匡威以五千騎敗克用于元氏鎔具牛酒會匡威彙城餉金二十萬以謝俄而匡威爲弟匡籌所逐鎔德其助已迎而館之匡威親息日鎔往弔伏起殺其府屬楊洽及親吏淡從有甲者牽鎔襲匡威曰與我四州可不死鎔許之將鎔入牙城鎮軍譟而闔左門坎垣出戰會大風雨水拔瓦飛兵相接有屠者墨君和

租而薄賊衆披靡乃挾鎔踰城入既免賞千金與第一區約有十死匡威走東園兵圍之與從事李抱貞俱死明日鎔以禮斂匡威素服哭諸廷遣使告匡籌匡籌怒移書詰兄所以死狀表天子請討鎔詔止之又詔朱全忠平幽鎮怨克用聞匡威死自率兵傅城下鎔大驚納縑二十萬乃退匡籌攻樂壽武強克用出縛馬關敗鎮兵於平山因進攻鎔外壘鎔內失幽州助因乞盟進幣五十萬歸糧二十萬請出兵助討存孝乃得解克用屯樂城存信屯琉璃陂爲邢人夜襲其營存信軍亂不克追克用進薄邢環城爲溝堦欲示久圍者城中兵數出溝壘不可成裨將袁奉韜給存孝曰君所畏惟王耳王欲溝堦成則西歸公何不聽之存孝兵不出壘成攻益急城中食盡存孝登城哭曰我誤計使我生見王死不恨克用遣家媪招之存孝出泥首言爲存信誣搆克用曰爾與鎔書罵我多矣輟而尸於市光化中全忠討幽州劉仁恭鎔遣兵屯蓊城俄而仁恭敗擊其歸得十八全忠既取邢洛礮又得潞因圖河東使羅紹威諷鎔絕太原共尊全忠鎔猶違全忠不悅會克用將李嗣昭攻洛州全忠自將擊走之得鎔與嗣昭書全忠怒引軍攻鎔次元氏鎔謂其屬曰國危矣奈何周武請見全忠可以口舌罷也許之全忠迎折曰爾公朋附太原今無赦矣卽出書示式曰嗣昭在者宜速遣式曰王公所與和者息人鋒鏑間耳況繼奉天子詔和解能無一番紙墜此路乎太原與趙本無恩嗣昭庸肯入耶公爲唐桓文方以仁義成霸業盜困人於險耶全忠喜



把式袂曰吾特戲耳延入帳中議脩好鎔以幣二十萬賂師遣子昭祚質仕全忠府全忠因妻之鎔判官張澤謀曰失火之家不可恃遠救今定密邇與太原親宜使全忠圖之鎔遣式使全忠全忠乃取定州王邵遂奔太原鎔母何有婦德訓鎔嚴至母亡鎔始贖貨財姬侍千人儀服僭上又以房山有西王母祠數游覽妄求長年事踰月不還始廷湊賤微時鄰有道士爲卜得乾之坤曰君將有士及得鎮迎事甚謹復問壽幾何子孫幾何答曰公三十年後當有二王已而廷湊立十三年死蓋度文也景崇鎔皆王廷湊嘗使至河陽醉寢於路有過其所者視之曰非常人也從者以告廷湊馳及之間其故曰吾見君鼻之息左若龍右若虎子孫當王百年家有大樹覆及堂公興矣及害弘正而樹適庇寢自廷湊訖鎔凡百年贊曰朱滔王武俊南面稱王地聯交昵及泚僭天子滔將應之當時危矣賈林以一語寤武俊虬兵相仇折幽薊之銳泚失其朋不出孤城終底覆夷用林之功賞不及身德宗爲不明哉

唐書卷一百十一

唐書卷一百十一考證

李寶臣傳使將驍騎十八人劫太原尹○舊書作八千人



唐書卷二百十一考證

唐書卷二百十二

宋 端 明 殿 學 士 宋 祁 撰

列傳第一百三十七

藩鎮盧龍

李懷仙柳城胡也世事契丹守營州善騎射智數敏給祿山之反以為裨將史思明盜河南留次子朝清守幽州以阿史那玉高如震輔之朝義殺立移檄誅朝清二將亂朝義以懷仙為幽州節度使督兵馳入如震欲拒不及計乃出迎懷仙外示寬以安士居三日大會斬如震州部悉平朝義敗將趨范陽中人駭奉先間遣鏑說懷仙遂降使其將李抱忠以兵三千戍范陽朝義至抱忠閉關不內乃縊死斬其首因奉先以獻僕固懷恩即表懷仙為幽州盧龍軍節度使遷檢校兵部尚書王武威郡屬懷恩反邊羌挈戰不解朝廷方勤西師故懷仙與田承嗣薛嵩張忠志等得招還散亡治城邑甲兵自署文武將吏私貢賦天子不能制大厯三年麾下朱希彩朱泚泚弟滔謀殺懷仙斬關者以入希彩不至遂明泚懼欲亡滔曰謀不成有死逃將為往俄希彩至共斬懷仙族其家希彩自稱留後張忠志以兵討其亂不克代宗因赦罪詔宰相王縉為節度使以希彩副之希彩聞縉至蒐卒伍大陳戎備以逆縉建旌徐驅希彩迎謁甚

乾隆四年校刊

唐書卷二百十一列傳



緡度不可制勞軍閩旬乃還希彩即領節度五年封高密郡王驚恣不軌人不堪七年其下李璣問衆之怨殺之共推朱泚爲留後泚自有傳

朱泚性變詐多端倪希彩以同宗倚愛之使主帳下親兵泚領節度遣泚將兵三千爲天子西乘塞爲諸軍倡始安史後山東雖外臣順實傲肆不廷至泚首效歎帝嘉之召見泚殿中帝問曰卿材孰與泚多泚曰統御士衆方略明辨臣不及泚臣年二十八獲謁天子泚長臣五年未識朝廷泚不及臣帝愈喜特詔勅兵貫王城而出屯涇州置酒開遠門餞之戍還乃謀奪泚兵詭說曰天下諸侯未有朝者先至可以得天子意子孫安矣泚信之因入朝稍不相平泚遂乞留西討吐蕃以泚權知留後兼御史大夫泚殺有功者李璣等二十餘人威振軍中李惟岳拒命泚與成德張孝忠再破之東鹿取深州進檢校司徒遂領節度賜德棣二州德宗以康日知爲深趙二州團練使詔泚還鎮泚失深州不平又請恆定七州所賦供軍復不許愈怨時馬燧圍田悅悅窮問泚與王武俊同叛泚姑子劉怱爲涿州刺史以書諫曰司徒身節制太尉位宰相恩遇極矣今昌平有太尉鄉司徒里不朽業也能以忠順自將則無不濟比忘上樂戰不顧成敗如安史者今復何有司徒圖之無貽悔泚不從連兵救悅又懼張孝忠之襲使怱壁險而軍泚激其衆曰士蹙血鬪旣下堅城朝廷乃見奪奏賞不報君等疾趨破馬燧軍以取貲糧可乎軍中不應三號之

乃曰幽人死於南者骸擗不拚痛藏心髓奈何復欲暴骨中野乎司徒兄弟受國寵士各蒙官賞願安之不卹其它泚罷潛殺不可共亂者數十人日知發其謀於燧天子聞以悅未下重起兩寇卽封泚通義郡王實戶三百泚愈悖分兵與武俊屯趙州魯日知矯詔發其糧貯卽引兵救悅次東鹿軍大譟曰天子令司徒北還而南救魏寧有詔邪泚懼走匿傳舍裨將蔡雄好諭士曰始天子約取成德所得州縣賜有功者拔深州者燕也本鎮常苦無繚糞得深州以佐調率今願不得又天子以帛賜有功士爲馬燧掠去今引而南非自爲也軍中悔謝復曰雖然司徒南行違詔書莫如還泚回次深州誅首變者二百人衆懼乃率兵南壁寧晉與武俊合帝命馬燧李懷光擊之泚屬鄭雲達田景仙皆奔燧已而泚破懷光軍則與王師屯魏橋久不戰悅德泚援欲尊而臣之泚讓武俊曰篋山之勝王大夫力也於是泚武俊官屬共議有列國連衡共抗秦今公等在此李大夫在鄆請如七國並建號用天子正朔且師在外其動無名豈長爲叛臣士何所歸宜擇日定約順人心不如盟者共伐之泚等從之泚以祿山思明皆起燕俄覆滅惡其名以冀堯所都因號武俊號趙悅號魏納號齊建中三年冬十月庚申爲壇魏西祀天各僭爲王與武俊等三讓乃就位泚爲盟主稱孤武俊悅及納稱寡人是日三叛軍上有雲氣頗異燧望笑曰是雲無知乃爲賊瑞邪先是其地土忽高三丈魏人韋稔佞悅以爲益土之兆後二年泚等冊璽正值其所泚改



幽州爲范陽府以子爲府留後稱元帥用親信爲留守滔等居室皆曰殿妻曰妃子爲國公下皆稱臣謂殿下上書曰殿所下曰令置左右內史視丞相內史令監視侍中中書令東西侍郎視門下中書東曹給事西曹舍人視給事中中書舍人司議大夫視諫議大夫六官省視尙書東西曹僕射視左右僕射御史臺曰執憲置大夫至監察御史驅使要藉官曰承令左右將軍曰虎牙豹略軍使曰鷹揚龍驤以劉曄爲范陽府留守柳良器李子干爲左右內史滔兄瓊瑰陸慶爲東西曹僕射楊霽馬寔寇瞻楊榮國爲司文司武司禮司刑侍郎李士真樊播爲執憲大夫中丞其餘以次補署聘處士張遂王道爲司諫燧遣李晟將兵至易定率張茂昭攻涿莫以絕滔援明年圍清苑滔將鄭景濟固守滔使馬寔將兵萬人與武俊拒燧自以兵萬餘救清苑絕晟糧道兵至定州晟不知夜引兵還滔疑有伏不敢逼遠保瀛州而孝忠晟合兵千人城萊水滔驍將烏薩戒以兵七百襲殺城卒數百晟不出景濟望滔軍立幟爲應滔進軍薄晟營晟戰不利城中兵亦出晟大敗奔易州茂昭走滿城滔已破晟則回屯河間不進武俊使宋端趣讓滔怒曰孤亟戰且病就醫藥而王已復云云孤南救魏棄兄背君如脫屣王必相疑亦聽所爲端還武俊謂寔曰寡人望王速來指蹤決勝負復何惡王異日并天下寡人得六七城爲節度足矣寔道具道所以然武俊亦遣使謝滔滔亦報謝然武俊內銜之滋不懌與田悅潛謀絕滔及泚反燧等皆班師武俊寔亦還

悅武俊遣使至河間賀泚即位武俊詭請寔共攻康日知於趙州謀覆其軍不克寔歸武俊餞之厚贈遣泚遣人密召滔使趨洛陽滔發書西向再拜移檄諸道曰今發突騎四十萬走洛陽與皇帝會上陽宮使王郢說悅連和俱西滔素彊調斂武俊等不能堪又令各以兵五千從攻洛欲僭稱帝乘輿法從及赦令皆具初回紇以女妻奚王大麻末奚亂殺王女逃歸道平盧滔以錦繡張道待其至請爲婚女悅許焉既而遣使修壻禮於回紇回紇喜報以名馬重寶及僭相王與武俊悅納納四金鑰於回紇曰四國願聽命於可汗謹上金鑰敢開出納唯所命至是乞師焉回紇以二千騎從而武俊亦先乞師以斷懷光餉路未至而王師還回紇過幽州滔使說其酋達干曰若能同度河而南玉帛子女不貲計可得也達干許諾滔啗以金帛約曰五十里舍以須悅軍滔兵五萬車千乘騎二萬士私屬萬餘虜兵三千馬橐它倍之過武俊境武俊勞之牛酒芻米皆具然悅已用武俊謀不肯出儲峙干野以待滔至貝州悅刺史邢曹俊上謁滔即歸閉城守滔疑之次承濟武俊陰遣客反間滔曰悅有憾須公南以兵斷公歸路宜少備滔聞怒入承濟執悅吏掠訊不得其情殺之使回紇大掠南及澶衛係執老幼無遺者悅大恐闔城自保滔遣將楊布略定館陶屯平恩置官吏滔整軍北還使馬寔屯冠氏聞悅死遂攻魏州圍貝州於是武俊李抱真合軍擊滔滔急召寔至貝州步馬乏頓明日輟約戰寔請休士三日蔡雄達干等畏武俊堅壁難圖請戰楊



布曰大王將取東都逢小敵卽怯何以長驅天下邪術士尹少伯亦言必勝既戰爲二軍所乘大敗大將朱夏祐李進皆被執委仗如丘滔奔入德州恨少伯雄布之謬殺之俄而京師平滔已敗不能軍走還幽州上書待罪有詔武俊抱眞開示大信若誠心審固者當洗爵錄勳與更始初滔以劉怱忠力使留守及敗疑圖已彷徨不敢入怱聞其至蒐兵繕鎧夾道陳二十里迎謁望滔哭滔遂入府氣沮索日邑邑被病政事一委怱貞元年死年四十二贈司徒

劉怱幽州昌平人少爲范陽裨將以親老疾宜侍輒去職李懷仙爲節度使檄召不應朱滔時積功至雄武軍使廣墾田節用度以辦治稱稍遷涿州刺史滔之討田承嗣表知府事和裕得衆心李寶臣以兵劫滔于瓦橋滔走寶臣乘勝欲襲幽州怱設方略勒兵完守寶臣不敢謀擢御史中丞滔敗歸終不貳益治兵人嘉怱忠於所奉及滔死軍中盡推怱乃總軍事俄詔爲節度副大使彭城郡公居鎮纔三月死年五十九贈兵部尙書諡曰恭子濟

濟字濟游學京師第進士歷冀州刺史怱病詔濟假州事及怱卒嗣節度累遷檢校尙書右僕射同中書門下平章事奚數侵邊濟擊走之窮追千餘里至青都山斬首二萬級其後又掠檀薊北鄙濟率軍會至韋破之王承宗叛濟合諸將曰天子知我怨趙必命我伐之趙且大備我奈何裨將譚忠欲激濟伐承宗

疾言曰天子不使我伐趙趙亦不備燕濟怒擊之使視趙果不設備數日詔書許濟無出師濟釋忠謝而問之忠曰昭義虜從史外親燕內實忌之外絕趙內實與之此爲趙畫曰燕倚趙自固雖甚怨必不殘趙故不足虞也趙旣不備燕從史則告天子曰燕趙宿怨也今趙見伐而不備燕是燕反與趙此所以知天子不使君伐趙趙亦不備燕濟曰計安出曰今天子誅承宗而燕無一卒濟易水者正使潞人賣恩於趙取忠於上是君貯忠誼心而染私趙之名卒不見德於趙惡聲徒嘈嘈於天下濟然之以兵七萬先諸軍斬首數千級又拔饒陽屯瀛州進攻安平久不拔濟命次子總以兵八千先登日中拔其城會赦承宗進中書令濟之出以長子緄攝留務總爲行營都知兵馬使濟病甚總與左右張玘成國寶及帳內親近謀殺濟乃使人詐從京師來曰朝廷以公前屯瀛州逗留詔副大使代節度明日復使人曰詔節至太原矣又使人走呼曰過代矣舉軍驚濟憤且怒不知所爲誅主兵大將數十人及素與緄厚善者亟追緄以玘兄舉代留事濟自朝至中昃不食渴索醢漿總使吏唐弘實實毒濟飲而死年五十四緄至涿州總矯濟命殺之乃發喪贈太師諡曰莊武

總性陰賊尤險惡已毒父卽領軍政朝廷不知其姦故詔嗣節度封楚國公進累檢校司空承宗再相命總遣兵取武彊按軍兩端以私饋資憲宗知之外示崇寵進同中書門下平章事及吳元濟李師道平承



宗憂死田弘正入鎮州總失支助大恐謀自安又數見父兄爲祟乃衣食浮屠數百人晝夜祈禳而總憇  
祠場則暫安或居臥內輒驚不能寐晚年益慘悻請剔髮衣浮屠服欲祓除之譚忠復說總曰天地之數  
合必離離必合河北與天下離六十年數窮必合往朱泚希烈自立趙冀齊魏稱王郡國弄兵抵目相視  
可謂危矣然卒於無事元和以來劉闢李錡田季安盧從史齊蔡之彊或首于都市或身爲逐客皆君目  
見今兵駸駸北來趙人已獻德棣十二城助魏破齊唯燕無一日勞後世得無事乎爲君憂之總泣且謝  
因上疏願奉朝請且欲割所治爲三以幽涿營爲一府請張弘靖治之瀛莫爲一府盧士政治之平簡媿  
檀爲一府薛平治之盡籍宿將薦諸朝會穆宗冲逸宰相崔植杜元穎無遠謀欲寵弘靖重其權故全付  
總地唯分瀛莫置觀察使拜總檢校司徒兼侍中天平節度使又賜浮屠服號大覺榜其第爲佛祠遣使  
者以節印偕來時總已自髡祝讓節印遂衣浮屠服行及定州卒始總請代獻馬萬五千匹羣臣或疑其  
詐帝獨納之使給事中薛存慶宣慰給所部復一歲緡錢百萬勞軍高年惛獨不能自存者官吏就問賜  
粟帛總遂與忠俱行軍中世懷其惠擁留不得進總殺首謀者十人以節付張皐夜間道去遲明軍中乃  
知詔贈太尉子礎及弟約至長安者十一人皆擢州刺史忠護總喪至亦卒忠絳人喜兵善謀事蓋健男  
子云

朱克融滔孫也以偏校事劉總將入朝慮後有變籍其軍材勇與黠暴不制者悉薦之朝冀厚與爵位  
使北方歆豔無甘亂心克融在道方是時執政非其人既見總納地謂天下曠然無復事克融等留京師  
久之不得調數詣宰相求自試皆不聽羸色敗服饑寒無所貸丐內怨忿會張弘靖赴鎮因悉遣還俄幽  
州亂囚弘靖時克融父洞號有智諳以疾廢臥家衆往請爲帥洞辭老且病因推克融領軍務詔以劉悟  
爲節度使馳往俄而瀛冀皆附克融悟不得入克融縱兵掠易州敗兩縣寇蔚州易州刺史柳公濟戰白  
石嶺斬三千級轉寇定州節度使陳楚破其兵一萬會鎮州又殺田弘正議者謂二賊均逆而克融全弘  
靖不敢害可悉兵先誅趙赦燕朝廷度幽薊未可復取乃拜克融檢校左散騎常侍爲幽州盧龍節度使  
長慶元年也明年陷弓高攻下博與王廷湊共圍深州裴度以檄譙諭克融乃還因進檢校工部尚書表  
獻馬萬匹羊十萬請直賞軍敬宗初遷檢校司空賜邊屯時服克融以帛疏惡囚詔使楊文端以聞又上  
言聞陛下東幸雒願率匠丁五千助營宮室迎乘輿且請帛三十萬備一歲費帝怒用裴度謀忍不問以  
好言答之屈其謀進爵吳興郡王是年軍亂殺克融及其子延齡詔贈司徒次子延嗣立領留後爲大將  
李載義殺而代之并族其家

李載義自稱恆山愍王之後性矜蕩好與豪傑游力挽疆擗關劉濟在幽州高其能引補帳下從征伐積



多爲牙中兵馬使朱克融死子延嗣叛命殘用其人載義因衆不忍殺之暴其罪于朝敬宗卽授檢校戶部尙書盧龍軍節度使封武威郡王初張弘靖之囚幕府多見害妻子留不遣及是載義悉護送京師雖僮厮畢行俄而李同捷據滄景邀襲封載義請討賊自效文宗嘉之進檢校尙書右僕射斬級數有功賊平詔同中書門下平章事賜白玉帶示殊禮大和四年爲兵馬使楊志誠所逐奔易州卽上言自破滄州賊屢請朝不許今願將妻子身入見帝令使者抵太原尉迎賜袍笏裝器又以其嘗有功且意恭順乃冊拜太保仍平章事俄爲山南西道節度使徙河東始回鶻使者歲入朝所過暴慢吏不敢何禁但嚴兵自守虜性習益警悍至鞭候人剽突市區時大會李暢者曉華人語尤凶黠既就館橫須索挾痕郵人載義召暢語曰可汗以舅甥故使將軍朝貢誼不容將軍暴也天子厚饗餼以禮客有不謹吏皆論死若將軍所部不戢而斂獲自如我必殺所犯者將軍其少戒因悉罷所防兵以兩卒護閫暢嚴憚之訖無犯者進兼侍中會吏下請立碑紀功詔李程爲之辭未有字帝詔曰周書凡厥正人旣富方毅卿宜當之以方毅爲字其寵待如此開成三年卒年五十贈太尉初載義母葬范陽爲楊志誠掘發後志誠被逐道太原載義奏請別其心償母怨不許又欲殺之官屬苦救乃免然盡戕其妻息士卒其天資驍暴云帝屢法弗効也

志誠者事載義爲牙將載義宴天子使者鞠場志誠與其黨譟而起載義走因自爲都知兵馬使文宗更以嘉王領節度用志誠爲留後俄檢校工部尙書擢節度副大使踰年進檢校吏部詔下邸吏白宰相曰軍中不識朝廷儀惟知尙書改僕射爲進秩今一府盛服以待天子命如復爲尙書則舉軍慙使者勢不得出旣志誠果怨望軍有嬖言囚中人魏寶義及它使焦奉鸞尹士恭而遣部將王文穎入謝讓還所命帝復賜之文穎不肯受輒去帝忍不責乃遣使進檢校尙書右僕射八年爲下所逐推部將史元忠總留後志誠在鎮密製天子袞冕其被服皆擬乘輿元忠表而暴于朝詔御史按治斥嶺南至商州誅之而以通王領節度授元忠留後明年檢校工部尙書爲副大使會昌初爲偏將陳行泰所殺行泰邀節制未報次將張絳殺行泰起求帥軍武宗自用張仲武代之

張仲武范陽人通左氏春秋會昌初爲雄武軍使行泰殺元忠宰相李德裕計河朔請帥皆報下太速故軍得以安若少須下且有變帝許之未報果爲絳所殺復誘其軍以請亦置未報是時回鶻爲黠戛斯所破烏介可汗託天得塞上而仲武遣其屬吳仲舒入朝請以本軍擊回鶻德裕因問北方事仲舒曰行泰絳皆遊客人心不附仲武舊將張光朝子年五十餘通書習戎事性忠義願歸款朝廷舊矣德裕曰卽以爲帥軍得無復亂乎答曰仲武得士心受命必有逐絳者德裕入白帝曰行泰等邀節不可許仲武求自



效用之有名軍且無辭乃擢兵馬留後而詔撫王領節度詔下絳果爲軍中所逐卽拜仲武副大使檢校工部尙書關陵郡公會回鶻特勒那頡頏擁赤心部七千帳逼漁陽仲武使其弟仲至與別將游奉賓等率銳兵三萬破之獲馬牛橐它旗纛不勝計遣吏獻狀進檢校兵部尙書始回鶻常有會長監奚契丹以督歲貢因謁刺中國仲武使裨將石公緒等厚結二部執謀者八百餘人殺之回鶻欲入五原掠保塞雜虜乃先以宣門將軍四十七人詭好結歡仲武賂其下盡得所謀因逗留不遣使失師期回鶻人馬多病死者由是不敢犯五原塞烏介失勢往依康居盡徙餘種寄黑車子部回鶻遂衰名王貴種相繼降捕幾千人仲武表請立石以紀聖功帝詔德裕爲銘揭碑盧龍以告後世大中初又破奚北部及山奚俘獲雜畜不貲擢累檢校司徒同中書門下平章事卒諡曰莊

子直方以右金吾將軍襲節度留後俄進副大使舉動多不法畏下變起乃託出畋奔京師軍中以張允伸總後務直方至宣宗遣使者郊勞授金吾大將軍以其族大給檢校工部尙書俸久之進檢校尙書右僕射性暴率坐以小罪笞殺金吾史改右羽林統軍好馳獵往往設置罟於道當宿衛不時入下遷驍衛將軍奴婢細過輒殺積其罪貶思州司戶參軍母驚曰尙有尊於我子邪久乃復授羽林統軍縱部下爲盜復貶康州司馬後居東都弋獵愈甚洛陽飛鳥皆識之見必羣噪乾符中累進左驍衛大將軍時鄭畋

輔政頗言仲武會昌時功第一今直方百口不自存每內燕以衣敝惡辭不赴陛下錄功念舊宜少優假詔還檢校右僕射進左金吾衛大將軍黃巢犯京師直方迎灞上旣而納亡命謀劫巢報天子公卿多依之賊覺屠其族

張允伸字逢昌范陽人世爲軍校直方出奔以都知兵馬使爲衆立爲留後天子報可未幾檢校散騎常侍爲節度使累進檢校司徒兼太傅同中書門下平章事封燕國公龐勛以徐州反上書欲遣弟允舉領兵討賊不許上米五十萬斛鹽二萬斛佐用度詔嘉美賜玉帶寶器執錦進兼侍中咸通十二年以疾甚上節印就醫藥詔聽許以子簡會爲副大使卒年八十八贈太尉諡曰忠烈允伸性勤儉下所安賴未嘗有邊鄙虞子十四人簡會入朝昆弟多至大將軍刺史郡佐者而軍中推張公素爲留後

公素范陽人以列將事允伸擢累平州刺史允伸卒以兵來會喪軍士素附其威望簡會知不可制卽出奔詔公素爲節度使進同中書門下平章事性暴厲眸子多白燕人號白眼相公爲李茂勳所襲奔京師貶復州司戶參軍

李茂勳本回鶻阿布思之裔張仲武時與其侯王皆降資沉勇善馳射仲武器之任以將兵常乘邊積功賜姓及名陳貢言者燕健將爲納降軍使軍中素信服茂勳襲殺之因舉兵給稱貢言反公素迎擊不利



走茂勳入府衆始悟因推主州務以聞詔卽拜節度使俄以病自上詔進尙書右僕射致仕表子可舉代  
遂領留後進爲節度使擢累檢校太尉中和末太原李克用始疆大與定州王處存厚相結可舉惡其窺  
山東爲己患乃遣使約吐渾都督赫連鐸鎮州王鎔聯和揚言易定本燕趙屬得其地且多有之卽遣軍  
司馬韓玄紹擊沙陀藥兒嶺斬首七千級殺其將朱耶盡忠等收牛馬器鎧數萬又戰雄武軍殺獲萬人  
鐸又破沙陀於蔚州詔以鐸爲雲州刺史進可舉檢校侍中乃遣票將李全忠率衆六萬圍易州鎔以兵  
攻無極處存求援太原克用自將赴之鎮人懼退保新城克用急攻之鎔引去追破之九門易久未下盧  
龍將劉仁恭穴地以入得其城士卒有驕色處存以輕兵三千蒙羊皮夜布之野以精騎伏它道全忠軍  
望爲羣羊爭趨之處存伏騎發大敗之復取易州全忠遁還盡失芻糧仗鎧懼得罪乃哀餘衆反攻幽州  
可舉度不支引其族登樓自燔死

李全忠范陽人仕爲棣州司馬有蘆生其室一尺三節怪之以問別駕張建建曰蘆茅類生於澤公茅土  
兆也傳節者其三世乎罷歸事可舉爲牙將可舉死衆推爲留後光啟元年拜節度使未幾卒子匡威嗣  
領留後進爲使性豪爽恃燕勦勁兵處斬然有雄天下意與赫連鐸共攻太原爭雲代李克用使安金俊  
攻鐸匡威救鐸戰蔚州射金俊殺之乃共表請討沙陀而朱全忠亦上言願協力故張濬因請用兵矣濬

敗克用攻雲州以騎將薛阿檀爲前鋒設伏河上鐸以精騎追阿檀抵河而伏起乃大敗禽其將賈塞兒  
遂圍雲州塹而守分兵出井陘屯常山大掠深趙匡威以步騎萬餘援王鎔克用還因急攻鐸會食盡鐸  
棄州奔匡威克用取雲州表石善友爲刺史鐸本吐谷渾部酋也開成中其父率種人三千帳自歸守雲  
州十五年至是失其地景福初鎔誘太原將李存孝降之克用怒伐鎔鎔來求救匡威遣將赴之克用去  
明年兵復出井陘匡威自將援鎔將行置酒大會其弟兵馬留後檢校司徒匡籌妻張國豔匡威酒酣報  
之弟怒匡威軍次博野乃據城自爲留後天子卽授檢校太保爲節度使匡威麾下多去屏營無所歸留  
深州遣其屬李抱貞上書願入朝時京師數寇難人人危懼傳言金頭王且來皆亡鼠山谷抱貞還而鎔  
已迎館于鎮匡威引抱貞登城西大悲浮屠顧望流涕美其山川乃共圖鎔陽爲鎔繕甲治城塹施授方  
略陰施予以傾士心鎮軍忠於王氏皆惡之匡威親忌日鎔過慰匡威士衷甲劫鎔入牙城戰不勝鎮人  
斬匡威以徇匡籌表訴諸朝檄暴鎔罪攻樂壽武彊以報始匡籌之奪也燕人不以爲義劉仁恭出奔太  
原克用倚其謀下武媯二州敗匡籌於居庸關李存審與戰匡籌又敗挈其族奔京師次景城滄州節度  
使盧彥威殺之掠入車馬僮奴妻方乳不能進仁恭獲之縶于克用爲嬖夫人始匡威見逐嘆曰兄失弟  
得皆吾之宗無所悔然其材恐不足以守果亡而幽州地歸克用以仁恭爲帥



劉仁恭深州人父晟客范陽爲李可舉新興鎮將故仁恭事軍中從李全忠攻易州號窟頭稍遷裨校爲人豪縱多智數有大志嘗自言夢大幡出指端年四十九當秉旄節李匡威惡之補景城令會瀛州亂殺守吏仁恭募士千人定其亂匡威復使將兵戍蔚州踰期未代士皆怨會匡奪地故戍卒擁仁恭趨幽州匡籌逆戰敗之遂以族奔太原李克用待之甚厚賜田宅拜壽陽鎮將數以策干克用請步騎一萬東取幽州且爲導克用攻匡籌匡遁去仁恭與存審入城封府庫以待克用悅留仁恭守之以親信分典其兵乾寧二年克用擊王行瑜表仁恭爲檢校司空盧龍軍節度使明年克用攻魏州召盧龍兵仁恭以契丹解又明年克用復興其兵救朱瑄仁恭不答使者數十往卒不出克用以書讓之仁恭乃慢罵執其使盡囚太原士之在燕者復以厚利誘克用麾下士多亡歸之克用怒自將往擊不勝師喪過半仁恭獻馘於朱全忠全忠表同中書門下平章事既與克用絕則益募兵光化初使其子守文襲滄州節度使盧彥威棄城走遂有滄景德三州地用守文爲節度留後請命于朝昭宗怒不與會中人至仁恭嬖謂曰旄節吾自可爲要假長安本色耳何見拒邪由是兵益張顯圖河北悉幽滄步騎十萬聲言三十萬南徇魏鎮次貝州屠之清水爲不流羅紹威求救於朱全忠全忠使李思安葛從周赴之屯內黃仁恭負疆下令曰思安懦當先破之乃取魏守文與單可及精甲五萬循清水上思安設伏自引兵逆戰僞不勝守文

隲北至內黃思安整兵還擊守文伏發斬可及獨守文挺逸衆無遺者從周與邢洛兵與魏將賀德倫等出館陶門夜擊仁恭破八屯仁恭走自魏抵長河數百里尸蔽道鎮人邀敗之東境仁恭遂衰三年葛從周攻滄州仁恭壁乾寧從周潛軍戰老鷗隄仁恭敗退壁瓦橋卑辭歸窮於克用求救克用爲侵邢洛俄而全忠取瀛莫克用使周德威出飛狐天祐三年全忠自將攻滄州壁長蘆仁恭悉發男子十五以上爲兵涅其面曰定霸都士人則涅于臂曰一心事主盧龍閭里爲空得衆二十萬屯瓦橋全忠環滄築而溝之內外援絕人相食仁恭求戰不許復從克用乞師使百輩往乃許仁恭以兵三萬合攻潞州降全忠將丁會滄州圍乃解是時中原方多故仁恭得倚燕疆且遠無所懼意自滿從方士王若訥學長年築館大安山掠子女充之又招浮屠與講法以董土爲錢斂真錢穴山藏之殺匠滅口禁南方茶自嶺山爲茶號山曰大恩以邀利子守光烝嬖妾事覺仁恭謫之李思安來攻屯石子河仁恭居大安山城中無備守光引兵出戰思安去因回攻大安虜仁恭囚別室殺左右婢媵遂有盧龍贊曰朱滔荷其兄泚入朝及引兵東嚮稱帝以自尊名雖助泚志可知矣至克融再得幽州朱氏無遺種其禍與泚鈞而族夷有先後爲間也



唐書卷二百十二

唐書卷二百十二考證

朱滔傳年四十二○舊書作四十沈炳震曰按滔大曆八年來云年二十八至貞元元年正爲四十新書

誤



唐書卷一百一十二考證

唐書卷一百一十三

宋 端 明 殿 學 士 宋 祁 撰

列傳第一百三十八

藩鎮淄青橫海

李正己高麗人爲營州副將從侯希逸入青州希逸母卽其姑故薦爲折衝都尉寶應中以軍候從討史朝義時回紇恃功橫諸軍莫敢抗正己欲以氣折之與大會角逐衆士皆牆立觀約曰後者批之既逐而先正己批其頰回紇矢液流離衆軍哄然笑會大慙自是沮憚不敢暴希逸以爲兵馬使沈毅得衆心然陰忌之因事解其職軍中皆言不當廢尋逐希逸出之有詔代爲節度使本名懷玉至是賜今名遂有淄青齊海登萊沂密德棣十州與田承嗣薛嵩李寶臣梁崇義輔牙相倚嵩死李靈耀反諸道攻之共披其地正己復取曹濮徐兗鄆凡十有五州市渤海名馬歲不絕賦繇均約號最彊大政令嚴酷在所不敢偶語威震鄰境歷檢校司空加同中書門下平章事以司徒兼太子太保封饒陽郡王請附屬籍許之因徙治鄆以子納及腹心將守諸州建中初聞城汴州乃約田悅梁崇義李惟岳偕叛自屯濟陰陳兵按習益師徐州以扼江淮天子於是改運道檄天下兵爲守備河南驩然會發疽死年四十九興元初納順命詔



贈太尉

納少時爲奉禮郎將兵防秋代宗召見擢殿中丞賜金紫入朝擢兼侍御史正己署爲淄青二州刺史又爲行軍司馬濮徐兗沂海留後進御史大夫正己死秘喪不發以兵會田悅于濮陽馬燧方擊悅納使大將衛俊救之爲燧所破略盡收洹水德宗詔諸軍合討其從父洧以徐州歸大將李士真以德州李長卿以棣州送款納志洧背己且徐險悉集兵攻洧帝命宣武劉玄佐督諸軍進援大破其兵納還濮陽玄佐進圍之殘其郛納登陴見玄佐泣且悔遣判官房說與子弟質京師因玄佐謝罪時中人宋鳳朝以納窮欲立功建不可赦帝乃械說等禁中納於是還郛與悅李希烈朱滔王武俊連和自稱齊王置百官興元初帝下詔罪己納復歸命授檢校工部尚書復平盧帥節賜鐵券又同中書門下平章事封隴西郡王希烈圍陳州納會諸軍破之城下加檢校司空實封五百戶進檢校司徒死年三十四贈太傅子師古師道師古以蔭累署青州刺史納死軍中請嗣帥詔起爲右金吾衛大將軍本軍節度使初棣州有蛤蜊鹽池歲產鹽數十萬斛李長卿以州入朱滔獨蛤蜊爲納所據以專利後德棣入王武俊納乃築壘德州南踞河以守蛤蜊謂之三汭通魏博以交田緒盜掠德州武俊患之師古始襲武俊易其弱且納時將無在乃率兵取蛤蜊三汭師古使趙鎬拒戰武俊子士清兵先濟滴河會營中火起士大譟不敢前德宗遣使者

諭武俊罷兵師古亦驢三汭聽命嘗怒其僚獨孤遣使奏事京師遣大將王濟縊殺之貞元末與杜佑李樂皆得封妾媵以國爲夫人進同中書門下平章事德宗崩哀使未至義成節度使李元素騰遺詔示之師古幸國喪欲攻掠州縣卽集將士告元素僞作遺詔豈欲反耶不可不討執使者名討元素勒兵出次開順宗立乃罷累加檢校司徒兼侍中元和初卒贈太傅

師道異母弟也師古嘗曰是不更民間疾苦要令知衣食所從乃署知密州師古病召親近高沐李公度等曰卽我不諱欲以誰嗣二人未對師古曰豈以人情屬師道邪彼不服戎以技自尙慮覆吾宗公等審計之及死沐公度與家奴卒立之而請于朝於是制書久不下師道謀裒兵守境沐爭止更上書奉兩稅守鹽法請吏朝廷宰相杜黃裳欲擿削其權而憲宗方誅劉闢未皇東討故命建王審領節度大使而以師道知留後歲中加檢校工部尚書爲副大使自正己以來雖外奉王命而囁引亡叛有得罪于朝者厚納之以嚴法待下凡所付遺必質其妻子有謀順者類夷其家以故能脅汙士衆傳三世云帝討蔡詔興諸道兵而不及郛師道選卒二千抵壽春陽言爲王師助實欲援蔡也亡命少年爲師道計曰河陰者江淮委輸河南帝都請燒河陰敖庫募洛壯士劫宮闕卽朝廷救腹心疾此解蔡一奇也師道乃遣客燒河陰漕院錢三十萬緡米數萬斛倉百餘區又有說師道曰上雖志討蔡謀皆出宰相而武元衡得君願爲



袁盎事後宰相恐懼請罷兵是不用師蔡圍解矣乃使人殺元衡傷裴度初師道置邸東都多買田伊闕陸渾間以舍山棚遺將皆嘉珍門察部分之嵩山浮屠圓靜爲之謀元和十年大饗士邸中椎牛醜酒既衷甲矣其徒白官發之留守呂元膺以兵掩邸賊突出轉略畿部入山中數月奪山棚所市山棚怒道官軍襲擊盡殺之圓靜者年八十餘嘗爲史思明將驍悍絕倫既執力士椎其脛不能折罵曰豎子折人脚且不能乃曰僊兒因自置其足折之且死歎曰敗吾事不得見洛城流血於時留守防禦將都亭驛吏數十人皆陰受師道署職使爲詞察故無知者及窮治嘉珍察乃害武元衡者鹽鐵使王播又得嘉珍所藏弓材五千并斷建陵戟四十七始師道欲知元濟虛實使劉晏平間道走淮西元濟日與晏厚結歡晏平歸以爲元濟暴師數萬而晏然居內與妻妾戲博必敗之道師道本倚蔡爲重聞之怒乃以它事殺晏平及聞李光顏拔凌雲柵始大懼遣使歸順帝重分兵支兩寇故命給事中柳公綽慰撫之加檢校司空蔡平又遣比部員外郎張宿諷令割地質子宿謂曰公今歸國爲宗姓以尊卑論之上叔父矣不屈一也以十二州事三百餘州天子北面稱藩不屈二也以五十年傳爵臣二百年天子不屈三也今反狀已暴上猶許內省宜遣子入宿衛割地以贖罪師道乃納三州遣子弘方入侍宿既還師道中悔召諸將議皆曰蔡數州戰三四年乃克公今十二州何所虞大將崔承度獨進曰公初不示諸將腹心而今委以兵此皆

嗜利者朝廷以一舉十餅誘之去矣師道患承度詣京師戒候吏待其還斬之承度待命客省不敢還帝以其負約用左散騎常侍李遜喻旨既至師道嚴兵以見遜讓曰前已約而今背之何也願得要言奏天子師道許之然懦暗不自決私奴婢媼爭言先司徒土地奈何一旦割之今不獻三州不過戰耳卽不勝割地未晚師道乃上書以軍不協爲解帝怒下詔削其官詔諸軍進討武靈節度使李愿使將王智興破其衆斬二千級獲馬牛四千略地至平陰橫海節度使鄭權戰福城斬五百級武靈將李祐戰魚臺敗之宣武節度使韓弘拔考城淮南節度使李夷簡命李聽趨海州下汴陽胸山進戍東海魏博節度使田弘正身將兵自陽劉濟河拒鄆四十里而營再接再戰破三萬衆禽三千人陳許節度使李光顏攻濮陽收斗門杜莊二屯弘正又戰東阿殘其衆五萬師道每聞輒悸成疾及李祐取金鄉左右莫敢白初遣大將劉悟屯陽穀當魏博軍疑其逗留悟懼不免引兵反攻城師道晨起聞之白其嫂裴曰悟兵反將求爲民守墳墓卽與弘方匿濶間兵就禽之師道請見悟不許復請送京師悟使謂曰司空今爲囚何面目見天子猶俯仰祈哀弘方曰不若速死乃并斬之傳首京師棄其尸無敢收視者有士英秀爲殯城左馬總至以士禮更葬初師古見劉悟曰後必貴然敗吾家者此人也田弘正之度河也禽其將夏侯澄等四十七人有詔悉赦之給繒絮遺隸魏博義成軍父母在欲還者優遣賊皆感慰相告由是悟得行其謀師道



首傳弘正營召澄驗之澄祇目中塵號絕良久悟素與師道妻魏亂妄言鄭公徵之裔不死沒入掖廷它宗屬悉遣徙悟獨表師古子明安爲朗州司戶參軍親將王承慶承宗弟也師道以兄女妻之潛約左右欲因肄兵執師道會悟入出奔徐州歸朝

程日華定州安喜人始名華德宗以其有功益曰日華父元皓爲安祿山賊下僞署定州刺史故日華籍本軍爲張孝忠牙將滄故成德部州也孝忠絕李惟岳德宗以滄昇義武前刺史李固烈與惟岳姻屬卽牢守孝忠令日華往喻之固烈請還恆州既治裝悉帑以行軍中怒曰馬瘠士饑死刺史不棄豪髮卽吾急今刮地以去吾等何望遂共殺固烈屠其家日華驚匿牀下將士迎出之曰暴吾軍者已死何畏而亡共逼領州孝忠亦以日華寬厚遂假以刺史朱滔叛兵屯河間以故滄定道阻不相聞滔及王武俊皆招日華不納卽攻之日華乘城自固參軍事李宇謀曰城久圍府兵不爲援今州十縣瀕海有魚鹽利自給此軍本號橫海將軍能絕易定歸天子自爲一州敕甲訓兵利則出無利則守可充盜喉襟君能用僕計請至京師爲天子言之日華謂然乃遣宇西帝果大喜拜御史中丞滄州刺史復置橫海軍卽以爲使時建中三年也拜檢校工部尙書詔滄歲饋義武錢十二萬緡糧數萬斛以宇爲判官武俊欲得滄遣人說日華歸己日華給曰敝邑爲賊攻力屈則下之願假騎二百以抗賊賊退請以地授公武俊喜歸之馬日

華留馬謝其使武俊大怒與滔方睦懼有怨乃止久之武俊歸命日華乃還馬以珍幣厚謝復結好武俊亦釋然貞元二年卒贈兵部尙書子懷直擅知留事帝以日華故卽拜權知滄州刺史宇入朝願析東光景城二縣置景州且請刺史河朔刺史不廷授幾三十年帝嘉其志以徐申爲景州刺史昇橫海軍爲節度擢懷直爲留後明年爲節度使九年來朝寵遇加等進檢校尙書右僕射賜大第宮女懷直荒田獵出輒數日不返帳下程懷信乘衆怒閉門不納懷信其從昆也於是懷直入朝帝不之罪更以虔王爲節度使擢懷信留後以懷直兼右龍武軍統軍明年懷信爲節度矣十六年懷直卒贈揚州大都督後五年懷信死子權襲領軍務詔授留後元和元年拜節度使累進檢校兵部尙書封邢國公六年入朝憲宗寵禮遣還鎮加檢校尙書右僕射權始名執恭嘗夢滄諸門悉署權字乃改名以應之及淮西平惕不安丐入朝至京師固辭軍政乃詔華州刺史鄭權代之後以檢校司空爲邠寧節度使卒贈司徒宗族奉朝請宿衛者三十餘人

李全略本王昆名日簡事王武俊爲偏裨承宗時虐用其軍故入朝授代州刺史田弘正遇害穆宗以全略故鎮州將召問所欲言全略多陳利害冀合帝意且請盡死力以報遂授德州刺史是時杜叔良兵敗博野故以全略爲橫海軍節度滄德棣州觀察使賜今姓名未幾貢錢千萬使子同捷入朝旣還卽奏同



捷爲滄州長史押中軍兵馬帝不得已可其請全略陰規傳久計選材武以所私結士心棣州刺史王稔善撫衆而家富于財全略內忌以計殺之族其家未幾死同捷領留後事重賂鄰藩求領父節敬宗持久詔不下俄而文宗立同捷以帝新嗣位必大開貸示四方乃遣弟同志同異入朝而使其屬崔長奉表請命有詔拜兗海節度使以烏重胤代之同捷計窮矯言軍中留已於是王智興請以全軍出討魏博史憲誠令大將傅手詔入于軍同捷不受德棣民多奔入鄆乃下詔削官爵命重胤率鄆齊兵進討憲誠智興及汴滑李聽平盧康志睦易定張璠幽州李載義以兵傅境同捷自以與成德有舊乃傾玉帛子女市河北三鎮驩載義不許絕其交執使者并所遺奴婢四十七獻諸朝王廷湊本關橫海欲乘其隙取之引軍來援智興攻棣州火譙門引水灌城凡七月其將張叔連降始刺史樂濛以同捷叛密上變事洩爲所害贈工部尙書智興進圍滄州是時帝絕王廷湊朝貢且討之兵須夥繁調發不時始置供軍糧料使以濟兩河諸將又多張俘首以冒賞自重胤卒後李寶傳良弼不終事更以左金吾衛大將軍李祐代而智興將李君謀以輕兵絕河夜殘無棣降饒安壁五千兵明年祐拔無棣平原有詔行營堅壁務農非被襲勿決戰而祐兵已薄德州帝遣諫議大夫柏耆宣慰祐攻拔德州餘卒奔廷湊同捷益急乞降祐疑其詐者引兵直入城取同捷及家屬馳西祐入滄州者至將陵斬同捷使其下傳首京師詔貸四州一年租賦赦

同捷母并妻息徙湖南流崔長商州同異等以異母貸死得隨母流所云



唐書卷二百十三

唐書卷二百十三考證

李正己子師道命給事中柳公綽慰撫之○臣酉按舊書遣公綽慰撫在蔡平之後新書在未平之前未

知孰是

使將王智興破其眾鄭權戰福城斬五百級○臣酉按舊書李愿破賊在十年十二月鄭權破賊在十三年七月新書連類書之似一時事矣



唐書卷二百十三考證

唐書卷二百十四

宋 端 明 殿 學 士 宋 祁 撰

列傳第一百三十九

藩鎮宣武彰義澤潞

劉玄佐滑州匡城人少倜儻不自業為縣捕盜犯法吏笞辱幾死乃亡命從永平軍稍為牙將大厯中李靈曜據汴州反玄佐乘其無備襲取宋州有詔以州遂隸其軍節度使李勉即表署刺史德宗建中初進兼御史中丞充宋毫穎節度使時李納叛李洧以徐州歸納急攻之詔玄佐援洧大破納兵斬首萬餘級東南鎮澤乃通進圍濮州徇濮陽皆下再降其守將遂通濮陽津遷檢校兵部尚書兼曹濮觀察淄青兗鄆招討使汴滑都統副使李希烈之反玄佐與李勉陳少游哥舒曜聯兵屯淮汝數困賊帝在奉天垂意關東乃詔檢校尚書左僕射同中書門下平章事希烈攻陳州玄佐救之希烈走遂進取汴州詔加汴宋節度使陳州諸軍行營都統玄佐本名洽至是賜名以尊寵之入朝復兼涇原四鎮北庭兵馬副元帥檢校司徒性豪縱輕財好厚賞故下益用汴自李忠臣以來士卒驕不能自還至玄佐彌甚其後殺帥長大鈔劫狃于利而然也玄佐貴母尚在賢婦人也常月織絁一端示不忘本數教敕玄佐盡臣節見縣令走



延中白事退戒曰長吏恐懼卑甚吾思而父吏於縣亦當爾而據案當之可安乎玄佐感悟故待下益加禮汴有相國寺或傳佛軀汗流玄佐自往大施金帛於是將吏商賈奔走輸金錢惟恐後十日玄佐敕止籍所入得巨萬因以贖軍其權譎類若此初李納遣使至汴玄佐盛飾女子進之厚饋遣皆得其陰謀故納最憚之所寵吏張士南及假子樂士朝皆巨萬而士朝私玄佐嬖妾懼事覺醜玄佐死年五十八贈太傅諡曰壯武軍中匿喪俟代帝亦為隱踰三日乃發喪使至帝問所欲立曰陝虢觀察使吳濬可乎監軍孟介行軍盧瑗以為便乃拜濬為節度使至汜水玄佐柩將遷士請具禮瑗不許眾皆怒陵晨甲而謀起玄佐子士寧於喪使坐重榻墨其衣尊為留後殺大將曹金岸浚儀令李邁醢之唯瑗介獲免士寧乃出財分勞吏士介以聞帝召宰相計議實多曰汴人挾李納以邀命若不許勢且合不可解遂以士寧為左金吾衛將軍嗣節度始玄佐養子士幹與士朝皆來京師士幹知玄佐死無狀遣奴持刀給為弔入殺士朝於次帝惡其專亦賜士幹死士寧未授詔時私遣人結王武俊劉濟田緒等諸鎮不直之皆執其使而士寧忍暴嘗手殺人杯案間又彊烝父諸妾逼吏民妻女亂之或羸而觀每畋獵數日乃還其下厭苦不服大將李萬榮者故與玄佐同里相善寬厚得士心士寧忌之奪其兵使攝州事嘗引眾二萬畋城南未還萬榮晨入府召所留親兵告曰天子有詔召大夫俾我代節度人賜錢三萬士皆拜於是分兵閉

諸門使告士寧曰詔書召大夫宜速去不然事急且傳首以獻士寧知眾不與將五百騎出奔次中牟亡者已半至東都惟僮妾數十人從之既至京師詔就第禁出入萬榮斬其支附數十人以二十萬緡勞軍詔籍士寧家貲給之拜萬榮兵馬留後於是籍驕兵數百人悉遣西防秋當戍者怨之大校韓惟清張彥琳等請往不許使其子迺將未行彥琳等因其怨誘使反攻萬榮不勝劫運財民貲殺掠數千人而潰惟清奔鄭州彥琳走東都自歸有詔宥死竄惡地殘士奔宋州劉逸准撫之萬榮悉誅其妻子以故眾不安或呼於市曰大軍至城且破萬榮捕殺之或言為士寧所教萬榮斬之以狀聞故士寧斥置郴州俄進萬榮節度使會病甚以兵屬鄧惟恭惟恭者與萬榮同里閤而署子迺為司馬出大將李湛張仵伊婁況等于外欲殺之不果萬榮死是夜惟恭與監軍俱文珍執迺送京師杖死京兆府以董晉代之

吳少誠幽州潞人以世廢為諸王府戶曹參軍事客荆南節度使庾準器之留為牙門將從入朝道襄陽度梁崇義必叛密畫計將獻天子而李希烈以其事聞有詔嘉美擢封通義郡王崇義反希烈以少誠為前鋒事平賜實封戶五十希烈叛少誠為盡力及死推陳仙奇主後務既又殺之眾乃共推少誠德宗因授申蔡光等州節度觀察留後少誠為治能儉損完軍實自希烈以來申蔡人劫於苛法而忘所歸及耆長既物故則壯者習見暴掠恬於搏鬪地少馬乘驟以戰號驟子軍尤悍銳甲皆畫雷公星文以厭勝詛



王師其屬鄭常楊冀欲劫少誠逐之以聽命不克常冀被害少誠盡有諸將以結衆心貞元五年進拜節度使久之曲環卒少誠間陳許無帥以兵攻臨潁戍將韋清與賊通留後上官況遣兵三千救之悉爲賊俘遂圍許州德宗怒削少誠官爵合十六道兵進討于頔以襄陽兵戰吳房朗山禽其三將王宗以壽州兵破賊於秋柵於時師雖衆無統帥而宦人監軍顯進退互爲異見既戰小澗河諸道師未交而潰棄輜仗不贊帝乃詔夏州節度使韓全義爲淮蔡招討處置使上官況副之諸將皆受節度與賊吳少陽等戰廣利城師復敗退營五樓爲賊所乘遂大潰全義及監軍賈英秀等夜遯保澗水汴宋徐泗淄青兵走陳州少誠薄澗水而營全義懼退保陳而潞滑河陽河中兵逃歸唯陳許將孟元陽神策將蘇光榮鹽澗水全義乃斬潞將夏侯仲宣滑將時昂河陽將權文度河中將郭湘欲以振師不能也少誠引兵還全義之敗少誠得帳中諸公書數百番持以給衆曰朝廷公卿託全義破蔡日掠將士妻女爲婢媵以激怒其衆絕向順意少誠弱王師移書於英秀求昭雪帝召大臣議宰相賈耽曰五樓軍退而少誠卷甲不追有自新路帝意稍挺少誠復固巢穴矣然猶以宦者監諸道軍劍南韋臯上言以爲不如擇重臣爲統帥因薦渾瑊賈耽陛下若重煩元老更求其次則臣請以銳士萬人順流趨荆楚可以攘弱元愨不然因其請罪特加原洗罷兩河諸軍亦其次也使少誠禍盈惡周變生帳下必其賊黨又當以官爵與之則一少誠

死一少誠生亦何足賴帝遂赦少誠盡還其官爵順宗卽位進同中書門下平章事檢校司空徙封濮陽郡王元和四年死贈司徒而吳少陽代之

少陽者滄州清池人與少誠同在魏博軍相友善少誠得淮西多出金帛邀之養以爲弟嘗右職親近無間少陽度少誠猜忍且畏禍請爲外捍少誠乃表爲申州刺史爲治尙寬易舉軍附賴少誠病亟家奴單于熊兒矯召少陽至攝副使總軍事於是殺少誠子元慶自稱留後憲宗以王承宗方叛故詔遂王爲節度使以少陽領留後居三年進拜節度使少陽不立繇役籍隨日賦歛於人地多原澤益畜馬時時掠壽州茶山劫商賈招四方亡命以實其軍不肯朝然屢獻牧馬以自解帝亦因善之九年死子元濟匿不發喪以病聞僞表請元濟主兵帝遣太醫往視卽陽言少愈不得見元濟者其長子也山首燕頰垂頤鼻長六寸始仕試協律郎攝蔡州刺史有董重質者少誠壻也勇悍久將善爲兵元濟倚之因說元濟請以精兵三千由壽之間道取揚州東約李師道以舟師襲潤州據之遣奇兵掩商鄧取嚴綬進守襄陽以搗東南則荆衡黔巫傳一矢可定五嶺非朝廷所有又請輕兵五百自嶠嶺三日襲東都則天下騷動可以橫行元濟猶豫不能用先是其屬蘇兆楊元卿侯惟清嘗勸少陽入朝或言其有異志元濟縊兆歸其屍而囚惟清帝以二人者皆死故贈惟清兵部尙書兆尙書右僕射時元卿奏事在長安見宰相李吉甫具言



淮西事且請蔡使在道者隨在所繫之少陽死四日帝不為報朝易將增戍以須變會傳言重質殺元濟族其家吉甫因請為少陽報朝遣使弔賻贈尚書右僕射而元濟不得命乃悉兵四出焚舞陽及葉掠襄城陽翟時許汝居人皆竄伏榛莽間剽掠千餘里關東大恐弔使至弗克入而還乃詔烏重胤兼汝州刺史引軍壓其境靈州刺史曹華為之副以戍襄城李光顏為忠武節度使總兵臨屯析山南東道詔節度使嚴綬為申光蔡等州招撫使以中人崔潭峻監其軍下詔奪元濟官爵趣諸道進討時大旱詔既下兩雲凡三日田弘正韓弘各遣子率兵隸綬光顏軍綬屯蔡西鄙師小勝不設備為賊襲敗于礪上退保唐州壽州刺史令狐通戰數北賊乃拔霍丘屠馬塘通嬰城不敢出詔左金吾衛大將軍李文通宣慰度其至使代通會裴度輔政賊始懼而元濟不能有所指授諸將趙昌浚朝江董重質李祐李憲王覽趙暉王仁清等以便宜人自為戰抗王師有少誠少陽舊風而李師道醜醜出入靈陵雍丘間韓弘知而不肯禁文通引兵與賊將王覽董重質戰史族岡賊覽首光顏又大破賊於時曲復與重胤合擊賊小潑河敗之夷其屯塹天子責綬失律更以韓弘兼都統擢高霞寓唐鄧隋節度使十一年諸軍大合光顏壁寧河交通敗賊於固始拔整山霞寓戰朗山斬首千餘級焚其壁次鐵城賊偽奔霞寓窮追伏發死傷略盡退保新興賊圍之監軍李謙誠馳入唐州以救兵至圍解還守唐州元濟以霞寓敗不足虞併兵以備陳其

秋文通以兵銜枚夜出九女原屠保壁三十所分兵西北並安陽山破屯邏數百人降者萬餘執兩將光顏敗鄆城兵二萬俘大將復與重胤合攻凌雲柵拔之帝怒諸軍無大功詔內常侍梁守謙宣慰因督戰付詔書五百以待有功斥金帛募死士進拜光顏檢校尚書左僕射重胤右僕射度御史中丞公武御史大夫詔旨約束厲賞罰諸將恐懼貶霞寓以袁滋代之滋懦不能軍更以李愬為唐鄧隋節度使元濟食盡士卒食菱茨魚鼈皆竭至斲草根以給者民苦饑相與四潰元濟亦嗇其食不復禁諸將爭納之帝始僑置鄆城吳房於行營以綏新附愬引兵攻其西破屯柵十餘所執丁士良吳秀琳皆賊票健者賊帥張伯良以兵三萬與光顏戰鄆城大敗獲馬千匹甲三萬首伯良奔還蔡曹華取青陵城斷鄆歸路賊將鄧懷金懼即送款光顏受之愬又襲破朗山執戍將梁希果平汶港等三壁元濟知眾數潰而外失秀琳等因奉表請束身北闕下帝遣使者許以不死元濟取行營馬三百董重質不與故不果降愬略興橋得守將李祐不殺引至帳下計議始謀襲蔡賊勢益沮自少誠盜有蔡四十年王師未嘗傳城下又嘗敗韓全義于頓以是兵驕無所憚內恃破寢重阻故合天下兵攻之三年纔克一二縣帝既責罷霞寓滋等諸將乃用命詔起沙陀鼻騎濟師命裴度為彰義節度兼申光蔡四面行營招撫使梁守謙與諸將計先度未至立功諸將亟戰不勝度至大勞將士皆感激請戰間遣士入蔡約元濟降為左右所劫不得降光顏每



戰冠軍故元濟悉衆亢時曲祐爲愬謀曰蔡之守者市人疲卒耳勁兵皆在外若直擣縣瓠賊成爲矣愬然之以精騎夜襲蔡坎垣入之戍者不知也賊恃董重質兵在涇曲不虞師之至及愬攻內城防卒尙千餘接戰元濟始驚被甲乘城以待重質會重質降愬而李進誠取賊庫兵卽攻之明日燒其門民相率抱薪增火王師縱射城上鏃可拾也居二日門壞執元濟舉族傳之長安申光戍兵尙三萬皆降帝御興安門受俘羣臣稱賀以元濟獻廟社徇于市斬之年二十五夜失其首妻沈沒入掖庭二弟三男子流江陵皆殺之斬其屬官劉協庶趙曄王仁清等十餘人度還以馬總爲留後俄拜節度使析潁州隸陳許始度之出太子右庶子韓愈爲行軍司馬帝美度功卽命愈爲平淮西碑其文曰天以唐克肖其德聖子神孫繼繼承承於千萬年敬戒不怠全付所覆四海九州罔有內外悉主悉臣高祖太宗旣除旣治高宗中睿休養生息至于玄宗受報收功極熾而豐物衆地大孽牙其間肅宗代宗德祖順考以勤以容大厯適去黃莠不穉相臣將臣文恬武嬉習熟見聞以爲當然睿聖文武皇帝旣受羣臣朝乃考圖數貢曰嗚呼天旣全付予有家今傳次在予予不能事事其何以見于郊廟羣臣震懼走職明年平蜀又明年平江東又明年平澤潞遂定易定致魏博貝衛澶相無不從志皇帝曰不可究武子其少息九年蔡將死蔡人立其子元濟以請不許遂燒舞陽犯葉襄城以動東都放兵四劫皇帝歷問于朝一二臣外皆曰蔡帥之不廷

授于今五十年傳三姓四將其樹本堅兵利卒頑不與它等因撫而有順且無事大官臆決唱聲萬口和附并爲一談牢不可破皇帝曰惟天惟祖宗所以付任予者庶其在此予何敢不力况一二臣同不爲無助曰光顏汝爲陳許帥維是河東魏博邵陽三軍之在行者汝皆將之曰重胤汝故有河陽懷今益以汝維是朔方義成陝益鳳翔鄜延靈慶七軍之在行者汝皆將之曰弘汝以卒萬二千屬而子公武往討之曰文通汝守壽維是宣武淮南宣歙浙西泗泗五軍之行于壽者汝皆將之曰道古汝其觀察鄂岳曰愬汝帥唐鄧隋各以其兵進戰曰度汝長御史其往視師曰度惟汝予同汝遂相予以賞罰用命不用命曰弘汝其以節都統諸軍曰守謙汝出入左右汝惟近臣其往撫師曰度汝其往衣服飲食予士無寒無饑以旣厥事遂生蔡人賜汝節斧通天御帶衛卒三百凡茲廷臣汝擇自從惟其賢能無憚大吏庚申予其臨門送汝曰御史予閔士大夫戰甚苦自今以往非郊廟祀無用樂顏屠武合攻其北大戰十六得柵城縣二十三降人卒四萬道古攻其東南八戰降萬三千再入申破其外城文通戰其東十餘遇降萬三千愬入其西得賊將輒釋不殺用其策戰比有功十二年八月丞相度至師都統弘責戰益急顏屠武戰益用命元濟盡并其衆涇曲以備十月壬申愬用所得賊將自文城因天大雪疾馳百二十里用夜半到蔡破其門取元濟以獻盡得其屬人卒辛巳丞相度入蔡以皇帝命赦其人淮西平大饗資功師還之日因



以其食賜蔡人凡蔡卒三萬五千其不樂爲兵願歸爲農者十九悉縱之新元濟京師冊功弘加侍中愬爲左僕射帥山南東道顏肅皆加司空公武以散騎常侍帥鄜坊丹延道古進大夫文通加散騎常侍丞相度朝京師進封晉國公進階金紫光祿大夫以舊官相而以其副總爲工部尙書領蔡任既還奏羣臣請紀聖功被之金石皇帝以命臣愈愈再拜稽首而獻文曰唐承天命遂臣萬方孰居近土襲盜以狂往在玄宗崇極而地河北悍驕河南附起四聖不宥屢興師征有不能克益戍以兵夫耕不食婦織不裳輸之以車爲卒賜糧外多失朝曠不岳狩百隸怠官事亡其舊帝時繼位顧瞻咨嗟惟汝文武孰恤予家既斬吳蜀旋取山東魏將首義六州降從淮蔡不順自以爲疆提兵叫謹欲事故常始命討之遂連姦鄰陰遣刺客來賊相臣方戰未利內驚京師羣公上言莫若惠來帝爲不聞與神爲謀及相同德以訖天誅乃敕顏肅愬武古通咸統於弘各奏汝功三方分攻五萬其師大兵北乘厥數倍之嘗兵時曲軍士蠢蠢既翦凌雲蔡卒大窘勝之邵陵鄖城來降自夏及秋復屯相望兵頓不勵告功不時帝哀征夫命相往釐士飽而歌馬騰於槽試之新城賊遇敗逃盡抽其有聚以防我西師躍入道無留者額額蔡城其疆千里既入而有莫不順俟帝有恩言相度來宣誅止其魁釋其下人蔡之卒夫投甲呼舞蔡之婦女迎門笑語蔡人告饑船粟往哺蔡人告寒賜以繒布始時蔡人禁不往來今相從戲里門夜開始時蔡人進戰退戮今

眠而起左滄右粥爲之擇人以收餘德選吏賜牛教而不稅蔡人有言始迷不知今乃大覺羞前之爲蔡人有言天子明聖不順族誅順保性命汝不吾信視此蔡方孰爲不順往斧其吭凡叛有數聲勢相倚吾疆不支汝弱奚恃其告而長而父而兄奔走偕來同我太平淮蔡爲亂天子伐之既伐而饑天子活之始議伐蔡卿士莫隨既伐四年小大並疑不赦不疑由天子明凡此蔡功惟斷乃成既定淮蔡四夷畢來遂開明堂坐以治之愈以元濟之平繇度能固天子意得不赦故諸將不敢首鼠卒禽之多歸度功而愬特以入蔡功居第一愬妻唐安公主女也出入禁中訴愈文不實帝亦重悟武臣心詔斷其文更命翰林學士段文昌爲之李祐以功遷神武將軍賜田宅米粟帝迹董重質教元濟亂欲誅之而李愬先許不死故貶春州司戶叅軍凌朝江播州司戶叅軍是歲申蔡州始輸貢物戶部以其久不至請元日陳於廷祐字慶之後擢夏綬銀宥節度使徙涇原討李同捷也改滄德景節度累檢校尙書左僕射重質之貶未幾轉太子少詹事隸武靈軍遷左神武將軍資金幣與功臣等擢累左右神策劍南西川行營節度使歷帥夏綬銀宥訓兵有法羌戎畏服終右龍武統軍贈尙書右僕射

劉悟其祖正臣平盧軍節度使襲范陽不克死叔父全諒節度宣武器其敢毅署牙將以罪奔潞州王處休復署爲將被病去還東都全諒積緡錢數百萬在焉悟破鑿緡用之從惡少年殺人屠狗豪橫犯法繫



河南獄留守韋夏卿貸免李師古厚幣迎之始未甚知後從擊韋軒然馳突撞師古馬仆師古恚將斬之  
悟盛氣以語觸師古不懼師古奇其才令將後軍妻以從媚厯牙門右職師道以軍用屈率賈人錢爲助  
命悟督之悟獨寬假人皆歸賴師道被討使將兵屯曹法一而信士卒樂爲用軍中刁斗不鳴田弘正兵  
屯陽穀悟徙營潭趙魏師踰河取盧縣壁阿井城中飛語以謂馮利涉與悟當爲帥師道內疑數召悟計  
事悟曰今與魏如角力者勢已交先退者負悟還魏踵薄城下矣左右諫曰兵成敗未可知殺大將孰肯  
爲用師道然之或言悟且亂不如速去師道遣使兩輩來責戰密語其副張暹使斬悟使者與暹屏語移  
時悟疑之暹以情告悟乃斬使者召諸將議曰魏博兵彊出則敗不出則死且天子所誅司空而已吾屬  
爲驅迫就死地孰若還兵取郛立大功轉危亡爲富貴乎衆皆唯唯而別將趙垂棘沮其行悟因殺之并  
殺所惡三十人尸帳前衆畏伏下令曰入郛人賞錢十萬聽復私怨財蓄恣取之唯完軍帑違者斬因遣  
報弘正使進兵潭趙悟夜半薄西門遂明啟而入殺師道并大將魏銑等數十人卽拜悟義成節度使封  
彭城郡王實封戶五百元和十五年來朝進檢校兵部尚書穆宗立徙昭義軍朱克融亂議者假威名以  
厭其亂移守盧龍至邢州會王庭湊之變不得入還屯進兼幽鎮招討使治邢州圍臨城觀望久不拔與  
監軍劉承偕不叶衆辱悟縱其下亂法悟不堪其忍承偕與都將張問謀縛悟送京師以問代節度事悟

知之以兵圍監軍殺小使其屬賈直言質責悟曰李司空死有知使公所爲至此軍中將復有如公者矣  
悟遽謝曰吾不欲聞李司空字少選當定卽擄兵退置承偕囚之帝重違其心貶承偕然悟自是頗專肆  
上書言多不恭天下負罪亡命者多歸之彊列其冤累進檢校司徒同中書門下平章事竇厖初巫者妄  
言師道以兵屯瑠璃陂悟惶恐命禱祭具千人膳自往求哀將易衣嘔血數斗卒贈太尉表其子從諫嗣  
從諫母微賤少狡獪師道時使悟出屯署從諫門下別奏從諫與師道諸奴日戲博交通具知其陰密事  
悉疏于悟故悟得立功悟卒從諫知留後持金幣賂當權者朝議謂上黨內鎮與河朔異不可許左僕射  
李絳奏言悟匿死衆不必同亂從諫威惠未著若詔北鎮大將領節度馳入軍管其未備使軍情有屬謀  
自屈矣有如拒命三州勢難獨存數月可覆時李逢吉王守澄納其賂數爲請敬宗乃以晉王爲節度大  
使詔從諫主留事起將作監主簿檢校左散騎常侍晉王帝所愛從諫饋獻相望未幾拜節度使太和初  
李聽敗館陶走淺口從諫引鐵騎黃頭郎救之聽免進檢校尚書左僕射拜司空封沛國公昭義自悟時  
治邢州而人思上黨從諫還治潞悟苛擾從諫寬厚故下益附方年壯思立功六年請入朝文宗待遇加  
等明年還藩進同中書門下平章事公卿多託以私又見事柄不一遂心輕朝廷有驕色李訓約從諫誅  
鄭注及甘露事宰相皆夷族傳言死非其罪從諫不平三上書請王涯等罪譏切中人時宦豎得志天子



賜鄭覃李石新執政藉其論執以立權綱中人憚而怨之又劾奏蕭本非太后弟仇士良積怒倡言從諫志窺伺從諫亦妄言清君側因與朝廷猜貳武宗立兼太子太師性奢侈飾居室與馬無遠略善貿易之算徙長子道入潞歲權馬征商人又熬鹽貨銅鐵收緝十萬賈人子獻口馬金幣卽署牙將使行賈州縣所在暴橫查貪賈子貸錢吏不應命卽愬于從諫欲論奏或遣客游刺故天下怨怒從諫畜馬高九尺獻之帝帝不納疑士良所沮怒殺馬益不平又聞士良寵方渥愈憂惑欲自入朝恐不脫禍因被病卒年四十一贈太傅初大將李萬江者本退渾部李抱玉送回紇道太原舉帳從至潞州牧津梁寺地美水草馬如鴨而健世所謂津梁種者歲入馬價數百萬子弟姻婭隸軍者四十八人從諫徙山東懼其重遷且生變而子弟亦豪縱少從諫不甚禮因誣其叛夷三族凡三百餘家姬妾有微過輒殺之人皆知其將亡從子稹父從素仕右驍衛將軍從諫以爲嗣病甚與妻裴謀令主軍事置大將王協郭誼劉武德劉守義等佐稹秘不發喪協謀遣將姜岑請醫於朝中人與醫至時從諫死已再旬稹曰公困革不任受詔稹請代拜中人曰臥而視可也辭以母夫人侍不可屏中人欲直入武德等戶之中人恐其變趨出貺饋百萬後使者繼往爲知從諫已死者未至數舍衆懼武德與將董可武出兵萬人迎勞至牙門不得前諸將乃詣監軍崔士康邀說請如河朔故事士康懦不敢拒乃至喪次扶出稹爲裏緇巾曰母更欲殺敕使諸將哄

然笑遂出見三軍帝怒前使者不入譴隸恭陵稹所遣姜岑梁叔文梁叔明三輩皆杖死京兆府詔從素書敕稹護喪還東都稹不奉詔羣臣議李德裕建言稹所恃者河朔耳若遣大臣諭上旨出山東兵破之必矣有詔奪從諫稹官敕諸軍進討於是河陽王茂元以兵屯萬善河東劉沔守昂車關壁榆社魏博何弘敬柵肥鄉侵平恩成德王元逵次臨洛略任堯山向城河中陳夷行營冀城侵冀氏茂元別遣將營天井關爲賊將薛茂卿所破執四將火十七柵張巨進攻萬善不能下茂元欲走會日暮賊自潰去詔忠武王宰以本軍入懷澤行營陳許士稟武賊衆素憚畏而茂卿負戰勝冀厚賞或言其兵犯王略深朝廷且怒節益不可至稹然之故茂卿失望乃與宰通卽僞挑戰亟北委天井關去左右七營皆潰茂卿奔澤州使謀言於宰曰澤可取吾應於內宰疑不進失期茂卿扼腕悵恨稹聞其貳召誅之宰進破劉公直拔陵川劉沔又取石會關李石代沔領河東稹因石兄洛州刺史恬移書乞降石以聞右拾遺崔碣表請納之帝怒斥碣鄧城令詔敢言罷兵者戮賊境上令石答書許稹面縛石馳往受之稹不出俄而太原將楊弁逐李石與稹連和稹諸將建議我求承襲彼叛卒若與之是與反者械其使送京師使康良佺屯鼓腰嶺敗太原兵生禽卒七百帝猶不赦始從諫將死命稹無管辱羣奴故李士貴等與王協尤用事士戰有功不賞下無鬪志府中財貨尚山積而協請稅商人使劉溪等分出檢實而溪并齊民閱其貲十取二百



姓始怨從諫妻弟裴問守邢州有募兵五百號夜飛將多豪姓子其家以輸貲不時爲溪所囚問以爲言  
溪大怒問因殺溪與刺史崔暉斬大將自歸成德軍王鈞守洛州給士幣布一端積檄代歲粟鈞謂衆曰  
庫物尙多欲發以爲賞可乎士皆喜悉所有給之送款魏博軍磁州將高玉堯山將魏元談等以次降成  
德元達以久爲賊守殺之積聞三州降大懼大將郭誼與王協始議圖積使董可武誘積至北第置酒飲  
酣卽斬首悉取從諫子在襁褓者二十餘并從子積匡周等殺之誅張谷張沿陳揚庭李仲京王渥王羽  
韓茂章茂實賈庠郭台甄戈十一族夷之軍中素不附者皆殺函積首送王宰獻京師告廟社帝御興安  
門受之劉公直亦降於宰石雄以兵守境軍大掠誼移書責之雄銜怒積之死誼斥從諫妻伏夾室收其  
貲私於己建大廡日望旌節宰相德裕建言積庸下亂繇誼始及軍窮感乃圖積邀榮不誅無以懲姦臣  
及兵在境宜悉取逆黨送京師論如法先是有狂人呼於潞市曰石雄七千人至矣從諫捕誅之乃請詔  
雄率兵如數以入雄至潞縛誼及王協劉公直安全慶李道德李佐堯劉武德董可武等送京師並誅死  
杖崔士康殺之白惟信者潞梟將數與雄戰懼不敢降自武鄉殺都將康良佺欲降盧鈞雄遣人召降惟  
信殺之卒降鈞有詔從諫且死乃署積軍事宜剖棺暴尸于市三日雄發視面如生一目尙開雄三斬之  
仇人剔其骨幾盡誼者兗州人兄岌事悟爲牙將常樂滄山秀峻曰我死必葬此望氣者言其地當三世

爲都頭異姓河北謂都頭異姓至貴稱也然窻過二丈不利誼以岌假刺史穿三丈得石蛇并三頭工破  
之皆流血至是誼及岌三子同誅張谷張沿陳揚庭皆有文時時言古今成敗以佐從諫故善遇此三人  
谷納邯鄲人李巖女爲侍人號新聲當從諫潛圖窺晉新聲諫谷曰始天子以從諫爲節度非有戰野攻  
城之功直以其父挈齊十二州還天子去就間未能奪其嗣耳自有澤潞未聞以一縷一蹄爲天子壽左  
右皆無賴章武朝數鎮顛覆皆雄才傑器尙不能固天子恩況從諫擢自兒女手中苟不以法得亦宜以  
不法終君當脫族西去大丈夫勿顧一飯恩以骨肉腥健兒食言訖悲涕谷不決者三月畏言泄縊之李  
仲京誦之兄爲蕭洪府判官擢監察御史王渥播之子王羽涯族孫韓茂章茂實約之子賈庠餽子郭台  
行餘子甘露難作皆羸服奔從諫從諫衣食之甄戈者頗任俠從諫厚給郵坐上座自稱荆卿從諫與定  
州戍將有嫌命戈取之因爲逆旅上謁留飲三日乘間斬其首它日又使取仇人乃引不逞者十餘輩劫  
之從諫不悅號僞荆卿從諫妻裴以弟立功詔欲貸其死刑部侍郎劉三復執不可於是賜死以尸還問  
裴父傲冕之裔辟悟府悟奇之故爲從諫納其女裴年十五火光起桂下家人以爲怪因許婚封燕國夫  
人寬厚有謀每勸從諫入朝爲子孫計從諫有妾韋願封夫人許之詔至裴怒毀詔不與從諫它日會裴  
黨復出詔裴抵去曰淄青李師古四世阻命不聞側室封者君承朝廷姑息宜自黜削求洗濯欲以婢爲



夫人族不日滅耳從諫越然止及韋至京師乃言李丕降裴會大將妻號哭曰爲我語若夫勿忘先公愿願以子母託諸婦亦泣下故潞諸將叛益堅由是及禍初術者李涿能言禍福從諫以重幣邀辟署大將會昌初謂從諫曰往歲長星經斗公生直之今鎮復至當有災從諫即徙軍山東開毬塲鑿柳泉大興役以厭及病有言塚所興造皆逆歲疑有異謀使積數其罪殺之府中恟恟俄而李丕降有李佐之者兼孫也累調河南尉號彊直嘗客潞爲從諫所禮留不得去遂署觀察府支使因娶其從姐妹從諫薄疎屬資賸寒闕佐之亦薄之不甚答從諫病佐之力諷使還東都從諫雖不能從然感服其言病且革王協等恐佐之妻母有所關說卽輦母歸東都會佐之奴告佐之交通賓客漏軍中虛實積囚之妻訴不見禮積遂殺之武鄉令唐漢賓儉裔孫以積拒命固諫歸朝不聽舉族見害李師晦者本宗室子始悟辟致幕府見從諫稍恣橫假言求長生術不與事從諫使歸東都師晦懼爲谷揚庭等所譖請居涉從諫不之疑積敗有爲帝言者擢伊闕令而贈薛茂卿博州刺史大中初又贈漢賓本縣令先時河北諸將死皆先遣使弔祭次冊贈次近臣宣尉度軍便宜乃與節軍中不許出乃用兵大抵不半歲不能定故警將逆子皆得爲之備積初不意帝怒卽見討及茂元錄詔示積舉族號慟欲自歸而愚懦不決云自悟至積三世凡二十六年李丕者營長短術與從諫厚營署大將及積阻命軍中疾其才丕懼乞爲游弈深入以圖營壘處遂

自歸議者疑爲賊遣德裕奏言討賊半年始有降者當賞以勸餘帝召見擢忻州刺史丕請取榆社東徑武安入討賊雖邢洛未下而兵不得救潞不聽楊弁亂遣人誘丕丕斬之以兵扼走集德裕言于帝曰度支戶部物積代州今丕塞其路賊破矣乃趣丕討弁兵未至而弁已禽遷汾晉二州刺史大中初拜振武節度使檢校刑部尚書党項叛徙鄜坊卒

贊曰傳稱作易者其知盜乎然則盜之情非聖人不能知唐中衰姦雄圖睨而奮舉魏趙燕之地莽爲盜區聖叛百年夷狄其人而不能復昏上庸佐惟不知盜故也引妖就瞑以奪厥明靈蕭俛崔植等謂耶



唐書卷二百十四

唐書卷二百十四考證

吳少陽傳與少誠同在魏博軍相友善○舊書少誠父翔在魏博軍與少陽相友善臣酉按下文養以爲弟不應父與相愛而少誠以爲弟也當以新書爲正



唐書卷一百十四考證

唐書卷一百十五上

宋 端 明 殿 學 士 宋 祁 撰

列傳第一百四十一上

突厥

夷狄爲中國患尙矣在前世者史家類能言之唐興蠻夷更盛衰嘗與中國亢衡者有四突厥吐蕃回鶻雲南是也方其時羣臣獻議盈廷或聽或置班然可睹也劉昫以爲嚴尤辯而未詳班固詳而未盡權其至當周得上策秦得其中漢無策何以言之荒服之外聲教所不逮其叛不爲之勞師其降不爲之釋備嚴守禦險走集使其爲寇不能也爲臣不得也惠此中夏以綏四方周之道也故曰周得上策易稱王侯設險以固其國築長城脩障塞所以設險也趙簡子起長城備胡燕秦亦築長城限中外益理城塹城全國滅人歸咎焉後魏築長城議者以爲人治一步方千里役三十萬人不旬朔而獲久逸故曰秦得中策漢以宗女嫁匈奴而高祖亦審曾元不能止趙王之逆謀謂能息匈奴之叛非也且冒頓手弑其親而冀其不與外祖爭疆豈不惑哉然則知和親非久安計而爲之者以天下初定紓歲月之禍耳武帝時中國又安胡寇益希疏而絕之此其時也方更糜耗華夏連兵積年故嚴尤以爲下策然而漢至昭宣武士練

乾隆四年校刊

唐書卷一百十五上列傳



習斥候精明匈奴收迹遠徙猶襲秦春之過舉傾府藏給西北歲二億七十萬皇室淑女嬪於穹廬掖庭  
賈人降於沙漠夫貢子女方物臣僕之職也詩曰莫敢不來享莫敢不來王荒服稱其來不言往也公及  
吳盟諱而不書奈何以天子之尊與匈奴約爲兄弟帝女之號與胡媼並御蒸母報子從其汚俗中國異  
於蠻夷者有父子男女之別也婉冶之姿毀節異類垢辱甚矣漢之君臣莫之恥也魏晉羌狄居塞垣資  
奉踰昔百人之曾千口之長賜金印紫綬食王侯之俸牧馬之童乘羊之隸齋糲邀利者相錯於路未  
耨之利絲枲所生散於數萬里之外胡夷歲驕華夏日感方其疆也竭人力以征之其服也養之如初病  
則受養疆則內攻中國爲羌胡服役且千載可不悲哉誠能移其財以賞戍卒則民富移其爵以餌守臣  
則將良富利歸於我危亡移於彼無納女之辱無傳送之勞棄此而不爲故曰漢無策嚴尤謂古無上策  
謂不能臣妾之也誠能之而不用耳秦無策謂攘狄而亡國也秦亡非攘狄也漢得下策謂伐胡而人病  
人既病矣又役人而奉之無策也故曰嚴尤辯而未詳也班固謂其來慕義則接以禮讓何者禮讓以交  
君子非所以接禽獸夷狄也織麗外散則戎羯之心生戎羯之心生則侵盜之本也聖人飲食聲樂不與  
之共來朝坐於門外古人體委以食之不使知馨香嘉味也漢氏習玩驕虜使其悅燕趙之色甘大官之  
珍服以文綺羅紈供之則增求絕之則招怨是飽豺狼以良肉而縱其獵噬也華人步卒利險阻虜人騎

兵利平地堅守無與追奔競逐來則杜險使不得進去則閉險使不得還衡以長戟臨以疆弩非求勝也  
譬諸蟲豸虴何禮讓之接哉故曰班固詳而未盡者此也杜佑謂秦以區區關中滅六疆國今竭萬方  
之財上奉京師外有犬戎憑陵陷城數百內有兵革未寧三紀矣豈制置異術古今殊時乎周制步百爲  
畝畝百給一夫商鞅佐秦以爲地利不盡更以二百四十步爲畝百畝給一夫又以秦地曠而人寡晉地  
狹而人夥誘三晉之人耕而優其田宅復及子孫使秦人應敵於外非農與戰才得入官大率百人以五  
十人爲農五十人習戰故兵疆國富其後仕宦途多末業日滋今大率百人纔十人爲農餘皆習伎又  
秦漢鄭渠漑田四萬頃白渠漑田四千五百頃永徽中兩渠灌漑不過萬頃大厯初減至六千畝畝腴一  
斛歲少四五百萬斛地利耗人力散欲求疆富不可得也漢時長安北七百里卽匈奴之地侵掠未嘗暫  
息計其舉國之衆不過漢一大郡鼂錯請備障塞故北邊安今潼關之西隴山之東鄜坊之南終南之  
北十餘州之地已數十萬家吐蕃繇力薄材食鮮藝拙不及中國遠甚誠能復兩渠之饒誘農夫趣耕擇  
險要繕城壘屯田蓄力河隴可復豈唯自守而已至佑孫牧亦曰天下無事時大臣偷處榮逸戰士離落  
兵甲鈍弊車馬剝弱天下雜然盜發則疾驅以戰是謂宿敗之師此不蒐練之過其敗一也百人荷戈仰  
食縣官則挾千夫之名大將小裨操其餘贏以虜壯爲幸執兵者常少糜食者常多築壘未乾公囊已虛



此不責實之過其敗二也戰小勝則張皇其功奔走獻狀以邀賞或一日再賜一月累封凱還未歇書品已崇爵命極矣田官廣矣金糴溢矣子孫官矣肯外死勤於我哉此賞厚之過其敗三也多喪兵士顛翻大都則跳身而來刺邦而去迴視刀鋸菜色甚安一歲未更已立於壇墀之上此輕罰之過其敗四也大將將兵柄不得專一曰爲偃月一曰爲魚麗三軍萬夫環旋翔佯愧駭之間虜騎乘之此不專任之過其敗五也元和時團兵數十萬以誅蔡天下乾耗四歲然後能取之蓋五敗不去也長慶初盜子若孫悉來走命未幾而燕趙亂引師起將五敗益甚不能加威於反虜二杜之論如此廣德建中間吐蕃再飲馬岷江常以南詔爲前鋒操倍尋之戰且進蜀兵折刃吞鐵不能斃一戎戎兵日深疫死日衆自度不能留輒引去蜀人語曰西戎尙可南蠻殘我至草屨鑿青谿道以和羣蠻使道蜀入貢擇子弟習書算於成都業成而去習知山川要害文宗時大入成都自越嶲以北八百里民畜爲空又敗卒貧民因緣掠殺官不能禁自是羣蠻嘗有屠蜀之心蜀民苦於重征者亦欲啟之以幸非常歲發戍卒不習山川之險緩步一舍已呵然流汗爲將者刻薄自入給帛則以疏易良賦粟以沙參粒故邊卒怨望而巴蜀危憂孫樵謂宜詔嚴道沈黎越嶲三州度要害募卒以守且兵籍於州則易役卒出於邊則習險相地分屯春耕夏蠶以資衣食秋冬嚴壁以俟寇歲遣廉吏視卒之有無則官無餽運吏無牟盜此其備禦之策可施行者著

之于篇凡突厥吐蕃回鶻以盛衰先後爲次東夷西域又次之迹用兵之輕重也終之以南蠻記唐所錄  
亡云

突厥阿史那氏蓋古匈奴北部也居金山之陽臣于蠕蠕種裔繁衍至吐門遂疆大更號可汗猶單于也妻曰可敦其地三垂薄海南抵大漠其別部典兵者曰設子弟曰特勒大臣曰葉護曰屈律啜曰阿波曰俟利發曰吐屯曰俟斤曰闊洪達曰頡利發曰達于凡二十八等皆世其官而無員限衛士曰附離可汗建廷都斤山牙門樹金狼頭纛坐常東嚮隋大業之亂始畢可汗咄吉嗣立華人多往依之契丹室韋吐谷渾高昌皆沒屬竇建德薛舉劉武周梁師都李軌王世充等偪起虎視悉臣尊之控弦且百萬戎狄熾疆古未有也高祖起太原遣府司馬劉文靜往聘與連和始畢使特勒康利獻馬二千兵五百來會帝平京師遂恃功使者每來多橫驕武德元年骨咄祿特勒來朝帝宴太極殿爲奏九部樂引升御坐是歲始畢牙帳自破帝問內史令蕭瑀瑀曰魏文帝幸許城門無故壞是年文帝崩豈其類耶二年始畢自將度河至夏州與賊梁師都合又佐劉武周以五百騎入句注將侵太原會病死帝爲發哀長樂門詔羣臣卽館弔其使遣使者持段物三萬贖之子什鉢苾幼不克立以爲泥步設使居東偏立其弟俟利弗設是爲處羅可汗



處羅復妻隋義成公主遣使來告則又潛通王世充潞州總管李襲譽擊斬其使取牛羊萬餘處羅迎隋蕭皇后及齊王暕之子正道於寶建德所因立正道爲隋王奉隋後隋人沒者隸之行其正朔置百官居定襄衆萬人秦王討武周也處羅以弟步利設騎二千會并州三日多掠城中婦人女子去總管李仲文不能制以俱僉特勒助屯明年謀取并州置楊正道卜之不吉左右諫止處羅曰我先人失國賴隋以存今忘之不祥卜不吉神詎無知乎我自決之會天雨血三日國中犬夜羣號求之不見遂有疾公主餌以五石俄疽發死主以子奧射設陋弱棄不立更取其弟咄苾嗣是爲頡利可汗

頡利始爲莫賀咄設牙直五原北薛舉陷平涼與連和帝患之遣光祿卿宇文歆賂頡利使與舉絕隋五原太守張長遜以所部五城附虜歆并說還五原地皆見聽且發兵舉長遜所部會秦王軍太子建成議廢豐州并割榆中地於是處羅子郁射設以所部萬帳入處河南以靈州爲塞頡利又妻義成以始畢子什鉢苾爲突利可汗使居東義成楊諧女也其弟營經亦依突厥與王世充使者王文素共說頡利曰往啟民兄弟爭國賴隋得復位子孫有國今天子非文帝後宜立正道以報隋厚德頡利然之故歲入寇然倚父兄餘資兵銳馬多警然驕氣直出百蠻上視中國爲不足與書辭悖慢多須求帝方經略天下故屈禮多所舍貸贈資不貲然而不厭無匡之求也四年頡利率萬騎與苑君璋合寇鴈門定襄王李大恩擊

却之頡利執我使者漢陽公瓌太常卿鄭元璠左驍衛大將軍長孫順德帝亦囚其使與相當由是寇代州敗行軍總管永安王孝基略河東犯原州穿延州塞諸將與戰不能有所俘明年還順德等且請和贊魚膠給云固二國之好也帝雖未情釋其使特勒熱寒等厚與金還之大恩上言突厥饑馬邑可圖也詔殿中少監獨孤晟共擊之晟後約大恩不敢進屯新城頡利自將數萬騎與劉黑闥合圍之大恩沒士死者數千人進擊忻州爲李高遷所破黑闥以突厥萬人擾山東又殘定州頡利未得志乃率十五萬騎入鴈門圍并州深鈔汾潞取男女五千分數千騎轉掠原靈間於是太子建成將兵出幽州道秦王將兵出蒲州道擊之李子和以兵趨雲中掩可汗後段德操出夏州狙其歸并州總管襄邑王神符戰汾東斬虜五百首取馬二千汾州刺史蕭顛獻俘五千虜陷大震關縱兵掠弘州總管宇文歆靈州楊師道拒之獲馬橐它數千頡利聞秦王且至引出塞王師還又明年與黑闥君璋等小小入寇定匡原朔等州與屯將相勝負帝遣太子建成復屯北邊秦王屯并州備虜久乃罷俄又破代地一屯進擊涇州二州取馬邑不有也復請和歸我馬邑七年攻原朔二州入代地不勝更與君璋合攻隴州及陰槃城分擊并地秦王與齊王元吉屯幽州道以備胡君璋與虜出入原朔忻并地剽係騷然數爲諸將驅逐其八月頡利與突利兵悉起自原州連營而南所在震恐秦王齊王拒之初關中霖潦饑道絕軍次幽州可汗萬騎奄至陣五



龍坂以數百騎挑戰舉軍失色秦王馳百騎掠陣大言曰國家於突厥無負何爲深入我秦王也故來自與可汗決若固戰我纔百騎耳徒廣殺傷無益也頡利笑不答又馳騎語突利曰爾往與我盟急難相助今無香火情耶能一決乎突利亦不對王將絕水前頡利見兵少又聞與突利語陰相忌卽遣使者來曰王毋苦我固不戰將與王議事耳於是引却秦王縱反間突利乃歸心不欲戰頡利亦無以彊之乃遣突利及夾畢特勒思摩請和帝許之突利遂自託於王爲昆弟帝見思摩引升御榻思摩頓首辭帝曰我見若猶頡利也乃聽命突厥既歲盜邊或說帝曰虜數內寇者以府庫子女所在我能去長安則戎心止矣帝使中書侍郎宇文士及踰南山按行樊鄧將徙都焉羣臣贊遷秦王獨曰夷狄自古爲中國患未聞周漢爲遷也願假數年請取可汗以報帝乃止頡利已和亦會甚雨弓矢皆弛惡遂解而還帝會羣臣問所以備邊者將作大匠于筠請五原靈武置舟師於河扼其入中書侍郎溫彥博曰魏爲長塹遏匈奴今可用帝使桑顯和塹邊大道召江南船工大發卒治戰艦頡利遣使來願款北樓關請互市帝不能拒帝始兼天下罷十二軍尙文治至是以虜患方張乃復置之以練卒蒐騎八年頡利攻靈朔與代州都督蘭磨戰新城暮敗績於是張瑾兵屯石嶺李高遷屯大谷秦王屯蒲州道初帝待突厥用敵國禮及是怒曰往吾以天下未定厚於虜以紓吾邊今卒敗約朕將擊滅之毋須姑息命有司更所與書爲詔若敕瑾未至

屯虜已踰石嶺圍并州攻靈州轉擾潞沁李靖以兵出潞州道行軍總管任瓌屯太行瑾戰大谷敗績中書侍郎溫彥博陷于賊鄆州都督張德政死之遂攻廣武爲任城王道宗破其欲谷設掠綏州請和去敗并州數縣入蘭鄆彭州諸屯或小勝不能制俄寇原州折威將軍楊屯擊之且發士屯大谷九年攻原靈又圍涼州進犯涇原李靖與戰靈州虜引去寇西會州圍烏城翔祥隴渭間平道將軍柴紹破之於秦州斬一特勒三大將虜千級大抵虜得志則深入負則請和不恥也其七月頡利自將十萬騎襲武功京師戒嚴攻高陵尉遲敬德與戰涇陽獲俟斤烏沒曷斬首千餘級頡利遣謀臣執失思力入朝以覘我因夸說曰二可汗兵百萬今至矣太宗曰我與可汗嘗面約和爾則背之且義師之初爾父子身從我遺賜玉帛多至不可計何妄以兵入我都畿自夸盛彊耶今我當先戮爾矣思力懼請命蕭瑀封德彝諫帝不如禮遣之帝不許繫於門下省乃與侍中高士廉中書令房玄齡將軍周範等馳六騎出玄武門幸渭上與可汗隔水語且責其負約羣酋見帝皆驚下馬拜俄而衆軍至旗鎧光明部隊靜嚴虜大駭帝與頡利接轡卽麾軍却而陣焉蕭瑀以帝輕敵叩馬諫帝曰我思熟矣非爾所知也夫突厥掃地入寇以我新有內難謂不能師我若闔城彼且大掠吾境故我獨出示無所畏又盛兵使知必戰不意我能沮其始謀彼入吾地既深懼不能返故與戰則克和則固制賊之命在此舉矣是日頡利果請和許之翌日刑白馬與頡



利盟便橋上突厥引還蕭瑀曰頡利之來諸將多請與戰陛下不聽既而虜自退其策奈何帝曰突厥衆而不整君臣惟利是視可汗在水西而酋帥皆來謁我我醉而縛之其勢易甚又我敕長孫無忌李靖潛師幽州以須若大軍躡其後伏邀諸前取之反覆掌爾然我新卽位爲國者要在安靜一與虜校殺傷必多彼敗未及亡懼而脩德與我爲怨其可當耶今仆械卷鎧唱以玉帛虜志必驕驕則亡之端也故曰將欲取之必固與之瑀再拜曰非臣愚所逮也乃詔殿中監豆盧寬將軍趙綽護送突厥頡利獻馬三千匹羊萬頭帝不納詔歸所俘於我貞觀元年薛延陀回紇拔野古諸部皆叛使突利討之不勝輕騎走頡利怒囚之突利由是怨望是歲大雪羊馬多凍死人饑懼王師乘其敝卽引兵入朔州地聲言會獵議者請責其敗約因伐之帝曰匹夫不可爲不信況國乎我旣與之盟豈利其災邀險以取之耶須其無禮於我乃伐之明年突利自陳爲頡利所攻求救帝曰朕與頡利盟又與突利有昆弟約不可不救奈何兵部尙書杜如晦曰夷狄無信我雖如約彼常負之今亂而擊之侮亡之道也乃詔將軍周範壁太原經略之頡利亦擁兵窺邊或請築古長城發兵乘塞帝曰突厥盛夏而霜五日並出三月連明赤氣滿野彼見災而不務德不畏天也遷徙無常六畜多死不用地也俗死則焚今葬皆起墓背父祖命媿鬼神也與突利不睦內相攻殘不和於親也有是四者將亡矣當爲公等取之安在築障塞乎突厥俗素質略頡利得華士

趙德音才其人委信之稍專國又委政諸胡斥遠宗族不用興師歲入邊下不堪苦胡性冒晷數翻覆不信號令無常歲大饑哀斂苛重諸部愈貳又明年屬部薛延陀自稱可汗以使來詔兵部尙書李靖擊虜馬邑頡利走九俟斤以衆降拔野古僕骨同羅諸部霽奚渠長皆來朝於是詔并州都督李世勣出通漠道李靖出定襄道左武衛大將軍柴紹出金河道靈州大都督任城王道宗出大同道幽州都督衛孝節出恆安道營州都督薛萬淑出暢武道凡六總管師十餘萬皆受靖節度以討之道宗戰靈州俘人畜萬計突利及郁射設陸奈特勒帥所部來奔捷書日夜至帝謂羣臣曰往國家初定太上皇以百姓故奉突厥詭而臣之朕嘗痛心病首思一刷恥於天下今天誘諸將所向輒克朕其遂有成功乎四年正月靖進屯惡陽嶺夜襲頡利頡利驚退牙積口大酋康蘇蜜等以隋蕭皇后楊正道降或言中國人嘗密通書於后中書舍人陽文瓘請劾治帝曰天下未一人或當思隋今反側旣安何足治耶置勿劾頡利窘走保鐵山兵猶數萬令執失思力來陽爲哀言謝罪請內屬帝詔鴻臚卿唐儉將軍安脩仁等持節慰撫靖知儉在虜所虜必安乃襲擊之盡獲其衆頡利得千里馬獨奔沙鉢羅行軍副總管張寶相禽之沙鉢羅設蘇尼失以衆降其國遂亡復定襄恆安地斥境至大漠矣頡利至京師告俘太廟帝御順天樓陳杖衛士民縱觀吏執可汗至帝曰而罪有五而父國破賴隋以安不以一鐵力助之使其廟社不血食一也與我鄰



而棄信擾邊二也恃兵不戢部落攜怨三也賊華民暴禾稼四也許和親而遷延自遁五也朕殺爾非無名顧渭上盟未之忘故不窮責也乃悉還其家屬館于太僕粟食之思結俟斤以四萬衆降可汗弟欲谷毘奔高昌既而亦來降伊吾城之長素臣突厥舉七城以獻因其地爲西伊州制詔突厥往逢癘疫長城之南暴骨如丘有司其以酒脯祭爲瘞藏之又詔隋亂華民多沒于虜遣使者以金帛贖男女八萬口還爲平民頡利不室處常設穹廬廷中久鬱鬱不自慘與家人悲歌相泣下狀貌羸省帝見憐之以虢州貢山多麋麋有射獵之娛乃拜爲刺史辭不往遂授右衛大將軍賜美田宅帝曰昔啟民失國隋文帝不憚粟帛興士衆營護而存立之至始畢稍疆則以兵圍煬帝鴈門今其滅者殆背德忘義致然耶頡利子疊羅支有至性既舍京師諸婦得品供羅支預焉其母最後至不得給羅支不敢嘗品肉帝聞嘆曰天稟仁孝詎限華夷哉厚賜之遂給母肉八年頡利死贈歸義王諡曰荒詔國人葬之從其禮火尸起冢滿東其臣胡祿達官吐谷渾邪者頡利母婆施之媵臣也頡利始生以授渾邪至是哀慟乃自殺帝異之贈中郎將命葬頡利冢旁詔中書侍郎岑文本刻其事于頡利渾邪之墓碑俄蘇尼失亦以死殉尼失者啟民可汗弟也始畢以爲沙鉢羅設帳部五萬牙直靈州西北姿雄趨以仁惠御下人多歸之頡利政亂其部獨不貳突利降頡利以爲小可汗頡利已敗乃舉衆來漠南地遂空授北寧州都督右衛大將軍封懷德王

云頡利之亡其下或走薛延陀成入西域而來降者尙十餘萬詔議所宜咸言突厥擾中國久今天喪之非慕義自歸請悉籍降俘內竟豫閑處使習耕織百萬之虜可化爲齊人是中國有加戶而漠北遂空也中書令溫彥博請如漢建武時置降匈奴留五原塞全其部落以爲扞蔽不革其俗因而撫之實空虛之地且示無所猜若納竟豫則乖本性非函育之道祕書監魏徵建言突厥世爲中國仇今其來降不卽誅滅當遣還河北彼鳥獸野心非我族類弱則伏疆則叛其天性也且秦漢以銳師猛將擊取河南地爲郡縣者以不欲使近中國也陛下奈何以河南居之且降者十萬若令數年孳息略倍而近在畿甸心腹疾也彥博曰不然天子於四夷若天地養萬物覆載全安之今突厥破滅餘種歸命不加哀憐而棄之非天地蒙覆之義而有阻四夷之嫌臣謂處以河南蓋死而生之亡而存之彼世將懷德何叛之爲徵曰魏時有胡落分處近郡晉已平吳郭欽江統勸武帝逐出之不能用劉石之亂卒傾中夏陛下必欲引突厥居河南所謂養虎自遺患者也彥博曰聖人之道無不通故曰有教無類彼創殘之餘以窮歸我我援護之收處內地將教以禮法職以耕農又選酋長入宿衛何患之卹且光武置南單于卒無叛亡於是中書侍郎顏師古給事中杜楚客禮部侍郎李百藥等皆勸帝不如使處河北樹首長俾統部落視地多少令不相臣國小權分終不得亢衡中國長轡遠馭之道也帝主彥博語卒度朔方地自幽州屬靈州建順祐化



長四州爲都督府剖頡利故地左置定襄都督右置雲中都督二府統之擢會豪爲將軍郎將者五百人奉朝請者且百員入長安自籍者數千戶乃以突利可汗爲順州都督令率其下就部

突利初爲泥步設得隋淮南公主以爲妻頡利之立用次弟爲延陀設主延陀部步利設主嚮部統特勒主胡部斛特勒主斛薛部以突利可汗主契丹靺鞨部樹牙南直幽州東方之衆皆屬焉突利斂取無法下不附故薛延陀奚霫等皆內屬頡利遣擊之又大敗衆騷離頡利囚錐之久乃赦突利嘗自結於太宗及頡利衰驟追兵於突利不肯從因起相攻突利請入朝帝謂左右曰古爲國者勞己以憂人則系祚長役人以奉己則亡今突厥喪亂由可汗不君突利雖至親不自保而來夷狄弱則邊境安然觀彼亡我不可以無懼有不逮者禍可紓乎突利至禮見良厚輟膳以賜之拜右衛大將軍封北平郡王食戶七百及爲都督太宗敕曰而祖啟民破亡隋則復之棄德不報而父始畢反爲隋敵爾今窮來歸我所以不立爾爲可汗鑿前敗也我欲中國安爾宗族不亡故授爾都督毋相侵掠長爲我北藩突利頓首聽命後入朝死并州道中二十九帝爲舉哀亦詔文本文其墓子賀邏鶻嗣帝幸九成宮突利弟結社率以郎將宿衛陰結種人謀反劫賀邏鶻北還謂其黨曰我聞晉王丁夜得辟仗出我乘間突進可犯行在是夕大風冥王不出結社率恐謀泄卽射中營謀而殺人衛士等共擊之乃走殺廐人盜馬欲度渭徼邏鶻斬之赦

賀邏鶻投嶺外於是羣臣更言處突厥中國非是帝亦患之乃立阿史那思摩爲乙彌泥孰俟利苾可汗賜氏李樹牙河北悉徙突厥還故地

思摩頡利族人也父曰咄六設始啟民奔隋嶺北諸部奉思摩爲可汗啟民歸國乃去可汗號性開敏善占對始畢處羅皆愛之然以貌似胡疑非阿史那種故但爲夾畢特勒而不得爲設武德初數以使者來高祖嘉其誠封和順郡王及諸部納款思摩獨留與頡利俱禽太宗以爲忠授右武侯大將軍化州都督統頡利故部居河南徙懷化郡王及是將徙內畏薛延陀不敢出塞帝詔司農卿郭嗣本持節賜延陀書言中國禮義未始滅人國以頡利暴殘伐而取之非貪其地與人也故處降部於河南薦草美泉利其畜牧衆日孳蕃今復以思摩爲可汗還其故疆延陀受命在前長於突厥舉嶺以北延陀主之其南突厥保之各守而境無相鈔犯有負約我自以兵誅之思摩乃行帝爲置酒引思摩前曰時一草一木見其滋靡以爲喜況我養爾部人息爾馬羊不減昔乎爾父母墳墓在河北今復舊廷故宴以慰行思摩泣下奉觴上萬歲壽且言破亡之餘陛下使存骨舊鄉願子孫世事唐以報厚德於是趙郡王孝恭鴻臚卿劉善就思摩部築壇場河上拜受冊賜鼓纛又詔左屯衛將軍阿史那忠爲左賢王左武衛將軍阿史那泥孰爲右賢王相之薛延陀聞突厥之北恐其衆奔亡度嶺勒兵以待及使者至乃謝曰天子詔毋相侵謹頓



首奉詔然突厥亂翻覆其未亡時殺中國人如麻陛下滅其國謂宜收種落皆爲奴婢以償唐人乃養之如子而結社率竟反此不可信明甚後有亂請終爲陛下誅之十五年思摩帥衆十餘萬勝兵四萬馬九萬匹始度河牙於故定襄城其地南大河北白道畜牧廣衍龍荒之最壤故突厥爭利之思摩遣使謝曰蒙恩立爲落長實望世世爲國一犬守吠天子北門有如延陀使逼願入保長城詔許之居三年不能得其衆下多攜背思摩慙因入朝願留宿衛更拜右武衛將軍從伐遼中流矢帝爲吮血其願厚類此還卒京師贈兵部尚書夏州都督陪葬昭陵築墳象白道山爲刊其勞碑於化州

右賢王阿史那泥孰蘇尼失子也始歸國妻以宗女賜名忠及從思摩出塞思慕中國見使者必流涕求入侍許之思摩卽不能國殘衆稍稍南度河分處勝夏二州帝伐遼或言突厥處河南邇京師請帝無東帝曰夫爲君者豈有猜貳哉湯武化桀紂之民無不遷善有隋無道舉天下皆叛非止夷狄也朕聞突厥之亡內河南以振贍之彼不近走延陀而遠歸我懷我深矣朕策五十年中國無突厥患思摩衆旣南車鼻可汗乃盜有其地

車鼻亦阿史那族而突利部人也名斛勃世爲小可汗頡利敗諸部欲共君長之會薛延陀稱可汗乃往歸焉其爲人沈果有智數衆頗便附延陀畏逼將殺之乃率所部遯去騎數千尾追不勝竄金山之北三

垂斗絕惟一面可容車騎壤土夷博卽據之勝兵三萬自稱乙注車鼻可汗距長安萬里西葛邏祿北結骨皆并統之時時出掠延陀人畜延陀後衰車鼻勢益張二十一年遣子沙鉢羅特勒獻方物且請身入朝帝遣雲麾將軍安調遮右屯衛郎將韓華往迎之至則車鼻偃然無入朝意華謀與葛邏祿共劫之車鼻覺華與車鼻子陟苾特勒闕死調遮被殺帝怒遣右驍衛郎將高侃發回紇僕骨兵擊之其大會長歌邏祿泥孰闕俟利發處木昆莫賀咄俟斤等以次降侃師攻阿息山部落不肯戰車鼻攜愛妾從數百騎走追至金山獲之獻京師高宗責曰頡利敗爾不輔無親也延陀破爾遯亡不忠也而罪當死然朕見先帝所獲酋長必宥之今原而死乃釋縛數俘社廟又見昭陵拜左武衛將軍賜居第處其衆鬱督軍山詔建狼山都督府統之初其子羯漫陀泣諫車鼻請歸國不聽乃遣子菴鑠入朝後來降拜左屯衛將軍建新黎州使領其衆於是突厥盡爲封疆臣矣始置單于都護府領狼山雲中桑乾三都督蘇農等二十四州瀚海都護府領金微新黎等七都督仙萼賀蘭等八州卽擢領會爲都督刺史麟德初改燕然爲瀚海都護府領回紇徙故瀚海都護府於古雲中城號雲中都護府積以北蕃州悉隸瀚海南隸雲中雲中者義成公主所居也頡利滅李靖徙突厥羸破數百帳居之以阿史德爲之長衆稍盛卽建言願以諸王爲可汗遙統之帝曰今可汗古單于也乃改雲中府爲單于大都護府以殷王旭輪爲單于都護帝封禪都



督葛邏祿叱利等三十餘人皆從至泰山下已封詔勒名於封禪碑云凡三十年北方無戎馬警調露初單于府大會溫傳奉職二部反立阿史那泥孰匄爲可汗二十四州酋長皆叛應之乃以鴻臚卿單于大都護府長史蕭嗣業左領軍衛將軍苑大智右千牛衛將軍李景嘉討之恃勝不設備會雨雪士輒寒反爲虜襲大敗殺略萬餘人大智等收餘卒行且戰乃免於是嗣業流桂州餘坐免官更拜禮部尙書裴行儉爲定襄道行軍大總管率太僕少卿李思文營州都督周道務西軍程務挺東軍李文暉士無慮三十萬捕擊反者詔右金吾將軍曹懷舜屯井陘右武衛將軍崔獻屯絳龍門明年行儉戰黑山大破之其下斬泥孰匄以首降禽溫傳奉職以還餘衆保狼山始虜未叛鳴鷄羣飛入塞吏曰所謂突厥雀者南飛胡必至此春還悉墮靈夏間率無首泥孰果亡狼山衆掠雲州都督竇懷哲右領軍中郎將程務挺逐出之永隆中溫傳部又迎頡利族子伏念於夏州走度河立爲可汗諸部響應明年遂寇原慶二州復詔行儉爲大總管以右武衛將軍曹懷舜幽州都督李文暉副之謀者給言伏念溫傳保黑沙饑甚可輕騎取也懷舜獨信之輕兵倍道至黑沙不見虜得薛延陀餘部降之引還至長城遇溫傳與戰所殺相當行儉兵壁伐之陘口縱反間故伏念溫傳相貳因遣兵擊伏念敗之伏念走與懷舜遇行且戰一日爲伏念所破棄軍奔雲中士爲虜所乘死不可算皆南首仆懷舜殺牲與伏念盟乃免伏念益北留輜重妻子保金

牙山以輕騎將襲懷舜會行儉遣部將掩得其輜重比還無所歸乃北走保細沙行儉縱單于鎮兵躡之伏念意王師不能遠不設備及兵至惶駭不得戰遂遣使間道詣行儉執溫傳降行儉虜之送京師斬東市永淳元年骨咄祿又反

骨咄祿頡利族人也雲中都督舍利元英之部酋世襲吐屯伏念敗乃嘯亡散保總材山又治黑沙城有衆五千盜九姓畜馬稍彊大乃自立爲可汗以弟默啜爲殺咄悉匄爲葉護時單于府檢校降戶部落阿史德元珍者爲長史王本立所囚會骨咄祿來寇元珍請諭還諸部贖罪許之至卽降骨咄祿與爲謀遂以爲阿波達干悉屬以兵乃寇單于府北鄙遂攻并州殺嵐州刺史王德茂分掠定州北平刺史霍王元軌擊卻之又攻媯州圍單于都護府殺司馬張行師攻蔚州殺刺史李思儉執豐州都督崔知辯詔右武衛將軍程務挺爲單于道安撫大使備邊嗣聖垂拱間連寇朔代掠吏士左玉鈐衛中郎將淳于處平爲陽曲道總管將擊賊總材山至忻州與賊遇塵戰不利死者五千人更以天官尙書韋待價爲燕然道大總管討之明年入昌平右鷹揚衛大將軍黑齒常之擊卻之復入朔州地常之與戰黃花堆虜敗追奔四十里遞過磧右監門衛中郎將爨寶璧當追意虜卽破欲幸取功乃募謀出塞二千里間虜無備趨襲之將至漏言于軍虜得整衆出皆死戰大敗寶璧跳還舉軍沒武后怒誅寶璧改骨咄祿曰不卒祿俄而元



珍攻突騎施戰死天授初骨咄祿死其子幼不得立默啜自立爲可汗篡位數年始攻靈州多殺略士民武后以薛懷義爲朔方道行軍大總管內史李昭德爲行軍長史鳳閣鸞臺平章事蘇味道爲司馬率朔方道總管契苾明鴈門道總管王孝傑威化道總管李多祚豐安道總管陳令英瀚海道總管田揚名等凡十八將軍兵出塞雜華蕃步騎擊之不見虜還俄詔孝傑爲朔方道行軍總管備邊契丹李盡忠等反默啜請擊賊自效詔可授左衛大將軍歸國公以左豹韜衛將軍閻知微卽部册拜遷善可汗默啜乃引兵擊契丹會盡忠死襲松漠部落盡得李萬榮妻子輜重酋長崩潰后美其功復詔知微持節册默啜爲特進韻跌利施大單于立功報國可汗未及命俄攻靈勝二州縱殺略爲屯將所敗又遣使者謝請爲后子復言有女願女諸王且求六州降戶初突厥內屬者分處豐勝靈夏朔代間謂之河曲六州降人默啜又請粟田種十萬斛農器三千具鐵數萬斤后不許宰相李嶠亦言不可默啜怨爲慢言執使者司賓卿田歸道於是納言姚璿等建請與之乃歸粟器降人數千帳繇是突厥遂疆詔淮陽王武延秀聘其女爲妃詔知微攝春官尙書與司賓卿楊鸞莊持節護送默啜曰我以女嫁唐天子子今乃后家子乎且我世附唐今聞其子孫獨一人在我當立之卽囚延秀等妄號知微爲可汗自將十萬騎南向擊靜難平狄清夷等軍靜難軍使慕容玄崱以兵五千降虜入圍媯檀后詔司屬卿武重規爲天兵中道大總管右武

威衛將軍沙吒忠義爲天兵西道總管幽州都督張仁亶爲天兵東道總管兵凡三十萬擊之右羽林大將軍閻敬容李多祚爲天兵西道後軍總管兵亦十五萬默啜破蔚州飛狐進殘定州殺刺史孫彥高焚廬舍鄉聚爲空后怒下詔購斬默啜者王之更號曰斬啜虜圍趙州長史唐波若應之入殺刺史高徽進攻相州詔沙吒忠義爲河北道前軍總管李多祚爲後軍總管將軍嵎夷公福富順爲奇兵總管擊虜時中宗還自房陵爲皇太子拜行軍大元帥以納言狄仁傑爲副文昌右丞宋玄爽爲長史左肅政臺御史中丞霍獻可爲司馬右肅政臺御史中丞吉頊爲監軍使將軍扶餘文宣等六人爲子總管未行默啜聞之取趙定所掠男女八九萬悉阮之出五回道去所過人畜金幣子女盡剽有之諸將皆願望不敢戰獨狄仁傑以兵追之不及默啜負勝輕中國有驕志大抵兵與頡利時略等地縱廣萬里諸蕃悉往聽命復立咄悉匄爲左察骨咄祿子默矩爲右察皆統兵二萬子匄俱爲小可汗位兩察上典處木昆等十姓兵四萬號拓西可汗歲入邊戍兵不得休乃高選魏元忠檢校并州長史爲天兵軍大總管婁師德副之按屯以待又徙元忠靈武道行軍大總管備虜默啜剽隴右牧馬萬匹去俄復盜邊詔安北大都護相王爲天兵道大元帥率并州長史武攸宜夏州都督薛訥與元忠擊虜兵未出默啜去明年寇鹽夏掠羊馬十萬攻石嶺遂圍并州以雍州長史薛季昶爲持節山東防禦大使節度滄瀛幽易恆定媯檀平等九州之



軍以瀛州都督張仁亶統諸州及清夷障塞軍之兵與季昶犄角又以相王爲安北道行軍元帥監諸將王留不行虜入代忻仍殺略長安三年遣使者莫賀達干請進女女皇太子子后使平恩郡王重俊義興郡王重明盛服立諸朝默啜更遣大酋移力貪汗獻馬千匹謝許婚媿禮其使中宗始卽位入攻鳴沙於是靈武軍大總管沙吒忠義與戰不勝死者幾萬人虜遂入原會多取牧馬帝詔絕昏購斬默啜者王以國官諸衛大將軍默啜殺我行人鴻臚卿臧思言詔左屯衛大將軍張仁亶爲朔方道大總管屯邊明年始築三受降城於河外障絕寇路久之以唐休璟代屯容宗初立又請和親詔取宋王成器女爲金山公主下嫁會左羽林大將軍孫佺等與奚戰冷陁爲奚所執獻諸默啜默啜殺之更以刑部尚書郭元振代休璟立絕和親默啜乃遣子楊我支特勒入宿衛固求昏以蜀王女南河縣主妻之下書諭尉可汗明年使子移涅可汗引同俄特勒火拔頡利發石失畢精騎攻北廷都護郭虔瓘擊之斬同俄城下虜奔解火拔不敢歸攜妻子來奔拜左武衛大將軍燕山郡王號其妻爲金山公主賜資優繹楊我支死詔宗親三等以上弔其家是時突厥再上書求昏帝未報初景雲中默啜西滅娑葛遂役屬契丹奚因虐用其下既年老愈昏暴部落怨叛十姓左五咄陸右五弩失畢俟斤皆請降葛邏祿胡屋鼠尼施三姓大漠都督特進朱斯陰山都督謀落訶雞玄池都督蹋實力胡鼻率眾內附詔處其眾於金山以右羽林軍大

將軍薛訥爲涼州鎮軍大總管節度赤水建康河源等軍屯涼州以都督楊執一副之右衛大將軍郭虔瓘爲朔州鎮軍大總管節度和戎大武并州之北等軍屯并州以長史王峻副之撫新附檢鈔暴默啜屢擊葛邏祿等詔在所都護總管犄角應援虜勢寢削其壻高麗莫離支高文簡與跌跌都督思太吐谷渾大酋慕容道奴郁射施大酋鶻屈頡斤苾悉頡力高麗大酋高拱毅合萬餘帳相踵款邊詔內之河南引拜文簡左衛大將軍遼西郡王思太特進右衛大將軍兼跌跌都督樓煩郡公道奴左武衛將軍兼刺史雲中郡公鶻屈頡斤左驍衛將軍兼刺史陰山郡公苾悉頡力左武衛將軍兼刺史鴈門郡公拱毅左領軍衛將軍兼刺史平城郡公將軍皆員外置賜各有差默啜討九姓戰磧北九姓潰人畜皆死思結等部來降帝悉官之拜薛訥朔方道行軍大總管太僕卿呂延祚靈州刺史杜賓客佐之備邊詔金山大漠陰山玄池都督等共圖取默啜班賞格賜物諭之默啜又討九姓拔野古戰獨樂河拔野古大敗默啜輕歸不爲備道大林中拔曳固殘眾突出擊默啜斬之乃與入蕃使郝靈佺傳首京師骨咄祿子闕特勒合故部攻殺小可汗及宗族略盡立其兄默棘連是爲毗伽可汗



唐書卷二百十五上

唐書卷二百十五上考證

頡利傳漢陽公瓌○高紀作漢陽郡王未詳孰是

阿史那泥孰傳始歸國妻以宗女賜名忠○沈炳震曰那泥孰與忠本二人忠別有傳附阿史那社爾非

那泥孰也新書作一人非是臣酉按新書思摩傳明云詔左屯衛將軍阿史那忠為左賢王左武衛將

軍那泥孰為右賢王是明以忠與泥孰為二人矣此復云云何其自相矛盾耶

車鼻傳禽温傳奉職以還○沈炳震曰温傳開耀元年擒此誤



卷唐書二百十五上考證

唐書卷二百十五下

宋 端 明 殿 學 士 宋 祁 撰

列傳第一百四十下

突厥

毗伽可汗默棘連本謂小殺者性仁友自立非己功讓於闕特勒不敢受遂嗣位實開元四年以特勒為左賢王專制其兵初默啜死闕特勒盡殺其用事臣惟噉欲谷者以女婆匄為默棘連可敦獨免廢歸其部後突騎施蘇祿自為可汗突厥部種多貳默棘連乃召噉欲谷與謀國年七十餘眾尊畏之俄而跌跌思太等自河曲歸之始降戶之南也單于副都護張知運盡斂其兵戎人怨怒及姜晦為巡邊使遮訴禁弓矢無以射獵為生晦悉還之乃共擊張知運禽之將送突厥朔方行軍總管薛訥將軍郭知運追之眾潰釋知運去思太等分為二隊北走王峻又破其左隊默棘連既得降胡欲南盜塞噉欲谷曰不可天子英武人和歲豐未有間且我兵新集不可動也默棘連又欲城所都起佛老廟噉欲谷曰突厥眾不敵唐百分一所能與抗者隨水草射獵居處無常習於武事疆則進取弱則遁伏唐兵雖多無所用也若城而居戰一敗必為彼禽且佛老教人仁弱非武彊術默棘連當其策即遣使者請和帝以不情答而



不許俄下詔伐之乃以拔悉蜜右驍衛大將軍金山道總管處木昆執米囉堅昆都督右武衛大將軍骨篤祿毗伽可汗契丹都督李失活奚都督李大酺突厥默噶子左賢王墨特勒左威衛將軍右賢王阿史那毗伽特勒燕山郡王火拔石失畢等蕃漢士悉發凡三十萬以御史大夫朔方道大總管王陵統之期八年秋並集稽落水使拔悉蜜奚契丹分道掩其牙捕默棘連默棘連大恐噶欲谷曰拔悉蜜在北廷與二蕃相距遠必不合峻與張嘉貞有隙必相執異亦必不能來即皆能來我當前三日悉眾北徙彼糧竭自去拔悉蜜輕而好利當先至擊之可取也俄而拔悉蜜果引眾逼突厥牙知峻等不至乃引卻突厥欲擊之噶欲谷曰兵千里遠出土殊死鬪鋒不可當也不如躡之邀近而取之距北廷二百里乃分兵由它道襲拔其城即急擊拔悉蜜眾走趨北廷無所歸悉禽之還出赤亭掠涼州都督楊敬述使官屬盧公利元澄等勒兵討捕噶欲谷曰敬述若城守當與和如兵出吾且決戰必有功澄令于軍曰羸臂持滿外注會大寒裂膚士手不能張弓矢由是大敗元澄走敬述坐以白衣檢校涼州事突厥遂大振盡有默噶餘眾明年固乞和請父事天子許之又連歲遣使獻方物求婚是時天子東巡泰山中書令張說謀益屯以備突厥兵部郎中裴光廷曰封禪以告成功若復調發不可謂成功者說曰突厥雖請和難以信結也且其可汗仁而愛人下爲之用闕特勒善戰噶欲谷沈雄愈老而智李靖世勳流也三虜方協知我舉國

東巡有如乘間何以禦之光廷即請以使召其大臣入衛乃遣鴻臚卿袁振往諭帝意默棘連置酒與可敦闕特勒噶欲谷坐帳中謂振曰吐蕃犬出也唐與爲婚奚契丹我奴而役也亦尙主獨突厥前後請不許云何振曰可汗天子子也子而婚可乎默棘連曰不然二蕃皆賜姓而得尙主何不可云且公主亦非帝女我不敢有所擇但屢請不得爲諸國笑振許爲請默棘連遣大臣阿史德頡利發入獻遂從封禪有詔四夷諸酋皆入仗佩弓矢會兔起帝馬前帝一發斃之頡利發奉兔頓首賀曰陛下神武超絕若天上則臣不知人間無有也詔問饑欲食乎對曰仰觀弧矢之威使十日不食猶爲飽因令仗內馳射扈封畢厚宴賜遺之然卒不許和親自是比年遣大臣入朝吐蕃以書約與連和鈔邊默棘連不敢從封上其書天子嘉之引使者梅錄噶宴紫宸殿詔朔方西受降城許互市歲賜帛數十萬十九年闕特勒死使金吾將軍張去逸都官郎中呂向奉璽詔弔祭帝爲刻辭于碑仍立廟像四垣圖戰陣狀詔高手工六人往繪寫精肖其國以爲未嘗有默棘連視之必悲梗默棘連請婚既勤帝許可於是遣哥解栗必來謝請婚期俄爲梅錄噶所毒忍死殺梅錄噶夷其種乃卒帝爲發哀詔宗正卿李佺弔祭因立廟詔史官李融文其碑國人共立其子爲伊然可汗伊然可汗立八年卒凡遣使三入朝其弟嗣立是爲苾伽骨咄祿可汗使右金吾衛將軍李質持冊爲登利可汗明年遣使伊難如朝正月獻方物曰禮天可汗如禮天今新歲獻



月願以萬壽獻天子云可汗幼其母婆匄與小臣飢斯達干亂遂預政諸部不協登利從父分掌東西兵號左右殺士之精勁皆屬可汗與母誘斬西殺奪其兵左殺懼即攻登利可汗殺之左殺者判闕特勒也遂立毗伽可汗子俄爲骨咄葉護所殺立其弟旋又殺之葉護乃自爲可汗天寶初其大部回紇葛邏祿拔悉蜜並起攻葉護殺之尊拔悉蜜之長爲頡跌伊施可汗於是回紇葛邏祿自爲左右葉護亦遣使者來告國人奉判闕特勒子爲烏蘇米施可汗以其子葛臘哆爲西殺帝使使者諭令內附烏蘇不聽其下不與拔悉蜜等三部共攻烏蘇米施米施遁亡其西葉護阿不思及葛臘哆率五千帳降以葛臘哆爲懷恩王三載拔悉蜜等殺烏蘇米施傳首京師獻太廟其弟白眉特勒鶻隴匄立是爲白眉可汗於是突厥大亂國人推拔悉蜜爲可汗詔朔方節度使王忠嗣以兵乘其亂抵薩河內山擊其左阿波達干十一部破之獨其右未下而回紇葛邏祿殺拔悉蜜可汗奉回紇骨力裴羅定其國是爲骨咄祿毗伽可汗明年殺白眉可汗傳首獻毗伽可汗妻骨咄祿婆匄可敦率衆自歸天子御花萼樓宴羣臣賦詩美其事封可敦爲賓國夫人歲給粉直二十萬始突厥國於後魏大統時至是滅後或朝貢皆舊部九姓云其地盡入回紇始其族分國於西者曰西突厥

西突厥其先訥都陸之孫吐務號大葉護長子曰土門伊利可汗次子曰室點蜜亦曰瑟帝米瑟帝米之

子曰達頭可汗亦曰步迦可汗始與東突厥分烏孫故地有之東即突厥西雷蒸海南疏勒北瀚海直京師北七千里由焉耆西北七日行得南廷北八日行得北廷與都陸弩失畢歌邏祿處月處蜜伊吾諸種雜其風俗大抵突厥也言語少異初東突厥木杆可汗死舍其子大邏便而立弟佗鉢可汗佗鉢死先令戒其子菴羅必立大邏便國入以其母賤不肯立而卒立菴羅菴羅後以讓木杆兄子攝圖是爲沙鉢略可汗而大邏便別爲阿波可汗自臣所部沙鉢略襲擊之殺其母阿波西走達頭當是時達頭爲西面可汗即授阿波兵十萬使與東突厥戰而阿波竟爲沙鉢略所禽及敗民可汗時達頭可汗歲以兵相加而隋常助敗民故達頭敗奔吐谷渾始阿波既禽國人立鞅素特勒子是爲泥利可汗達頭之奔泥利亦敗及死其子達漫立是爲泥撒處羅可汗政苛察多忌大業中從煬帝征高麗賜號曷薩那可汗妻以宗女留其弟闕達度設畜牧於會寧郡即自稱闕可汗江都亂曷薩那從宇文化及至黎陽遁歸長安高祖降楊與共坐封歸義王以大珠獻帝帝不受曰朕所重者王之赤心是無用也闕可汗有馬三千武德元年內屬賜號吐烏過拔闕可汗與李軌連和隋西戎使者曹瓊據甘州誘之俄與瓊合共擊軌兵不勝走達斗拔谷與吐谷渾相輔車爲軌所滅初曷薩那朝隋國人皆不欲既被留不遣乃共立達頭孫號射匄可汗建廷龜茲北之三彌山玉門以西諸國多殺屬與東突厥亢射匄死其弟統葉護嗣是爲統葉護可汗



統葉護可汗勇而有謀戰輒勝因并鐵勒下波斯屬賓控弦數十萬徙廷石國北之千泉遂霸西域諸國悉授以頡利發而命一吐屯監統以督賦入明年射匱使使來以曷薩那有世憾請殺之帝不許羣臣曰存一人失一國後且爲患秦王曰不然人來歸我我殺之不祥帝又不聽宴禁中酒酣至中書省縱使者戕之不宜也射匱亦連年係貢條支巨卵師子革等帝厚申撫結約與并力討東突厥統葉護可汗請期頡利大懼乃與和約毋相伐也統葉護可汗來請昏帝與羣臣謀西突厥去我遠緩急不可杖可與昏乎封德彝曰計今之便莫若遠交而近攻請聽昏以怖北狄待我既定而後圖之帝乃許昏詔高平王道立至其國統葉護可汗喜遣真珠統俟斤與道立還獻萬釘寶鈿金帶馬五千匹以藉約會東突厥歲犯邊西道梗澀又頡利遣謂曰若迎唐公主必假我道我且留之統葉護可汗病之未克昏方負其疆不以恩結下衆怨多叛去其諸父莫賀咄殺之帝欲齎玉帛焚祭其國會亂不果至莫賀咄立是爲屈利俟毗可汗遣使者來獻俟毗可汗初分統突厥爲小可汗旣稱大可汗國人亦附弩失畢部自推泥孰莫賀設爲可汗泥孰辭不受會統葉護可汗子唃力特勒避莫賀咄亂亡在康居泥孰迎立之爲乙毗鉢羅肆葉護可汗與俟毗可汗分王其國拳鬪不解各遣使朝獻太宗追憐曷薩那死非罪爲贈上柱國具禮以葬貞觀四年俟毗可汗請昏不許詔曰突厥方亂君臣未定何遽昏爲各敕其部毋相侵由是西域諸國悉叛

之國大虛耗衆悉附肆葉護可汗雖俟毗之都亦稍稍去共以兵擊俟毗俟毗走保金山爲泥孰所殺率肆葉護爲大可汗肆葉護已立卽北討鐵勒薛延陀爲延陀所敗性猜復狹於統下小可汗乙刺者於國最有功肆葉護聽讒種夷之衆皆沮駭又忌泥孰陰圖殺之泥孰亡入焉耆未幾沒卑達干與弩失畢部諸豪謀執廢肆葉護葉護輕騎走康居憂死國人迎泥孰於焉耆立之是爲咄陸可汗可汗父莫賀設本隸統葉護者武德時來朝太宗與之盟約爲昆弟死而泥孰代之或曰伽那設旣立遣使詣闕不敢當可汗號帝詔鴻臚少卿劉善因持節冊號吞阿婁拔利鄰咄陸可汗賜鼓纛段綵巨萬泥孰遣使謝它日太上皇宴使者兩儀殿謂長孫無忌曰今蠻夷率服古亦有乎無忌上千萬歲壽太上皇喜以酒屬帝帝頓首謝亦奉觴上太上皇壽咄陸可汗死弟同俄設立是爲沙鉢羅唃利失可汗歲三遣使奉方物遂請昏帝慰而不俞可汗分其國爲十部部以一人統之人授一箭號十設亦曰十箭爲左右五咄陸部置五大噉居碎葉東右五弩失畢部置五大俟斤居碎葉西其下稱一箭曰一部落號十姓部落云然不爲衆悅賴其部統吐屯以兵襲之唃利失率左右戰統吐屯不勝去唃利失與其弟步利設奔焉耆阿悉吉闕俟斤與統吐屯召國人謀立欲谷設爲大可汗以唃利失爲小可汗會統吐屯被殺欲谷設又爲其俟斤所破唃利失乃復得故地後西部卒自立欲谷設爲乙毗咄陸可汗而與唃利失交戰殺傷不可計乃因



伊列河約諸部河以西受令於咄陸其東唃唃失主之自是西突厥又分二國矣咄陸可汗建廷鐵島山西謂之北廷駁馬結骨諸國悉附臣之陰與唃唃失部吐屯俟列發以兵攻唃唃失唃唃失援窮奔拔汗那而死國人立其子是爲乙屈利失乙毗可汗踰年死弩失畢大會迎伽那設之子畢賀咄葉護立之是爲乙毗沙鉢羅葉護可汗太宗詔左領軍將軍張大師持節冊命賜鼓纛建廷雖合水北謂之南廷東薄伊列河龜茲鄯善且末吐火羅焉耆石史何穆康等國皆隸屬是時咄陸兵寢盛與沙鉢羅葉護數交戰會二可汗使者皆來帝敕以敦睦令各罷兵咄陸不肯聽遣石國吐屯攻葉護可汗殺之并其國弩失畢不服叛去咄陸又擊吐火羅取之乃入寇伊州安西都護郭孝恪以輕騎二千自烏骨狙擊敗之咄陸以處月處密兵圍天山而不克孝恪追北拔處月俟斤之城抵渴索山斬千餘級降處密部而歸咄陸可汗性狠傲留使者元孝友等不遣妄曰我聞唐天子才武我今討康居爾視我與天子等否遂與共攻康居道米國卽襲破之係虜其人取贖口不以與下其將泥孰噉怒奪取之咄陸斬以徇泥孰噉之將胡祿屋舉兵襲咄陸可汗多殺士國大亂將歸保吐火羅大臣勸其返國不從率衆去度葉水及石國左右亡去略盡乃保可賀敦城自輕出招叛亡阿悉吉闕俟斤逆擊之咄陸敗襲取白水胡城以居弩失畢不欲咄陸爲可汗遣使者至闕下請所立帝遣通事舍人溫無隱持璽詔與國大臣擇突厥可汗子孫賢者授之

乃立乙屈利失乙毗可汗之子是爲乙毗射匱可汗

乙毗射匱既立改館使者悉還之長安使弩失畢將兵攻白水胡城咄陸勒兵自城出鳴鼓角薄闕弩失畢不能軍殺獲甚多咄陸因其勝招徠舊部皆曰戰千人存一人我猶不從也咄陸自知衆怨乃走吐火羅乙毗射匱遣使貢方物且請昏帝令割龜茲于闐疏勒朱俱波葱嶺五國爲聘禮不克昏於是阿史那賀魯反盡得可汗部落

賀魯者室點蜜可汗五世孫曳步利設射匱特勒劫越子也始阿史那步真來歸國咄陸可汗以賀魯爲葉護代步真居多邏斯川直西州北千五百里統處月處蜜姑蘇歌邏祿弩失畢五姓之衆咄陸之走吐火羅也乙毗射以兵迫逐賀魯無常居部多散亡有執舍地處木昆婆鼻三種者以賀魯無罪往請可汗可汗怒欲誅執舍地等三種乃舉所部數千帳與賀魯皆內屬帝優撫之會計龜茲請先馳爲鄉導詔授崑崙道行軍總管宴嘉壽殿厚賜予解衣衣之擢累左驍衛將軍瑤池都督處其部於廷州莫賀城密招攜散廬幕益衆方帝崩卽謀取西廷二州刺史駱弘義以聞高宗遣通事舍人喬寶明馳撫因令賀魯遣子唃運入宿衛唃運中悔劫於勢不得去拜右驍衛中郎將帝遣還唃運卽勸賀魯引而西取咄陸可汗故地建牙於千泉自號沙鉢羅可汗遂統咄陸弩失畢十姓咄陸有五噉曰處木昆律噉胡祿屋闕噉攝



會提墩吸突騎施賀邏施吸鼠尼施麻半吸弩失畢有五俟斤曰阿悉結闕俟斤哥舒闕俟斤拔塞幹噉沙鉢俟斤阿悉結泥孰俟斤哥舒處半俟斤而胡祿屋闕賀魯塔也阿悉結闕俟斤最盛疆勝兵至數十萬以唾運爲莫賀咄葉護遂寇廷州敗數縣殺掠數千人去詔左武衛大將軍梁建方右驍衛大將軍契苾何力爲弓月道行軍總管右驍衛將軍高德逸右武衛將軍薩孤吳仁副之發府兵二萬合回紇騎五萬擊之駱弘義獻計曰安中國以信馭夷狄以權理有變通也賀魯保一城方寒積雪謂唐兵必不來宜乘此一舉滅之遷延及春且生變縱不率連諸國必遠迹遁去且兵本誅賀魯而處蜜處木昆等亦各欲自免若留不進彼與賀魯復合矣今雖嚴冬風勁兵苦戰墮又不可久留費邊糧使賊得堅黨附賂死期也請寬處月處蜜等罪專誅賀魯除禍務本不可先治枝葉也願發射脾處月處蜜契苾等兵齎一月食急趨之大軍住憑洛水上爲之景助此驅戎狄攻豺狼也且戎人藉唐兵爲羽翼今胡騎出前唐兵躡後賀魯窮矣天子然其奏詔弘義佐建方等經略之處月朱邪孤注者引兵附賊據牢山建方等攻之衆潰追行五百里斬孤注上首九千級虜其帥六十不如弘義所計永徽四年罷瑤池都督府卽處月置金滿州又遣左屯衛大將軍程知節爲葱山道行軍大總管率諸將進討是歲咄陸可汗死其子真珠葉護請討賀魯白效爲賀魯所拒不得前明年知節擊歌邏祿處月斬千級收馬萬計副將周智度擊處木昆城

拔之斬馘三萬前軍蘇定方擊賀魯別帳鼠尼施于鷹娑川斬首虜獲馬甚衆賊棄鎧仗彌野會副總管王文度不肯戰降怛篤城取其財屠之知節不能制顯慶初擢定方伊麗道行軍大總管率燕然都護任雅相副都護蕭嗣業左驍衛大將軍瀚海都督回紇婆閏等窮討詔右屯衛大將軍阿史那彌射左屯衛大將軍阿史那步真爲流沙道安撫大使分出金山道俟斤嫩獨祿等萬餘帳迎降定方以精騎至曳咥河西擊處木昆破之賀魯舉十姓兵十萬騎來拒定方以萬人當之虜見兵少以騎繞唐軍定方令步卒據原攢稍外注自以騎陳於北賀魯先擊原上軍三犯軍不動定方縱騎乘之虜大潰追奔數十里俘斬三萬人殺其大會都搭達干等二百人明日躡北五弩失畢皆降五咄陸聞賀魯敗趨南道降步真定方命嗣業婆閏趨邪羅斯川追虜任雅相提降兵踵後會大雪軍中請須霽定方曰今霧晦風冽虜謂我不能師掩其不虞可也緩則遠矣省日兼功上策也於是晝夜進收所過人畜至雙河與彌射步真會軍飽氣張距賀魯牙二百里陳而行抵金牙山賀魯衆適獵定方兵縱破其牙俘數萬人獲鼓纛器械賀魯跳度伊麗水嗣業次千泉彌射至伊麗處月處蜜諸部皆下次雙河賀魯先以步失達干據柵戰彌射攻之潰定方追賀魯至碎葉水盡奪其衆賀魯唾運將奔鼠耨設至石國蘇咄城馬不進衆餓齋寶入城且市馬城主伊涅達干迎之既入拘送石國會彌射子元爽與嗣業兵至取之乃悉散諸部兵開道置驛收露



贊問人疾苦賀魯所掠悉還之民西域平賀魯謂嗣業曰我亡虜也先帝厚我我則背之今天降怒罰尙何道且聞漢法殺人必都市我願就死昭陵謝罪於先帝也帝曰先帝賜賀魯二千帳主之今罪人既得獻昭陵其可乎許敬宗曰古者軍凱還則飲至于廟若諸侯獻馘天子未聞獻于陵然陛下奉國寢與宗廟等可行不疑於是執而獻昭陵赦不誅賀魯已滅裂其地爲州縣以處諸部木昆部爲匱延都督府突騎施索葛莫賀部爲嗚鹿都督府突騎施阿利施部爲絜山都督府胡祿屋闕部爲鹽泊都督府攝舍提噉部爲雙河都督府鼠尼施處半部爲鷹娑都督府又置崑陵濛池二都護府以統之其所役屬諸國皆置州西盡波斯並隸安西都護府以阿史那彌射爲興昔亡可汗兼驃騎大將軍崑陵都護領五咄陸部阿史那步真爲繼往絕可汗兼驃騎大將軍濛池都護領五弩失畢部各賜帛十萬以光祿卿盧承慶持冊命之賀魯死詔葬頡利家旁紀其槩於石

阿史那彌射亦室點密可汗五世孫世爲莫賀咄葉護貞觀中遣使者持節立彌射爲奚利邲咄陸可汗賜鼓纛族兄步真謀殺彌射欲自立彌射不能國卽舉所部處月處蜜等入朝拜右監門衛大將軍而步真遂自爲咄陸葉護衆不厭去之亦與族人來朝拜左屯衛大將軍彌射從帝征高麗有功封平壤縣伯遷右武衛大將軍及平賀魯乃與步真皆爲可汗得補所部刺史以下是歲彌射擊真珠葉護於雙河斬

之殺闕曷二人彌射步真無綏御材下多怨於是思結都曼率疏勒朱俱波喝斃陀三國叛擊破于闐詔左驍衛大將軍蘇定方討之都曼兵保馬頭川五年定方傳其城擊降之龍朔二年彌射步真以兵從颯海道總管蘇海政討龜茲步真怨彌射且欲并其部乃誣以謀反海政不能察卽集軍吏計議先發誅之因稱詔發所齎賜可汗首領彌射以麾下至悉收斬之其部鼠尼施拔塞幹叛走海政追平之步真死乾封時咸亨二年以西突厥部酋阿史那都支爲左驍衛大將軍兼匱延都督以安輯其衆儀鳳中都支自號十姓可汗與吐蕃連和寇安西詔吏部侍郎裴行儉討之行儉請毋發兵可以計取卽詔行儉冊送波斯王子并安撫大食若道兩蕃者都支果不疑率子弟上謁遂禽之召執諸部渠長降別帥李遮旬以歸調露元年也西姓自是益衰其後二部人日離散遂擢彌射子元慶爲左玉鈐衛將軍步真子步利設斛瑟羅爲右玉鈐衛將軍盡襲父所領及可汗號元慶累拜鎮國大將軍行左威衛大將軍武后擅命率諸蕃長請賜睿宗氏曰武更號斛瑟羅曰竭忠事主可汗長壽中元慶坐謁皇嗣爲來俊臣所誣要斬流其子獻于振州其明年西突厥部立阿史那倭子爲可汗與吐蕃寇武威道大總管王孝傑與戰冷泉大領谷破之碎葉鎮守使韓思忠又破泥孰俟斤及突厥施質汗胡祿等因拔吐蕃泥孰沒斯城聖曆二年以斛瑟羅爲左衛大將軍兼平西軍大總管令撫鎮國人是時烏質勒兵張甚斛瑟羅不敢歸與其部人六



七萬內遷死長安擢于懷道爲右武衛將軍長安中以阿史那獻爲右驍衛大將軍襲興昔亡可汗安撫招慰十姓大使北廷大都護四年以懷道爲十姓可汗兼濠池都護未幾擢獻嶺西節度使十姓部落都擔叛獻擊斬之傳首闕下收碎葉以西帳落三萬內屬聖書嘉慰萬邏祿胡屋鼠尼施三姓已內屬爲默噶侵掠以獻爲定遠道大總管與北廷都護湯嘉惠等犄角於是突騎施陰幸邊隙故獻乞益師身入朝玄宗不許詔左武衛中郎將王惠持節安慰方冊拜突騎施都督車鼻施噶蘇祿爲順國公而突騎施已圍撥換大石城將取四鎮會嘉惠拜安西副大都護卽發三姓萬邏祿兵與獻共擊之帝將詔王惠與相經略宰相巨瓊臣頹曰突騎施叛萬邏祿攻之此夷狄自相殘非朝廷出也大者傷小者滅皆我之利方王惠往撫尉不可參以兵事乃止獻終以娑葛疆狠不能制亦歸死長安突騎施吐火仙之敗始以懷道子昕爲十姓可汗開府儀同三司濠池都護冊其妻涼國夫人李爲交河公主遣兵護送昕至碎葉西俱蘭城爲突騎施莫賀達干所殺交河公主與其子忠孝亡歸授左領軍衛員外將軍西突厥遂亡突騎施烏質勒西突厥別部也自賀魯破滅二部可汗皆先入侍虜無的君烏質勒隸斛瑟羅爲莫賀達干斛瑟羅政殘衆不悅而烏質勒能撫下有威信諸胡順附帳落寔盛乃置二十都督督兵各七千屯碎葉西北稍攻得碎葉卽徙其牙居之謂碎葉川爲大牙弓月城伊麗水爲小牙其地東隣北突厥西諸胡

東直西廷州盡并斛瑟羅地聖厯二年遣子遮弩來朝武后厚加慰撫神龍中封懷德郡王是歲烏質勒死其子噶鹿州都督娑葛爲左驍衛大將軍襲封爵是時勝兵三十萬詔十姓可汗阿史那懷道持節冊命賜宮人四景龍中遣使者入謝中宗爲御前殿引萬騎羽林二仗引見勞歸俄與其將闕噶忠節交怨兵相加暴娑葛訟忠節罪請內之京師忠節以千金賂宰相宗楚客等願無入朝請導吐蕃擊娑葛以報楚客方專國卽以御史中丞馮嘉賓持節經制嘉賓與忠節書疏反復娑葛邏得之遂殺嘉賓使弟遮弩率兵盜塞安西都護牛師獎與戰火燒城師獎敗死之表索楚客頭以徇大都護郭元振表娑葛狀直當見赦詔許西土遂定旣而與遮弩分治其部遮弩恨衆少叛歸默噶請爲鄉導反攻其兄默噶留遮弩自以兵二萬擊娑葛爲之默噶歸語遮弩曰汝兄弟不相協能盡心事我乎兩殺之

突騎施別種車鼻施噶蘇祿者哀拾餘衆自爲可汗蘇祿善撫循其下部種稍合衆至三十萬於是復雄西域開元五年始來朝授右武衛大將軍突騎施都督却所獻不受以武衛中郎將王惠持節拜蘇祿左羽林大將軍順國公賜錦袍鈿帶魚袋七事爲金方道經略大使然詭猾不純臣于唐天子羈係之進號忠順可汗其後閏一二歲使者納贄帝以阿史那懷道女爲交河公主妻之是歲突騎施鬻馬於安西使者致公主教於都護杜暹暹怒曰阿史那女敢宣教邪等其使不報蘇祿怒陰結吐蕃舉兵掠西鎮圍安



西城邊方入當國而趙頤貞代爲都護乘城久之出戰又敗蘇祿略人畜發困貯徐聞遷已宰相乃引去  
卽遣首領葉支阿布思來朝玄宗召見饗之會東突厥使者亦來與爭長曰突騎施國小且突厥臣不宜  
居上蘇祿使者曰宴乃爲我不可下遂設東西幄而蘇祿使者西席乃克宴始蘇祿愛治其人性勤約每  
戰有所得盡以予下故諸族附悅之爲盡力又交通吐蕃突厥二國皆以女妻之遂立三國女並爲可敦  
以數子爲葉護費日廣而無素儲晚年愁窶不聊故鹵獲稍留不分下始貳矣又病風一支孿不事事於  
是大首領莫賀達干都摩支二部方盛而種人自謂娑葛後者爲黃姓蘇祿部爲黑姓更相猜讎俄而莫  
賀達干都摩支夜攻蘇祿殺之都摩支又背達干立蘇祿子吐火仙骨噉爲可汗居碎葉城引黑姓可汗  
余微特勒保怛邏斯城共擊達干帝使碯西節度使蓋嘉運和撫突騎施拔汗那西方諸國莫賀達干與  
嘉運率石王莫賀咄吐屯史王斯謹提共擊蘇祿子破之碎葉城吐火仙棄旗走禽之并其弟葉護頓阿  
波疏勒鎮守使夫蒙靈骨挾銳兵與拔汗那王掩怛邏斯城斬黑姓可汗與其弟撥斯入曳建城收交河  
公主及蘇祿可敦余微可敦而還又料西國散亡數萬人悉與拔汗那王諸國皆降處木昆匱延闕律噉  
等諸部皆上書謝曰生於荒裔國亂王薨更相攻屠賴天子遣嘉運將兵誅暴拯危願得稽首聖顏以部  
落附安西永爲外臣許之明年擢闕律噉爲右驍衛大將軍冊石王爲順義王加拜史王爲特進顯壽其

功嘉運俘吐火仙骨噉獻太廟天子赦以爲左金吾衛員外大將軍修義王頓阿波爲右武衛員外將軍  
以阿史那懷道子昕爲十姓可汗領突騎施所部莫賀達干怒曰平蘇祿我功也今立昕謂何卽誘諸落  
叛詔嘉運招諭乃率妻子及羸官首領降遂命統其衆後數年復以昕爲可汗遣兵護送昕至但闕城爲  
莫賀咄所殺莫賀咄自爲可汗安西節度使夫蒙靈骨誅斬之以大羸官都摩支闕頡斤爲三姓葉護天  
寶元年突騎施部更以黑姓伊里底蜜施骨咄祗伽爲可汗數通使貢十二載黑姓部立登里伊羅蜜  
施爲可汗亦賜詔冊至德後突騎施衰黃黑姓皆立可汗相攻中國方多故不暇治也乾元中黑姓可汗  
阿多裴羅猶能遣使者入朝大厯後葛邏祿徙居碎葉川二姓微至臣役於葛祿斜瑟羅餘部附回鶻  
及其破滅有特庸勒居焉耆城稱葉護餘部保金莎領衆至二十萬

贊曰隋季世虛內以攻外生者罷道路死者暴原野天下盜賊共攻而亡之當此時四夷侵中國微而突  
厥最彊控弦者號百萬華人之失職不逞皆往從之赫之謀導之入邊故頡利自以爲疆大古無有也高  
祖初卽位與和因數出軍助討賊故詭臣之贈予不可計虜見利而動又與賊連和殺掠吏民於是掃國  
入寇薄渭橋騎蹙蒙京師太宗身勒兵顯責而陰間之戎始內阻不三年縛頡利獻北闕下靈掃風除其  
國遂墟自詩書以來伐暴取亂蔑如帝神且速也秦漢比之陋矣然帝數暴師不告勞料敵無遁情善任



將必其功蓋黃帝之兵也而突厥乃以失德抗有道衰衰當始興雖運之感衰屬于天而其亡信有由矣



